

الطبعة  
3

تامر عبده أمين

# بيضة وولاء

عن الحبشة والى عيشة

علا:

علا



الأعمال الكاملة

[t.me/kotbhm](https://t.me/kotbhm)

شيكولاتة بيضاء

تامر عبده أمين

تصميم الغلاف

كريم آدم

المراجعة اللغوية

إيناس أيمن

الطبعة الثالثة فبراير ٢٠١٦

رقم الإيداع: 2015/23000


ISBN:978-977-770-031-3

**المصري**  
للنشر  
والتوزيع

المدير العام: يوسف ناصف

عمارات العرائس

المعادي الجديدة - القاهرة

+2 01146335098 

info@elmasrypublishing.com 

www.elmasrypublishing.com 

جميع الحقوق محفوظة للنشر وأي اقتباس أو إعادة طبع أو نشر في أي صورة كانت ورقية أو الإلكترونية أو في وسيلة سمعية أو بصرية دون موافقة كتابية، يعرض صاحبه للمسائلة القانونية.

تامر عبده أمين

# شيكولاتة بيضاء

عن العيشة واللي عايشنها

دار المصري للنشر والتوزيع

إلى أبي ( رحمه الله ) الذى تعلمت منه  
ومازلت .. أمى وأخى هيثم أدام الله وجودكما

( ١ )

## عميل رقم 479

- عميل رقم ٤٧٧ شبّاك رقم ٣

تردّدت العبارة السابقة بصوتٍ أنشوي آلي داخل ذلك الفرع من فروع شركة الاتصالات الشهيرة.. تقدّم أحد العملاء نحو شبّاك رقم ٣ مُتخذًا مكانه أمام موظّف خدمة العملاء.. في أحد الأركان المتزوية بصالة الفرع يجلس (ياسر) مُمسكًا بورقةٍ مُدوّن عليها رقم دوره ٤٧٩ في توترٍ.

(ياسر مصطفى) شاب في الـ ٣٥ من عمره.. للوهلة الأولى - وباستثناء ذوقه الملحوظ في اختيار ملابسه التي يبدو عليها ارتفاع ثمنها - يبدو لك (ياسر) شابًا عاديًا جدًّا لا تستطيع استنباط أي فكرة مُسبقة عنه من ملامح وجهه الطفولية.. يجذب نظرك إليه الحركة المُميزة ليده اليُسرى الرفيعة جدًّا، والتي تبدو كأنها جزءًا منفصلًا عن باقي أجزاء جسده وهو يسحبها إليه سَحْبًا أثناء سيره مُحاولًا أن يفعل ذلك بشكل اعتيادي غير مُلاحظ.

على الرغم من إصابته منذ صغره وحتى الآن بمضاعفات مرض شلل الأطفال نتيجة إهمال والديه في تحصينه بالتطعيمات اللازمة، وبالرغم من تأثير هذا الشلل على شكله ومظهره العام مُتمثلاً في ضمور كُلِّي ليدِه اليُسرى، إلا أن هذا لم يفقده ثقته في نفسه ولو للحظة واحدة.. حتى سُخرية أقرانه منه وقت دراسته، سواء في المدرسة أو الجامعة تحولت كلها وبمرور الوقت مع ذكائه إلى تقدير ومحبة من الجميع.. كان مثالاً للالتزام في الشركة التي يعمل بها مُحاسبياً، حتى وصل فيها لمنصب مُدير شئون الحسابات؛ لتميزه في وقت قياسي!

(ياسر) لم يُفكّر في الارتباط من قبل أبداً.. كان يعتقد أن إعاقة يده ستقف دوماً حائلاً بينه وبين أي إنسانة يتقدّم لخطبتها.. توقف عن هذا الهدف أو بمعنى أدق أجّله إلى أجل غير مُسمى.. حتى رآها منذ أسبوع واحد فقط.. (تسنيم) موظفة خدمة العملاء بشركة الاتصالات.. تذكّرها وتذكّر كيف استطاعت ومن أول نظرة أن تخطف قلبه وتُجبره على إعادة حساباته.. وتذكّر سريعاً كيف كان لقاؤهما الأول.

بخطى سريعة أقرب إلى العُدو، قطع هذا الطريق الذي يفصله عن المكان الذي أوقف فيه سيارته مُتجهاً إلى مدخل أحد فروع شركة الاتصالات المشترك بها ووجهه يشتاظ غضباً.. كان قد اتخذ قراره بالانفصال عن الشركة نهائياً بعدما وصلته آخر فاتورة منهم بمبلغ كبير جداً، يرى من وجهة نظره أنه مُبالغ فيه.. انتظر دوره.. جاء الدور ووقف أمامها.

- تحت أمرك يا فندم.

اخترقت الجملة أذنيه في رقة مدعومة بابتسامة هادئة مدروسة من الموظفة الجميلة ذات الطلّة الطفولية... اصطدمت عيناه بها وتبدلت ملامحه، وبدا كأنه لم يسمعها من الأساس.. تلاشت فوراً من داخله عقب عبارتها كل مشاعر الغضب والثورة، التي كادت تتحاحه، وتركزت عيناه في عينيها دون أن يُجيبها.. ارتبكت الفتاة وشعرت بالخجل؛ لعدم رده فتلفتت حولها في سرعة وهي تُحاول رسم ابتسامة على وجهها مُكررة:

- تحت أمرك يا فندم!

انتبه من غفوته المؤقتة مُحاولاً الخروج من الموقف.. أمسك بموابعله وقال مُتلعثاً:

- متهيألي إن فيه مشكلة في جهاززي أصله وقع مني في الميه امبارح.

ردّت مُبتسمة:

- للأسف يا فندم إحنا معدناش قسم للصيانة، حضرتك ممكن توديه التوكيل بتاعه.

ابتسم لها في بساطة وكأنه لم يسمع ردها، ثم خرج من الفرع، وكان قد اتخذ قراره بالفعل.. وقال لنفسه:

- وليه لا؟

- عميل رقم ٤٧٨ شبك رقم ١.

قطعت العبارة السابقة حبل أفكاره، فتطلع إلى الورقة الخاصة



وانتبه إلى أنه كاد يعتصرها بين أصابعه من انفعاله مع الأحداث المتصاعدة داخل عقله، ثم واصل تذكُّر تفاصيل اللقاء الثاني.. نبتت في رأسه فكرةً مجنونة واستشار صديقه المقرب (عصام) المقيم في فرنسا عيماً اعتزم عليه.. لم يُضغ حينها وقتاً كثيراً.. توجه في اليوم التالي مباشرةً إلى الفرع ووقف أمام (تسنيم) وقدم لها ملفاً يحتوي على كل تفاصيل حياته الشخصية والوظيفية مع كل ما يمكن أن تحتاج أسرتها أن تعرفه عنه، ومع الملف عرضاً بالارتباط ومُهلة أسبوع ليعاود القدوم إلى الفرع وسماع ردِّها.. ابتسم عندما تذكَّر رد فعلها المذهول، وبعدم ردِّها عليه بحرف، وتذكَّر كيف أنه تركها وانصرف وملامح الدهشة تكاد تبتلعها.. وما هو الأسبوع قد انقضى وجاء لسماع الرد.

- عميل رقم ٤٧٩ شباك رقم ٣

قبل أن تكتمل العبارة كان يقف أمامها.. ارتبكت بمجرد رؤيته.. ابتسم وقال:

- أنا جيت في الميعاد.

قالت بصوتٍ خافت يُغالبه التوتر:

- أنا أسفة مش هينفع.

صدمته العبارة السابقة، فقال في هدوء:

- أكيد طبعا إنتي حرة، لكن ممكن أعرف السبب؟

صمتت لحظة، وبدأت عليها علامات التردد، ثم اتجهت عيناها بنظرة سريعة مُرتبكة ليده اليسرى.. فهم ما ترمي إليه:

- عشان إيدي؟

استجمعت شجاعته، ثم قالت في سرعة وبصوت حاولت أن يكون مُنخفضاً أكثر:

- أنا من حقي أرتبط بإنسان كامل.

رد في عصبية وبصوت خرج رغماً عنه مُرتفعاً:

- وأنا مش ناقصني حاجة.

عقب عبارته ساد الصمت المكان، ونظر أغلب الموجودون لهما.. اقترب أحد زملاء (تسنيم) منها: ناظرًا إلى (ياسر) وموجِّهاً حديثه لها:

- فيه حاجة يا آنسة تسنيم؟

لم تُجِب.. رمقها (ياسر) بنظرة يملأها الحزن والعتاب، ثم أعطاها ظهره وترك المكان في خطوات سريعة دون كلمة واحدة منه.. تأملتة وهي تحاول أن تُبعد عينيها عن مُتابعته وانحدرت من عينيها دموع حارة، ثم تمت بصوت خفيض لم يسمعه أحد:

- صدَّقني غصب عني.. غصب عني.

تماسكت وتلفتت حولها، ثم أخرجت بضعة مناديل ورقية من حقيبتها ومسحت دموعها في سرعة بيدها اليمنى، وتمحست بيدها اليسرى ذلك القائم المعدني (العُكاز) الذي تستند عليه أثناء سيرها، وألقت نظرة حزينه على ساقها اليسرى المختفية والممددة بالكامل تحت المكتب في شبه خمول، أو شبه حياة.

( ٢ )

## هتعدى

لم يستجِب الراكب لمحاولات سائق التاكسي الذي يُقلِّه لفتح أحاديث جانبية معه كعادة أغلب سائقي التاكسي المشهورين بالفضول والثرثرة في أي أمر تضيع معه دقائق الرحلة القصيرة.. حافظ على ملامح وجهه الجامدة الضجرة؛ لَيْسَد على السائق طريق أي حوار معه بلا جدوى أو طائل.. مع الصداع الذي كاد يعصف برأسه، كان يكفيه ما به من غم ونكد، وكان هموم الدنيا كلها قد تجمعت وألقيت فوقه، فأكسبته عمراً إضافياً فوق عمره.. مرّت دقائق قليلة من الصمت، وفجأة عبرت ثلاث فتيات - لا يتعدّون العشرين عاماً - الطريقَ أمام السيارة بسرعة.. ضغط السائق بتلقائية على الفرامل مُحاولاً تفاديهن، وبالفعل نجح، ثم أخرج رأسه من النافذة صائحاً فيهن:

- مش تحاسبي يا كتكوتة منك ليها.

وجّه رأسه إلى الراكب مُبتسماً:

- مستعجلين على إيه دول بس، تحدش هيوصل قبل معاده..

لم يُعقّب الراكب وأجاب بالصمت.. حاول السائق احترام حالة الزبون الشارد، لكن في النهاية فضوله وطبعه غلباه ولم يصمد كثيرًا فخرجت منه رغماً عنه:

- مفيش حاجة متاهلة والله يا باشا.

يلتفت الراكب إليه في دهشة:

- نعم!

يُكمل السائق في بساطة وتلقائية:

- بقول لسيادتك خليها على الله وفكك وسيك من أي حاجة.

استقبل الراكب عبارته دون رد.. أدار السائق مؤشر الراديو لوضع التشغيل قائلاً:

- أشغل لك حاجة تروّكك؟.. أنا معايا الفلاشه فيها حاجات من اللي....

- لا.

قالها باقتضاب، فأغلق السائق الراديو، وتناول علبة السجائر من فوق التابلو، ومد يده إليه بواحدة في هدوء.

- خُد عفر؟

يُشير الراكب بيده في ضجر:

- مش عايز.. ولو سمحت من هنا لحد ما نوصل مش عايز أتكلم خالص تاني.. مفهوم؟

يتبته السائق لأول مرّة إلى يد الراكب ويلاحظ الإعاقه بها..  
تفاجأ من لهجته الحادة لشوان، ثم لم يلبث أن قال بنبرة صارمة:  
- طب بص بقى يا ييه.. أنا اللي يركب معايا عريتي يلتزم  
بقوانيني وأول قانون إنك تفرد وشك.

- أفندم!.. إنت بتكلم معايا كده إزاي؟!

- أهوزي ما سمعت.

- نزلني هنا.

- لا مش هتزل.. وتصبر لما أخلص كلامي الأول.

· الطريقة العنيفة في حديث السائق جعلت الراكب يلتصق في  
مقعده مذعورًا.. فواصل الأول بصرامة وقوة:

- من ساعة ما ركبت معايا وشايفك مهموم وشايل طاجن  
ستك على نفوخك وبحاول أنكشك وأخفف عنك وإنت أبدًا..  
في إيه مالك؟.. ما تنشف وتخلّيك راجل.. هتطلع إيه يعني  
أكبر مصيبة مسودة عليك عيشتك.. دا إنت لسه عيّل في أول  
عُمرك، وياما هتشوف، أمّال لما تكبر وتلف والدنيا تهرمط في  
أهلك هتقول إيه؟

- إنت تعرف أنا عندي إيه؟

- هيطلع إيه يعني؟.. مديرك زعقلك ولا خصمك يومين  
ولا بت بتحها سابتك وراحت لغيرك ولا سقطت في مادة..  
أهسي تلاقها حاجة خيانة من بتاعة عيال اليومين دول..

(بُشيع بيده) معرفش ومش عايز أعرف.. عندك هم؟!..  
عندي مليون.. محدش خالي.. بتسي عينها اتصفقت من أسبوعين  
ومصاريف علاجها خلّتي مدفعتش قط التاكسي الشهر ده..  
بس ولا الهوا.. والله ضارها صارمة ويقول الحمد لله وضحكتي  
من الودن دي للودن دي.

يصمت لحظة كأنه بتذكر شيئًا ما ثم يستكمل:

- حتى الولية في البيت بتقول عليًا اتجنتت وراكبني عفريت.

قالها ضاحكًا بصوتٍ عالٍ.. لحظات واكتست ملامحه فجأة  
بالجدية مرّة أخرى وقال:

- أنا مش معتوه ولا حلّوف.. بس كل ده مش فارق معايا  
بنكلة.. تسألني ليه؟

نظر الراكب إليه بتساؤل دون أن ينطق، فأكمل بنفس الجدية  
مُلوّحًا بقبضة يده في قوة:

- عشان أنا قد أي حاجة رينا يحطني فيها.. مهما حطني في  
أصعب من كده مليون مرّة، أنا قدّه وهعديه.. أصل بالعقل  
كده لو مكتش قدّه مكنش حطني فيه من أصله.. مش هو  
قال في كتابه (لا يُكَلِّف الله نفسًا إلاً وسعها)؟.. ما ترد عليًا قال  
ولا مقالش؟

- قال.

- خلاص يبقى والله هتعدي.

اطلق الراكب زفرةً من أعماقه وغمغم بارتياح:

- عندك حق.

- قولي نكتة.

- نكتة ١٩

- ده تاني قانون من قوانين عربيتي.. الزبون اللي يحرقلي دمي

لازم يقولي نكتة.

يُغمغم الراكب بارتباك:

- مش فاكر حاجة والله.

- خلاص أقولك أنا المرّة دي.. بيقولك مرّة واحد قهوجي

اشترى عربية طلّع كراسيها بتره

ألقاها وضحك من قلب+ه كما لم يضحك من قبل.. كانت

الضحكة هي البداية؛ ليتبادل مع السائق النكات ويتردد صوت

ضحكاتها عاليًا.. أخرجه السائق من حالته.. نسي سبب ضيقه

وتمنى لو كان الطريق أطول من ذلك.. حتى لما غادر السيارة

ووصل إلى منزله ظلّت تلك الكلمة ترن في أذنه بالحاج.

والله متعدي.

( ٣ )

## تيجوا ؟

كانت نية الفتيات الثلاث - اللاتي لم يتجاوزن العشرين عامًا قبل زيارتهم الأولى إلى ذلك المول الشهير - أن يكون يومًا لا يُنسى بمعنى الكلمة.

- بالعربي عايزين نخربها .

هكذا هتفت إحداهنَّ وهُنَّ على الباب، فبعد إلحاح استمر لمدة شهر أو يزيد على الأهل للسماح هُنَّ بالخروج دون رقيب، حصلنَّ أخيرًا على الموافقة لخوض تلك التجربة بمفردهنَّ.. بالفعل كان اليوم يسير كما تمنينَّ لحظات انبساط ومرح تخللها انبهار بالبريق الذي يُحيط بهنَّ من كل جانب.. لكن كالعادة لحظات السعادة لا تدوم طويلًا، وكعادتهنَّ كلما وقعنَّ في مشكلة جديدة.. وقفنَّ في أحد زوايا الدور الأرضي في المول في مواجهة بعضهن على شكل دائرة.. اقتربن.. رؤوسهنَّ إلى أسفل شبه مُتلاصقة، وأيديهنَّ على أكف بعضهنَّ ثم تهاسن:

- الفلوس طارت في إيه بس عايزة أفهم؟

- بالراحة وتعالوا نحسبها تاني.. إحنا نازلين وكل واحدة



مننا معاها ٣٠ جنيه.. يعني ٩٠ جينا ٣ آيس كريم بـ ٣٠.

- وفشار بـ ٤٥.

- و٣ بلالين بـ ١٥.

- أوبالال.. طب ما كده بخ.

إحدها من بإحباط:

- مدخلناش الفيلم.

- ولا جبت المحفظة اللي أصلاً جايه عشان أشتريها.

- دا إحنا مكملناش ساعتين حتى.

- هنعيش ونموت فقيرين.

- قتللكم نصير لحد ما يكون معانا مبلغ مُحترم كده على

بعضه عشان مَتكسفش، انتم اللي استعجلتوا.

هتفت إحدها من باستنكار:

- إحنا برضه ١٩

- هتشتششش.. فككوا بقى من الهجري وخلّونا في المهم..

هنروح إزاي؟

- أنا فلست وكنت مُعتمدة عليكم.

- وأنا كمان.

- يا حلاوة.

- وإنّ؟

تُدخل يدها في جيبتها.. تتحرك يدها داخل الجيب ثم تقف..

تغير ملامحها.. تشير بعلامة النصر.. تُخرج يدها بعملة معدنية

واحدة فتة ١ جنينه:

- لقيت ده .

تضرب إحداهن كفتها ببعضها وتهتف بشخرية:

- خليهولك .

- هنعمل إيه بجنيه يا خيانة منك ليها .. دا إحنا عايزين

على الأقل ٦ جنيه عشان نروح .

- طب والحل ؟

تغمز المُسكَة بالجنيه بعينها غمزة غامضة:

- نعيش .

نظرن إليها بتساؤل .. رفعت رأسها وأشارت بهلناحو آلة

اللبان المُستدير أمامهن:

- ها .. تيجوا ؟

نظرن إلى بعضهن .

- بس الجنيه هيجيب لبانة واحدة بس يا فتكة .

هزت المُسكَة بالجنيه كفتها في لامبالاة:

- وإيه يعني ؟ .. نقسمها .

ثوانٍ وكن يقفن أمام الآلة .. وضعت إحداهن الجنيه داخل

فتحة العُمَلات .. راقبت أعينهن بمتهى اللهفة اللبانة الحمراء

التي تدور داخل مسار حلزوني في طريقها إلى الخروج .. مددن

أيديهن الرقيقة لاستقبال رمز انتصارهن الوحيد في تلك الليلة ..

أمسكت إحداهن باللبانة قبل الاثنتين .

- بصوا بالراحة عشان منضحكش الناس علينا.. أنا هقسمها  
وهذي كل واحدة منكم جتها.

- هقسمها إزاي؟

- عادي بّي.

- الله يفرّك لأ طبعاً.

- ما هي ناشفة ومش عارفة أعملها بإيدي.

- طب هاتي هجرب أنا.

- لا.

- لا إنتي ولا هي أنا اللي هقسمها.

تصارعن في عناد طفولي على الإمساك باللبانة.. سقطت على  
الأرض وبسبب طبيعة أرضية المكان المصقولة تدرجت فوقها  
اللبانة.. صرخن وأخذن يجرين ورائها، غير عابشات بالناس  
المندهشين حولهم.. وصلت اللبانة إلى السلم الكهربائي المتحرك  
واستقرت فوق إحدى درجاته.. هَدَّان من خركتهن، حتى لا  
يُلفتن النظر، وصعدن خلفها في درجة تليها بعدة درجات..  
وصل السلم إلى الدور الثاني.. تدرجت اللبانة بعده قليلاً،  
حتى توقفت بجوار عامل نظافة المول الذي لا يراها.. تستعد  
إحداهن لتنقض عليها.. في نفس اللحظة يُزيع العامل اللبانة  
بالمكنسة أثناء قيامه بعمله، دون أن يدري، فيعطيهها قوة دفع  
إضافية تجعلها تُواصل الحركة.. يواصلن الصُراخ والجري  
خلفها.. تُلقِي بها الدفعة إلى داخل منطقة الألعاب.. سيده  
تجلس على كُرسي مُتحرك تتابع يبصرها ابتها الطفلة الصغيرة

تأرجح فوق إحدى اللُّعبات بجوارها.. ترى السيدة الثلاث  
فتيات يجربنَّ نحوها في سرعة، تُطلقُ شهقة، وتقفز فوق طِفلتها  
واللُّعبة.. اللبانة لا تزال تجري وهنَّ ما زلن ورائها.. جارسون  
أحد الكافيات بالمول يحمل صينية عليها عدة أكواب لمشروبات  
ساخنة يأتي في الناحية العكسية.. يُفاجأ بالفتيات يجربن بتجاهه  
وعلى وشك الاصطدام به، يتفادى الأولى بحركة رشيقة، ثم  
يتجاوز الثانية بخفةٍ مُحافظًا بمعجزة على ما بيده، ينظر إليهما  
مذهولاً بعد أن تجاوزاه هاتقًا:

- يا ولاد المجانين،

لا يتبه إلى الثالثة التي تصطدم به من الخلف فيسقط ومعه  
كل حمله.. تتباطأ اللبانة حتى تصطدم بقدم طفل صغير لا يتعدى  
٣ سنوات يقف مُسكًا بيد والدته.. تقف اللبانة.. يتبه الطفل..  
يميل إلى الأسفل يلتقطها.. تتوقف الفتيات الثلاث ويتابعن  
الموقف من بعيد وهنَّ يلهثن.. ينظر إليهنَّ الطفل في براءة غير  
مُستوعب لإشارتهنَّ من بعيد أن يعطيهنَّ إياها.. يضعها في فمه  
بسرعة.. يجلسن على الأرض من الصدمة.. تبادلن النظرات  
وعلى وجوههنَّ خيبة الأمل.. لحظات ثم انفجرن في الضحك..  
صحيح أنهنَّ خسرن آخر ما يملكن، لكنهنَّ حظين في المقابل  
بواحدة من أكثر اللحظات إثارة في حياتهنَّ.

( ٤ )

## اتنين برتقال

يتجه (أيمن) الجارسون عائداً إلى الكافية الذي يعمل به في المول بخطوات مُتأقلمة نوعاً ما بسبب سقوطه منذ قليل.. وجهه يبدو عليه الضيق.. ملابسه عليها آثار بقع مُتعددة.. حاملاً صينية فوقها بقايا أكواب مُحطمة فيستقبله زميله مُندهشاً:

- إيه ده!.. مين اللي دهولك ومرمطك كده!؟

يُشير وراءه إشارة مُبهمة ويُجيب بغضب:

- شوية بنات مجانين كانوا بييجروا هناك.. عالم ولاد ستين....

يُقاطعه ضاحكاً:

- بس بس.. تعالى تعالى لما أنصّفك..

يُمسك منه الصينية ثم يضعها فوق منضدة جانبية ويتناول قطعة قماش صغيرة ويمسح له فوق البقع.. يواصل زميله حديثه قائلاً باهتمام:

- إنْتَ النهارده مُحك مش فيك.. لسه برضه موبايِلها

مقبول؟

- أستنى فكرتني..

يقولها أيمن ثم يُخرج تليفونه من جيبه ويُحاول الاتصال برقم ماء، ثم يسمع الرسالة الصوتية فيهز رأسه بضيق قائلاً:  
- متيل مقبول برضه.

يتهي زميله من مُهمته ثم يرد عليه:

- واجع دماغك على الفاضي.. يا ابني اتقل ومتبقاش خزع.

يقول أيمن باستنكار:

.. مع دينا... أنا وهي مَفِيش بينا الكلام الأهل بتاعكم ده.

- مش بتقول قافشة منك ومش راضية ترد عليك من الصبح!

- أبوه صح بس لو سمعتني هتفهم.

بنفاذ صبر:

- ما هي مش معتراك أهى يا عم..

يزفر أيمن وهو يحاول الاتصال مرّة ثانية فيلقى نفس النتيجة ويرد:

- مسألة وقت مش أكثر يا سيدي ما تعلقنيش بقى

بكم زميله ضحكته ويقول:

- وبعدين رايح تحبلي واحدة أبوها بطل مصارعة زمان!؟

- آآه... اسكت يا أخني دا أنا شايل هم اليوم اللي هروح  
أتقدم فيه.

- ده بس!.. يا معلم إنت هتحبها مليون مرة قبل ما  
تزعها.. ده هيعلقك.

يتبه أيمن لجملة صديقه السابقة ويُفكر فيها لحظة ثم يتف  
بقلق :

- إيه ده تصدق صح!

يشيح زميله بيده قائلاً:

- إنت حر.

هم بالانصراف لكنه ينظر إلى نقطة ما خلفه.. يتسم.. يُشير  
برأسه إلى ما وراء أيمن هامساً:

- بُص مين هناك.. جُسم وانتم برّه من شوية قبل ما تتدهول  
عل عينك.

ينظر أيمن خلفه ناحية الصالة الرئيسية للمكان ويرى  
شابًا وفتاة يجلسان في أحد أركان الكافية الهادئة.. تتبدل ملامحه  
ويتسم قائلاً:

- يا أخني أنا بنسط كل ما بشوف الاتنين دول.

- روح شوف هيشربوا إيه عشان بقالم كثير.

يرد بثقة:

- بدون ما أسأل أنا حافظهم.. جهّز اتنين برتقال فريش

ساقع.

يُبلغ زميله الأوردل للشيف عن طريق شباك صغير بجواره  
ثم يسأل:

- هتا ما بيغريوش طلبهم خالص؟

- ولا مرة.. بقالم سنة وشوية أهو ولا مرة غيروه.

- غريبة!

ينظر إليهم أيمن بإعجاب مشدوهاً ويقول لزميله:

- شايف الحب اللي طالل من عيونهم.. شايف بتبصله إزاي..

حاسس بالكلام اللي بيتقال في سكوتهم.. أوعدنا يا رب.

- صباح الأفورة.

يتجاهل رد زميله ويُحاول الاتصال مرّة ثالثة ويتجهم وجهه

فينظر إلى أعلى ويتف:

- ربنا يهديكي يا دينا يا بنت أم دينا.

يخرج زميل ثالث لهما ويُناول صينية عليها الكوبين إلى أيمن..

يحملها ويتجه بها نحو منضدة الشاب والفتاة بمُنتهى الحماس..

مُجرد رؤيته لهما كانت تبث في روحه شيئاً من السعادة الغير مسبية

وُجدد طاقة الحب بداخله.. ربما لأنه وجد فيهما شيئاً من قصته

مع دينا.. ربما لأنهما حافظا على نفس درجة الحب والهيام التي

يراهما في عيونهما لمدة طويلة منذ أن اختارا هذا المكان ليكون

الشاهد الرسمي على قصتهما.. لا يدري.. وُصل إليهما.. لاحظ



أنهما لازالا صامتين.. تعجّب فتلك ليست عادتهما.. ابتمسم تحيةً للشاب لكنه كان سارحًا فلم يتبّه. نفس الأمر بالنسبة للفتاة.. وضع ما يجعله أمامهما في صمتٍ ثم انصرف.. بدوا مُختلفين له هذه المرّة كثيرًا.. أعطاهما ظهره وعاد مرّة أخرى بجوار زميله.. انشغل للحظات بعدها في متابعة زيون أو اثنين آخرين حتى أشار له زميله إلى مكان الشاب والفتاة صائحًا:

- إيه ده شوف كده.

نظر بسرعة فوجد الفتاة تقف وهي تبكي ثم تُلقِي شيئًا ما بيدها على الطاولة وتنصرف شبه راکضة.. يُنادي عليها الشاب لكنها تواصل الانصراف.. حتف أيمن غير مصدقًا:

- إيه ده.. شكلهم اتخانقوا.

زميله بسخرية:

- ما أنت نقيت فيها.

يُردد أيمن بأسى بالغ:

- ليه بس.. ليه!

- وشكلهم عاقلين كده مش عيال سييس.

- بس هما كان فيهم حاجة متغيرة عن كل مرّة

- وجاين يتخانقوا النهاردة.. في الفلانين.

يُفاجأ أيمن من كلام زميله فيمسكه من ذراعه فجأة مصعوقًا:

- إيه ده الفلانين النهاردة.. إنت متأكد؟

- أبوه يا عم.. فيه إيه؟

يطلع البوبيون من رقبته ويسم بتغيير ملابس العمل هاتفًا:

- مش تقول من بدري.

- استنى رايح فين؟

- هروح لـ دينا البيت.

- ليه؟

- مصالحها.. بكرة الفلانين مينفعش نفضل كده.

- هتخش إزاي وهقولهم إيه عندها؟

- مفكرتش بس هتصرف.. تيجي زي ما تيجي بقي.

- والشغل؟

مشيرًا إلى ساعته:

- فاضل ساعة على الشفت بتاعى.. غطيني فيها بقى خليك

جدع.

ضاربا كفا بكف في ذهول:

- أنا عارف دي صحوية مش جاي ولا هيجي من وراها إلا

التم والقرف.. مش كفاية مستحملك في البيت.. هшил وراك

هناك وهنا!

كان أيمن قد انتهى من ارتداء ملابسه فهتف بمرح وهو

هم بالخروج:

- أيون وتعمل حسابك على كده طول ما إحنا قاعدين مع بعض في شقة واحدة.

- هات العيش معاك وإنْت جاي.. والله ما هدخلك البيت لو ما جيت.

أرسل له أيمن قبلة في الهواء هاتفًا:

- حبيبي.

يقولها ثم يغادر المكان.. أول ما كان يشغل باله هو أن تكون دينا بخير فعدم ردها عليه ثم إغلاقها للهاتف أورثه شعورًا قلقًا عليها.. أما طريقة دخوله إلى منزلها فلم تكن تشغل باله.. على الإطلاق.

( ٥ )

## حبل رايب

للمرة الخامسة على التوالي ظهر رقمها على الشاشة مُعاوَدًا  
الاتصال بإلحاح.. قبل لقائهما بعدة ساعات استيقظ عمرو على  
الاتصالات المُتتالية من هبة.. ظهر رقمها ولم يظهر اسمها على  
شاشة هاتفه المحمول.. حذف اسمها منذ أكثر من شهر عقب  
آخر وأكبر خلاف بينهما إلا إنه لا يزال يتذكر رقمها جيدًا ربما  
أكثر من رقمه.. جلس على حافة سريرهِ وأمسك بالهاتف..  
تردد للحظة لكنه حسم ترده مع الاتصال السادس وقرر  
الرُد.. جاءه صوتها على الطرف الآخر بنبرة عتاب طفوليّة:

- إيه يا ابني سنة عشان ترد؟

- إزيك يا هبة.

- وحشتني ومن غير مناقشة عايزة أقابلك النهاردة.

ظل صامتًا لبضع ثوانٍ قبل أن يُجيب في هدوء:

- فيه حاجة؟

لم تشعر بالبرودة في حروفه وأجابت:

- حاجة واحدة بس؟! .. حاجات يا أستاذ.. هستناك الساعة ه  
في كارلوس كافية.. متأخرش عشان عندي مفاجأة ليك وكمان  
عايزة أصالحك.

ابتسم ابتسامة شاحبة لم ترها:

- إن شاء الله.

على نفس المنضدة المُفضّلة لهما وفي نفس المكان الذي طالما  
شهد معظم لقاءاتهما جلسا.. احتضنت هبة يده بكفيها ثم  
بدأت حديثًا تتقاطر منه روح مُجبة مُبهجة:

- شوف يا أستاذ بدون مُقدمات كده.. أولاً إنتَ مش لسه  
هتعرفني النهارده دا أنا تربيتك.. ثانيًا أنا فكرت في الكلام اللي  
إنتَ قولته واقتنعت بيه وموافقة وأسفة كمان يا سيدي لو كنت  
ضايقتك بكلامي بس إنتَ عارف إن أنا....

تصمّت دقيقة كاملة وكأنها تُلمِّم شتات نفسها.. سحبت  
يدها في خجل.. قالت في همس:

- بيجك.

كانت تعتقد وهي تهمس بها وقد اكتست ملاحظها بلون  
وردي إنها اجتازت المُستحيل مُتجسدًا في أربعة أحرف ولم يدُر في  
خلدها أنها كمن أمسك العالم كله بكامل تفاصيله وألقاه فوق  
أكتافه فجأة.. قالتها وابتسمت في خجل وهي تنظر إليه ولكنها  
صدمت من نظراته المضطربة الخاوية والتي لا تُعبّر نهائيًا عن رد

الفعل الذي توقعته.

نظر كلاهما إلى عين الآخر مُحاولاً استشفاف ما بداخله كما اعتادا.. دار بين عيونهما حوار بلا صوت.. استرجعا كل شيء من البداية وحتى اللحظة.. جمعتهما الحياة بما هو أكثر من مجرد علاقة حُب.. يوم ميلاد واحد، مدرسة واحدة، فصل دراسي واحد، وكُليّة واحدة.. علاقة دافئة بين الأرتين كان سبباً مباشراً فيها مواجهة منزليهما كلاهما للآخر.. يا لقرب ما اجتمعا عليه ويا بعد ما افترقا إليه.. لا يدري أيّا منهما متى بدأت نهاية قصتهما تحديداً لكنها ككل شيء بدأت بخلاف بسيط لم يلبث أن تعاضم نتيجة إصرار كل منهما وتمسكه برأيه.. عمرو كشخصية طابعها السرعة يرى أنه وهبة كالكتاب المفتوح بالنسبة لبعضهما ودوماً كان يرغب في التقدّم لخطبتها وتكليل قصة حبهما في أسرع وقت خصوصاً أنه سيبدأ تفعيل ارتباطه بعقد عمل مُغري في إحدى دول الخليج بعد خمسة أشهر ويُريد أن يُسافر ومعه زوجته وزاد تمسكه بمقترحه هذا أكثر بعد موافقة الأرتين.. على النقيض هبة شخصية مُتمهلة لأقصى حد ترى أن اتخاذ هذه الخطوة يلزمه المزيد من الوقت وأنها يجب أن تأخذ فرصتها كاملة هي أيضاً حتى تُحدد رغبتها ولم تُجدي معها محاولات والدها لإقناعها ولا تهيب والدتها لها عندما صدمتها بقولها:

- إنتي بتلككي وخايفة من الارتباط يا هبة.. أنا أمك وأكثر واحدة أفهمك.. بس بطريقتك دي عمرك ما هتجوزي لا عمرو ولا غيره.

وبالرغم من ذلك ظل كلاهما عند رأيه حتى وصلا لمرحلة شعرا معها أن نقاط التلاقي بينهما تنكمش يومًا بعد يوم ومن ثم كانا قد أخذنا قرارًا بالابتعاد بعد آخر مرة جدد عمرو فيها عرضه بالتقدم لخطوبة هبة ورفضها له كالعادة.

- عمرو أنا بكلمك!

قالتها وأخرجت نفسها وهو من حالة السكون الشني سيطرت عليهما.. انتبه عمرو.. بدا وكأنه يتقني ويزن كل حرف من إجابته وقال:

- أنا خرتي زي كل مرة.. حتى المرة الوحيدة اللي جيتي تأخدي قرار صح أخذتبه متأخر.

نظرت إليه متسائلة، فأكمل:

- أنا مسافر بعد أسبوع.

ترقرقت عيناها بالدموع غير مُصدّقة.. يقترب منها الجارسون واضعًا أكواب المشروبات أمامهما ثم يتعد.. يواصل عمرو مُتعمدًا عدم النظر لعينها:

- متفتكر يش إن القرار ده كان سهل علينا.. دي عشرة.. عُمرنا كله تقريبًا.

هز رأسه في ألم ثم واصل:

- بس أنا مكنتش أقدر استنا أكثر من كده.. أنا بكلمك في موضوع ارتباطنا من زمان وكتسي بتهربي.. بتصالحني وتزعلي

وقت ما تحبني . تقربني وتبعدي وقت ما تحبني . أنا دائماً اللي  
أصالح أنا دائماً اللي أصبر . أستنى ! .. أسكت ! .. أبداً ! .. إيه  
ولحد إمتى ؟

يركز عينيه في عينها ويواصل بمرارة :

- أنا عمري ما كنت ضعيف غير قدامك بس لإمتى ؟ ..  
هبة إنتي عندك مشكلة كبيرة اسمها التأخير حتى لو التأخير  
ده بييجي على حساب مشاعرك ومشاعر اللي قدامك .. ( يتسم  
بُسخرية مؤلمة ) دا إنتي حتى ميعادنا ده اللي إنتي محدداه جاية  
متأخرة عليه .. أنا بتأكد إننا هنفضل إخوات زي ما إنتي  
قولتي لي آخر مرة أو على الأقل أصدقاء .. يا رب تكوني فهمتي  
كلامي .

ترد بصوتٍ مُحْتَنِقٍ من الدموع :

- الحاجة الوحيدة اللي فهمتها قد إيه إني كنت بنى آدمة  
زبالة .

- أكيد مش ده اللي أقصده !

أوقفته عن الاستمرار في حديثه بإشارة من يدها وقالت  
مُحاولةً الابتسام :

- متضحكش على نفسك أو عليا يا عمرو .. الصداقة ممكن  
تبقى حُب بس مفيش حُب بيرجع يبقى صداقة .

- الحُب اللي بجدي ياخذ من الطرفين وييدي الطرفين .. زي  
حبل لازم يكون مشدود من ناحيتين وينفس القوة .. لو طرف



حَسَّ إِنَّهُ شَادِدٌ أَكْثَرَ مِنَ التَّانِي الصَّحِّ إِنَّهُ يَسِيبُ فَوْرًا عِشَانَ  
هَيْتَكْفِي عَلَى ضَهْرِهِ.

- وميبت؟

- كان لازم عشان إحنا الاتنين منوقعش يا هبة.

تصمت لحظة ثم تقول:

- ربنا يسعدك ويوفقك في قرارك.. بس عايضة أقولك على  
حاجة.. أنا جايز يكون خجلي أو تأخيري زي ما إنت بتسميه  
مشكلة عندي بس إنت كمان عندي مشكلة. إنت معرفتش  
تحتويني.. أي حاجة غلط فيا إنت كنت جزء منها.. سكوتك  
خلّاك شريك في أي حاجة محاولتش تصلحها فيا وجاي تلومني  
عليها النهاردة!

تحاول السيطرة على دموعها وتُخرج بأيدي مُرتعشة من  
حقيبتها علبة صغيرة مربعة ومُغلّفة وتضعها على المنضدة أمامه  
مواصلةً:

- وعلى فكرة أنا اتأخرت عليك النهارده عشان كنت  
بشربك دي.. النهارده عيتد ميلادك.

همّ عمرو بقول شيء ما لكنها أوقفته مرّة ثانية بإشارة من  
يدها وواصلت وهي تنهض:

- إنت كسرتني.

قالتها وخرجت في خطوات أشبه بالعدو وهي تضع يدها

على وجهها محاولةً كتم فيض الدموع الذي انفجر عليه وناداهما  
عمرو لكنها لم تُجبه ولم تنظر وراءها أبدًا.

منذ ذلك الحين أصبحت هبة مختلفة تمامًا.. أنقلتها مرارة  
التجربة وحوّلتها لإنسانة أخرى.. حققت نجاحًا في عملها..  
زادت مساحة تعاملها بعقلها وتلاشى دور قلبها في حياتها  
نهائيًا.. أصبحت أكثر نضجًا وغلظةً في التعامل مع الآخرين.  
لكنها بالتأكيد أصبحت أسرع بكثير في اتخاذ قراراتها - أو هكذا  
أعتقدت- أسرع للدرجة التي جعلتها تتأخر في نسيان قصتها مع  
عمرو.. حتى الآن!

( ٦ )

## فلانتين

- مش فاهم الناس جرالها إيه.. الرحمة من عندك يا رب.

-مالك يا أبو دينا فيه إيه؟

- الدنيا مَبقاش فيها أمان.. كل يوم الصبح الواحد يصطبح بشوية حوادث وجرايم تخليّ الدم يغلي في عروقه.

- ما إحنا خدنا على كده هي عادة بلدنا ولا هنشترها.. إيه الجديد النهارده يا حاج؟

- بيقولك عيلة في مصر الجديدة دخل عليهم المجرمون الشقة بجحّة إنهم مندويون من اللي ييلفوا على الشقق ويبيعوا أجهزة ودبحوهم كلهم وسرقوا الشقة.. كل ده في ربيع ساعة بس ولا من شاف ولا من دري ومفيش حد من الجيران حس بحاجة.

- وإيه يعنى يا حاج.. ما إحنا بقينا نسمع عن الحاجات دي كل يوم عادي.. دا اليوم اللي بيعدي من غير ما اسمع عن حوادث بالشكل ده بقول ده يوم مش طبيعي.

- لا بس مش كده.. من ١٠ سنين مكنش فيه رُبع الكلام

ده.. الجرايم دي دَخيلة علينا بقالها مُدة والغريب إنها مش شبها  
وكل مادا عمالة تزيد.. ولا إنتي ايه رأيك يا دينا؟

يقولها وهو ينظر إلى ابته الجالسة غير مُتبهة على مقربةٍ منها  
ويدها إحدى المجلات تُقلِّبها بين يديها بشكل روتيني وتسدل  
من أذنيها سماعات الـ ipod.. تميل الزوجة على أذن زوجها  
وتقول:

- مش هتسمعك بقالها يومين على كده وحالها مش عاجيني.

- فيه حاجة حصلت معاها في الشغل؟

تهز الأم كتفيها في إشارة لعدم علمها ثم تقوم وتتحرك  
للداخل فيقرب الوالد من ابته.. تتبسه لوجوده.. تخلع  
السماعات وتعتدل في جلستها:

- اللي واخذ عقلك.

تبسم وترد:

- إيه يا بابا؟

- مالك يا حبيبتى؟

- مالي يا بابا!

- قاعدة سرحانة ومش بتخرجي ليه.. مفيش شغل النهاردة؟

- أخذت إجازة أسبوع وقاعدلكم أهو.. لما بخرج بتقولي

مش بتقعدي معايا وأهو لما أقعدت بتقولي مش بتخرجي!

- أنا عن نفسي عايز بتسي حبيبتى تكون جنبى علطول..

بس بتسي اللي أعرفها مش واحدة شبها.. إنتي فيه حاجة

مضايقا كسي؟

تُحاول الابتسام:

- لا أبدًا مفيش.. وهو أنا لو فيه حاجة هخبي برضه عليك

إنت عارف.

- أكيد؟

تهز رأسها في بساطة:

- أكيد.

ترتفع أصوات طرقات سريعة على الباب فتقوم دينا وتتجه ناحية الباب.. تفتح الباب وتجد أمامها حبيها أيمن ويده كرتونة لجهاز كهربائي ويقف مُتوتراً.. رد فعل مذهول على وجه دينا وتتقل بنظراتها بين حسام وداخل المنزل وتهمس في رعب:

- أيمن!.. أنت إيه اللي جابك هنا؟

- إنتي اللي فين يا دينا.. قافلة تليفوناتك كلها ومش بتنزلي من البيت.. فيه إيه؟

تُجيب بلهجة غاضبة هامة وهي تجرّ على أسنانها:

- إنت هتستعبط ولآ قلت لنفسك أحش عليها بكلمتين وأخطفها بيهم؟

- يا مجنونة والله العظيم دي زبونة عادية ما أعرفهاش ولا فيه أي حاجة بيني وبينها.

- آه والمطلوب مني أكذب اللي شوفته بعينيا دول وأصدقك

لائك الملاك الطاهر اللي لازم يتصدق دايمًا.

يتلفت حوله في قلبي ويمس قائلًا:

- بُضي وقفنا كده مش هتنفع.. ادخلي البسي وأنا هستاكي

نمت ونتكلم براحتنا وهفهمك كل حاجة

تردد.. فكرر:

- ياآ بقى ميقاش دمك ثقيل وقلبك اسود ده النهارده

الفلاتنين.

تتبه لهيته وتقول بذهشة:

- ويعدين إيه اللي إنت لابسه وعامله في منظر كده!

تسمع صوت والدها الذي يقرب من الباب:

- مين يا دينا؟

تلعشم وتقول بتوتر بالغ:

- ده.. ده.. ده

يصل والدها في تلك اللحظة إلى الباب وينظر بصرامة إلى

أيمن ثم يقول لابتته:

- ادخلي إنتي جوّه دلوقتي.

تدخل دينا مسرعةً إلى الداخل ويزيح أيمن والدها ويدخل

إلى داخل الشقة حاملاً الكرتونة التي بيده ويبحث عن شيء

ما في مدخل الشقة حتى يجد فإذ بها ورد فيخرج الورد منها

ويسكب ما بها من طين على الأرض فوق السجادة ويُخرج من

الكرتونة مكنسة كهربائية ويوصل الفيشة بالكهرباء.. رد فعل

مصدوم على وجه والد دينا أثناء قيام أيمن بذلك... يصبح  
الأخير في قوة:

- طبعًا حضرتك مستغرب وتتقول إيه اللي بيحصل ده؟..  
بصر يا بيه ده لا تُشغل الصين ولا تايوان إحنا معانا مكنسة  
يابانى أصلي تشيل أي تراب أي عفار وتنصف أي حاجة من  
على أي سجادة ويسمر مُستحيل تتخيله.. جرب حضرتك ومش  
هتندم ولو منضفتش السجادة حالًا بشر في أنا مُستعد أبلع كل  
الطين اللي على الأرض ده وأكله قدام حضرتك.

يتسم أيمن ويُناول والد دينا المكنسة في ثقة حتى يُجرها..  
تبدو الصرامة على وجه والدها ثم يُغلق باب الشقة ويُشمر  
أكمامه وينظر بريية لـ أيمن قائلاً:

- وعلى كده بقى بعد ما تاكل الطين تحب تبلع بحاجة  
ساقعة ولا عصير؟

يلمح أيمن بطرف عينه صورة أبيض وأسود كبيرة مُعلقة  
على الحائط لوالد دينا بملابس المصارعة تبرز عضلاته من  
وسطها فيلعب ريقه بصعوبة ويسأل:

- مش فاهم يا باشا.

يمسكه من ياقته ويم بضربه ناظرًا إليه بصرامة:

- أصل الكهريا قاطعة.

( ٧ )

## غُرْبَة

ينزل بيسطه بمساعدة أحد الركاب من السيارة السوزوكي  
الأجرة عند آخر الخط بمدخل الحي الثاني بمدينة ٦ أكتوبر..  
هيته كانت توحى أنه خارج لتوه من معركة لم يكن أبدًا  
الطرف الرابع فيها.. يختفي وجهه خلف كومة من الضادات  
الطبية الملزوفة بشكل عشوائي وكدمة زرقاء تحت عينه اليمنى  
المتفتحة ورباط ضاغط يلف ذراعه اليسرى كلها.. يسير على  
قدمه اليمنى وبالكاد تلمس اليسرى الأرض من سُدة الألم فيها..  
أحد التكايك يمر بجواره فيشير له ويُصيح بصوت عالٍ:

- عند شركة المية؟

يُجيبه سائق التوك توك بسرعة دون أن يتوقّف:

- اتمشأها يا بيه تحدش هيدخلك جوه؛ الشارع مدغدغ.

يقول لنفسه:

- هي الشوارع بس اللي متكسرة.. ما أنا لو أقدر أمشيها  
كنت مشيتها يا أضبش.



يتأمل المسافة المُتبقية.. ينظر إلى السماء قائلاً:

- القوّة من عندك يا رب.

يسم بالسير ولكنه يتذكر تحذير زميله له في الكافية قبل ساعتين تقريبًا ويرن صوته في أذنه:

- والله ما هدخلك البيت لو تجبت العيش معاك.

يتوقف وتبدو الحسرة على وجهه وتتلفّت حوله ثم يُحدّث نفسه:

- الله يحرقك يا سامح إنّت وديننا وأبوها في يوم واحد..  
أجيب منين عيش أنا بمنظري ده!

سار بصعوبةٍ بالغة مُنهكًا تحت أشعة الشمس باحثًا عن مُبتغاه فوجد نفسه فجأة داخل أحد الشوارع الجانبية في طريقه إلى الميدان الرئيسي الفرصة الأخيرة ليجد طلبه.. سأل المارة فدأبوه.. رأها واقفة تباع الحُبز الموضوع أمامها على منضدة بسيطة في قلب الشارع وحولها ما لا يقل عن أربعة زبائن.. استرقتته طلّتها.. سبّدة في أواخر العشرينات من عمرها.. ملامحها شامية جميلة.. شعرها أصفر مُصفّفًا بعناية وتملك عينين زرقاوين في نقاء السماء الصافية.. تُشكل ملامحها مع ملابسها البسيطة الأنيقة صورة تُشبه متكاملة لكتالوج الجمال الهادي. لما يجب أن تكون عليه كل أنثى.. قادته ساقاه إليها.. وقف أمامها مشدوّمًا.. في نفس اللحظة مرّ بجوارها رجل كبير في السن فوق دراجته ألقى عليها تحية سريعة ودودة:

- إزيك يا دكتورة؟

- منيحة يا حاج نشكر الله .

قالتها وتلاقت عيناها مع الشاب الذي يُراقبها.. تركت ما بيدها وجرت عليه في قلقٍ حقيقي وقالت وهي تنظر إلى إصاباته المتعددة:

- سلامتك.. إنت بخير؟

تلفت حوله:

- مين.. أنا!

هزت رأسها بالإيجاب وهي مُبتسمة:

- آي.

بادلها الابتسامة وقال في مرح:

- آه آه أنا زِي القرد أهو

- معافي يارب

قالتها ثم عادت لتجيب طلبات زبائنهن.. جاء دوره فأقرب

منها وقال في بساطة مُبتسماً ومُشيرًا على الكيس:

- أنا هاخذ ده.

تناوله إيّاه وتقول في ارتباك:

- أسفة كتير إنو الخبز خالص.

- لا لا طبعًا ولا يمك.. ده كفاية قوي إحنا كلنا اتنين أضلا.

ناولها قيمة الكيس وهمّ بالانصراف لكنه تردد وسألها

بفضول ظهر في صوته:

- هو حضرتك دكتورة؟ أصلي سمعت الأستاذ اللي عدى

بالعجلة ده بيناديكي بيها.

كانها كانت تنتظر السؤال حتى تتحدث.. عريف عنها كل شيء في لحظات.. اسمها (رندة). سورية معها دكتوراه في إدارة الأعمال من جامعة دمشق.. منذ أقل من عامين جاءت إلى مصر مثل آلاف وربما مئات الآلاف من الإخوة السوريين.. في البداية اضطرت أن تبيع الخبز بشكل كانت تأمل أن يكون مؤقت لكنه استمر حتى اللحظة.. سألتها مُندهشاً:

- ليه مشوفتيش شغل بشهادتك.. المؤهل بتاعك يسمح لك بكده!

ردت بابتسامة حزينة:

- بصرف النظر إن مصر قاسية على ولادا نفسن بموضوع الشغل وبالتالي راح تبقى أفسى علينا كأغراب، بحب قلبك لآتي قدمت بكذا شركة وكذا جامعة حتى أشتغل بس للأسف رفضوني لآتي سورية وفيه حساسية من ناحيتنا بعد إشاعات من ناس الله يسأخن إنه في سوريين بيعملوا إرهاب بمصر.

لم يكن يعلم أن الصورة قد تكون قائمة لهذا الحد.. صدمه الرد وألجم لسانه ولم يدر بما يرُد عليها.. سألتها باهتمام مُحاولاً تغيير دفة الحوار بعدما لاحظت تأثرها:

- ولانتي عايشة لوحدك هنا؟

أشارت بطول ذراعها إلى الخلف وقالت:

- لا معي أخسي كمال خريج هندسة.. عم يشتغل بمحل حلاقة جنبنا هون بعدنا بشارعين.

- ومبسوط في شغلها؟

تطرق برأسها في أسي وترد:

- كل كم يوم عم يقوئي إنه رفقاته المصريين بالمحل يعملوا فيه شكاوي كيدية لصاحب المحل حتى يطفشوه من الشغل مع إنه مُهذب وكافي خيره شره.

فتح فاه مُتعبجاً في دهشة وقال:

- وهما هيعملوا كده ليه؟

- صدقني ما بعرف.. أنا نفسي يا أستاذ كل يوم عم تمر لعندي ست كبيرة ببيع خُبز بعدنا بشارعين وعم تبهدلني وتدعي الله باخدني لأنني عم أخطف رزقا كيف ما بتقول وعم بيع خبز قريب من مكانها!

احمرت وجتته وشعر أن خجله يكاد يتلعه وقال بجديّة:

- أنا فعلاً مش لاقسي كلام أقولهولك.. معلش يا دكتورة.. أنا آسف بالثيابة عن ناس وعن ظروف ناس.. بس عايزك تعرفي إن كلنا أغلب من الغلب والله.

- بعرف وحياء الله.. إنتَ ما إلِك ذنب كلنا ما إلنا ذنب.. ربنا يتتقم من اللي كان السبب هنك أو هون.

تمر من أمامها فتاة شاحبة الملامح رثة الثياب لم يتعدَّ عمرها العشرين عاماً.. تلمحها رندة فتجري نحوها قائلة:

- زينب.. بكرة انشالله الموعد لحتى يحاكموا الماما صحيح؟

نومى الفتاة برأسها دون أن تنطق فترّبت رندة على كنفها في

حنان بالغ وتقول:

إنشالله الله بيسترها معنا ويتلطف فينا. -

تنصرف الفتاة وتعود رندة إلى نفس مكانها.. يُحاول الشاب  
إضفاء جو من البهجة في الحديث فيقول بمرح:

- طيب شوفي بقى أنا ساكن جديد جارك قريب هنا  
وشرفني تعتبرني زي كمال أخوكي.

- أكيد.. خلاص إنت صرت أخونا الثالث.

- يا سيدي على الرضا.. طيب مفيش أي حاجة تعوزيها من

أخوكي؟

تبسم وترد في جدية:

- ما بيدي منك إنت بالذات أخي.. لكن بيدي من إخواننا  
المصريين.. العيشة صعبة عليكين وعلينا معكن وإخوانك  
السوريين مش جايبين ياخدوا رزقك من إيدك.. ما في حدا  
ياخد رزق حدا.. الله هو يلي بيرزق.. ووجودنا هون ومع إنه  
بنص أهلنا المصريين بس عم يضغط علينا كل يوم وعم نحس  
بالغربة بسبب بعدنا عن ديارنا وأهلنا وناسنا.. منشان الله لا  
تزودوا غُربتنا غُربة فوق الغُربة.. وصدقني أخي ما في سوري  
مو موجوع وفيه بقلبه غصة على حدا من أهله أو رفقاته أو  
قرايينو.. ممن يلي مات أو يلي خاطر بحياتو وركب البحر  
ليحاول يبني مستقبله من جديد بأوروبا أو يلي مسجون أو  
مخطوف.. شوبدي أحكي؟.. بيكفي تشعر بالمرارة والخذلان لما  
تاخذ لقب لاجئ وين مارحت.. خليها على الله ومثل ميقول

الآن: خليها بالقلب تجرح ولا تطلع لبره وتفضح.. الله يصلح  
حالكن وحالنا ويؤذن الله تفك هالديقة وترجع بلدنا بلد  
الياسمين أحسن مما كانت.. الله كريم..

في هذه اللحظة تأتي طفلة صغيرة في حدود الست سنوات  
وتقول لها في براءة:

- أبله رنده ماما بتقولك عايزة عيش وهنديكي الفلوس  
بكرة.

تنظر له في أسف وقبل أن تنطق يُناول الشاب للطفلة الكيس  
الذي بيده مُبتسماً:

- خُدى يا حبيتي.

تأخذ الطفلة الكيس وتنصرف.. ترمقه بنظرة امتنان فيتسم  
وهز كتفيه في لامبالاة ويقول لها في مرح:

- أنا بشكرك على الشوية دول بجد.

- أنا اللي بشكرك أخي.. الله بيعتلك الهنا.

تركها وأنصرف وهو يشكر القدر الذي تدخل في إعداد هذا  
اللقاء وزاد يقينه أن أغل الأوقات في حياتنا تلك التي تُباغتنا  
دون أي تخطيط مُستبق.

( ٨ )

## وصل أمانة

تبادلت السيدة العجوز الواقفة خلف قُضبان القفص الحديدي نظرات حزينة مُنكسرة مع ابنتها الفتاة ذات الـ ١٨ ربيعًا الجالسة في أول صف في قاعة المحكمة.. حاولت الابنة أن تُشجع أمها بشبح ابتسامة بدا باهتًا رغماً عنها.. قبضت الأم يديها على القُضبان التي أمامها، ونظرت إلى أسفل في مَرارة.. أصابعها كانت كثيرة العقد وعليها علامات الشيخوخة.. هزمتها الزمن قبل أن يهزمها الحبس.. بدت كمن ينتظر القول الفصل في حياتها وابتها بعد لحظات.. رفعت رأسها إلى الأعلى وهممت:

- يارب.

- محكمة.

نطقها حاجب المحكمة في صرامة، أعقبها وقوف كل الحضور، ثم دخول المُستشارين الثلاثة.. جلسوا.. جلس الحضور.. نظر القاضي بشكل روتيني في الأوراق أمامه وقال أمرًا:

- نادي على القضية.

- قضية ١٨ جنح سنة ٢٠١٥.. التهمة نبوة السيد محمد  
مُختار.

ينظر القاضي بزاوية مائلة من وراء نظارته نحو القفص:

- نبوة هنا؟

السنجينة بصوتِ واهن:

- أيوا يا بيه.

مُقلِّبًا الأوراق التي أمامه يقول:

- نبوة أنا اديتك مهلة ٣ شهور عشان تسددي الفلوس اللي  
عليكي .

ترد بصوتٍ مُحْتَق:

- مقدرتش ألهم.

- ٣ شهور مقدرتيش تدبيري ٢٠٠٠ جنيه؟! .. ملكيش  
قرايب؟ .. معنديكش جيران؟ .. مفيش عفش؟

تهزر رأسها بالنفي وتنهمر دموعها على وجتها ومُجِيب:

- مفيش.

تقف الفتاة وترفع يدها وتنادي:

- بعد إذنك يا فندم.. أنا بتها.. ممكن أتكلم؟

يُشير لها القاضي أن تقترب:

- تعالي.. عايزة إيه؟



تتمالك الفتاة نفسها، ثم تستجمع شجاعته وتقول بحروفٍ  
مُرتجفة:

- من سنة أمي كتبت على نفسها وصيل بالفلوس دي؛ عشان  
تدفعلي مصاريف الجامعة.

- ده دخله إيه بالقضية.

تقاوم دموعها وترد:

- أمي تعبت كثير يا فندم، وإحنا ملناش حد غير رينا بعد  
أبويا.. أنا عايزة مُهلة ثانية وأنا هنزل أشتغل لحد ما أجيب  
الفلوس، أو لو ينفع احبسوني أنا وبلاش هي.. والنبي والنبي  
يا فندم.

أطلقت تلك الكلمات بما يوحى بأن طعمها مر في فمها  
فسألها القاضي:

- إنتي اسمك إيه؟

- زينب.

- القانون ملوش دعوة بالكلام ده يا زينب.. القانون يعني  
ورق وأمانة وحق ناس.. اتفضلي ارجعي مكانك.

تعود الفتاة في انكسار وينظر القاضي إلى الأوراق مرةً أخرى،  
ثم يرفع رأسه مُناديًا:

- لين شوادني؟

يقف أحد الحضور.. رجل في أوائل الستينيات من عمره..

يرتدي جلبابًا بلديًا فاخرًا وعمَّة ضخمة على رأسه، مع شارب  
كث يحتل معظم مساحة وجهه.. يرفع يده ويهتف:  
- أفندم.

- عندك استعداد تصبر على الست دي قد إيه؟

- ولا يوم واحد يا ييه.. أنا استعوضت ربنا خلاص في  
القرشين، بس عايز القانون ياخذ مجراه ويبيجلي حقي منها.. ده  
مال أموات يا خلق يا هو.

هز القاضي رأسه والتفت في حديث سريع مع عضوي  
اليمين واليسار، ثم قال:

- حكمت المحكمة على المتهمه فتحية بالحبس ٦ شهور.. اللي  
بعده.

فيض من الدموع انهمر على وجه زينب وهي تجتاز مساحة  
المحكمة الخارجية، وقد اسودت الدنيا أمام عينيها، وشعرت  
أن الأرض تدور تحت قدميها.. تسارعت الأفكار في عقلها  
وملات رأسها العديد من الاستفهامات حول صورة مستقبلها  
كيف ستكون.. لم تستطع أن تمحو من مخيلتها صورة أمها بالزي  
الأبيض فتمزق قلبها.. أخرجها من حالتها وقع الأقدام الذي  
ترامى إلى مسامعها يلاحقها بسرعة وقبل أن تلتفت وراءها  
ووضعت تلك اليد الثقيلة على كتفها.. توقفت.. التفت فوجدته  
حاجب المحكمة، ألقى نظرة سريعة على وجهها، ثم قال في  
سرعة:

- اجري اعلمي تسوية بسرعة، قبل ما أمك تبات في الحبس.

قالها، ثم مديده إليها بظرف أبيض متوسط.

نظرت في دهشة إلى الظرف وقالت:

- إيه ده أنا مش فاهمة حاجة!

- إنتي ليكي أكل ولا بحلقة.. روعي خلصي أمك إنتي مالك.... ولاد الحلال كثير.

- أنا مش عارفه أقول إيه والله؟.. ربنا يكرمك.. ربنا يخليك ويرزقك وي...

قاطعها:

- يا بنت يالآ قبل ما أمك تترحل على السجن.

لم تشعر بنفسها عندما طبعت قبلة على خده في سعادة، وجرت إلى داخل المحكمة مرة أخرى؛ لتبدأ في إجراءات الإفراج عن أمها.

على مسافة قريبة.. تحديدًا من نافذة غرفته مُخْتَفِيًا وراء الستارة الخضراء داكنة اللون، كان القاضي يُراقب الموقف كله.. التقت عيناه بعين الحاجب الذي هز رأسه له، وتبادلا نظرة رضا.. أطلق بعدها القاضي زفرة ارتياح، ثم ارتسمت على شفثيه ابتسامة فرحة وحرك شفثيه بكلمة (الحمد لله) بصوت غير مسموع.. شد الستارة كما كانت منذ قليل، ودخل ليوصل عمله.

( ٩ )

## لحمة بلدى

المسافة من مدخل الشارع الضيق الذي يسكن فيه وحتى باب العقار الذي يضم شقته، كانت تقريبًا ٢٠٠ مترًا.. مهمة (شريف) الثقيلة مع بداية كل شهر هي عبور تلك المسافة بأقل عدد ممكن من الخطوات والثواني، بحيث لا يلمحه المعلم (شوادفي) صاحب محل الجزارة القابعة في مُتصف تلك المسافة بالضبط.. فبغير قيمة الإيجار الشهري التي يتظرها الأخير، والتي غالبًا ما تراكم على الأول لفتراتٍ طويلة قد تصل إلى عدة أشهر، إلا أن هناك سببًا آخر لدى شريف يدفعه دومًا إلى محاولة تفادي هذا اللقاء الشهري، خصوصًا في ذلك اليوم.. كان يدعو الله أن يكون مُشغلاً مع أحد زبائنه أو غير موجود من الأساس.. توكل على الله وهمَّ بخطوات أقرب إلى العذو.. بطرف عينه ودون أن ينظر، لمحّه يجلس يُدخن الشيعة خارج المحل.. لم يكن هناك مفر من المواجهة.. مرَّ مُرعًا من أمامه، وألقى التحية عليه بارتباكٍ مُواصلًا سيره علَّه لا يتبه:

- سلامٌ عليكم يا معلم.

- أهلاً أهلاً أستاذ شريف.. استنى يا أفندي والله.

استوقفته العبارة فعاد إليه:

- أو مرني يا معلم.

- كل شهر وإنّ طيب وبخير.

فهم ما يرمي إليه، وحاول التظاهر بعدم الفهم:

- وإنّ طيب يا معلم تسلم.

- مش ناوي تنفعنا بقى يا أستاذ؟

يرد شريف بخجل:

- ما أنا لسه جايب من عندك قريب يا معلم.

- وإيه يعني؟!.. جيب تاني ما أنا مبدقش معاك في الإيجار،

وياما بقوت لك.

- تصدق وتؤمن بالله، لسه امبارح المدام جاييه لحمه من

الجمعية.

- أيوه يا أستاذ، بس لحمه الجمعية مستوردة، برازيلي وده

مش مقامك.. إنّت مقامك الدبع.

- إيه؟!

- لا مؤاخذة متأخذنيش، قصدي البلدي يُوكّل، ده كفاية

ريحته بس.. وبعدين إن مكنش أهل منطقتي هما اللي ينفعونى،

يبقى أجيب صُرفها أحسن ولا إيه؟

- لأ عندك حق يا معلم.

ينظر له شوادفي بغلظة دون أن يتحدث، فيرتبك شريف، ثم

يُواصل:

- حاضر، طب هو الكيلو الضاني عامل كام النهاردة؟

- من غير فلوس خالص.

- كتير يا معلم

- إيه؟

- آآآ قصدي ماشي اوزنلي نصن كيلو.

- يُنادي المعلم على أحد الصبية العاملين معه في المحل.

- اوزن كيلو يا يا ض يا حامد للأستاذ.

- لا كيلو كتير أنا عايز نص كيلو...

- روح لحامد هيقطملك الكيلو حتة حمرا وملبسة.. شرفت  
يا أفندي.

يُلقي عليه الجملة، ثم يعاود تدخين الشيثة بتلذذ غير مبالٍ  
بشريف الذي تورط فأخرج حافظه نقوده ليعد الأوراق القليلة  
التي استقرت داخلها في قلة حيلة، ثم يُناولها إلى الصبي في قهرٍ  
ويبدو على وجهه الأسى، ويهمس بصوتٍ خفيض:

- روح يا شيخ ربنا يهدك.

شعر بالمرارة في حلقه أثناء وقوفه في انتظار استلام كيلو  
اللحمة المُجبر على شرائها شهريًا، وظل يُفكر في كيفية مواجهة  
زوجته بحجة جديدة تُبرز لها نقص الراتب كالعادة عندما  
تسأله.. فجأة ودون مُقدمات تظهر ثلاث سيارات شرطة  
مُطلقة سارينه عالية مُخاصر المحل في سرعة.. يبيط منها عدد

من الجنود يتبعهم ضابط شرطة برتبة مُقَدِّم، يرتدي زِيَا مدنيًا  
باتجاه المحل.. يقف شوادفي مذعورًا.. تسقط الشيثة من يده..  
شريف مُتَابِعًا.. يمسح الضابط كل الموجودين بعينيه، ثم يتجه  
إلى شوادفي قائلاً:

- إنتَ صاحب المحل؟

- أيوا يا باشا تحت أمر معاليك.

يهتف الضابط مُوجِّهًا حديثه إلى العساكر:

- هاتوه، وهاتوا اللحمة المتعلقة دي وشتمعوا المحل.

يتحرك أحد العساكر نحو شوادفي ويسحبه، بينما يقوم  
الآخرون بتنفيذ باقي الأوامر وسط ارتباك ودهشة الجميع  
من سُكَّان الحارة الذين تجمَّهروا حول المكان.. ينظر شوادفي  
المسحوب من أحد العساكر إلى الضابط، ويسأله في حيرة:

- طب أفهم بس يا باشا عملت إيه؟

- امشي من سُكَّات مش عايز قلبه دماغ.

يتم إدخاله بعنف داخل إحدى سيارات الشرطة، ويقبع  
داخلها فيجري شريف نحو شوادفي قائلاً في تضرع:

- اديني فلوسي يا معلم الله يكرمك

يدفعه بقدمه ويصرخ في وجهه:

- غور أنا ناقصك وش فقر الله يحرقك.. أنا اصطبحت بوش

مين النهاردة؟

يستعيد شريف توازنه من أثر الضربة، ثم يتجه إلى الضابط

الذي يتابع تنفيذ العساكر لأوامره المطلوبة بتركيز ويقول:

- معلش يا باشا خليه يديني فلوسي.

- فلوس إيه؟

- فلوس اللحمه اللي لبسهالي.. ده لسه واخدها من شوية.

يُزيجه الضابط في عنف في صرامة قائلاً:

- اتكل على الله، بدل ما أشدك معاه.

يمسك شريف بكتف الضابط في إصرار مُتدلاً:

- طب حتى أخذ اللحمه.

يخلع الضابط نظارته وينظر له في دهشة.

- دي لحمه حمير!

- مش مشكلة أنا قابل يا باشا.. ما هو مش هيقى لا لحمه

ولا فلوس.

- امشي من هنا، إنت باين عليك مجنون إنت كمان.

يدفعه الضابط بعيداً بيده، وتضيع توسلاته في الهواء.. ينظر

إلى أعلى نحو شقته، ثم ييلع ريقه بعد أن تمر أمام عينيه كل

السيئاريوهات المتوقعة له بعد مواجهة زوجته بما حدث فيقول

مُحدّثاً نفسه:

- يا نهار اسود.



( ١٠ )

## ماتفوتنيش أنا وحدى

وصل (شريف) أمام باب منزله وأدخل المفتاح وأدار المزلاج بهدوء ودون إصدار أي صوت.. دخل.. مر على الصالة بمتهى الخفة، حتى أصبح أمام باب غرفته الموارب.. مَدَّ رأسه مُحاولاً أن يستشف وجود زوجته واستيقاظها من عدمه، لكن الظلام بالداخل صعب من الأمر، حتى فاجأ صوتها من خلفه:

- حمد الله على السلامة يا بيه.

انتفض والتفت وراءه بسرعة، ثم قال وعلى وجهه ابتسامة مُفتعلة:

- الله يسلمك.. إزيك يا علا؟

تُشير إلى باب الغرفة وراءه:

- خُش عايزاك.

- امتر ياللي بتستر.

يدخلان إلى الغرفة، يجلس على حافة السرير وتقف أمامه عاقدة كفيها خلف ظهرها مُتحدثة بعصية:

- شرفت المُصيبة اللي إحنا فيها؟

- مُصيبة إيه كفا الله الشرا

- ابنك بيحب.

يرد في سرعة:

- كويس والله، طلع أجدع من أبوه.

- كويس إيه!.. هو أنا بقولك طلع الأول في مدرسته؟!..

ابنك عنده ٩ سنين.

- ما هو الحُب ملوش سن يا حبيبي.

تشير بيدها في تهديد قاتلة:

- شريف..

ينكمش في مكانه ويرد:

- طب ممكن تهدي وتفهميني.. إنتي عرفتي إزاي؟

- سمعته بيتكلم عنها مع صاحبه في التلفون.

- بيقول إيه يعني؟

تُحاول تذكُر الكلمات:

- بكره هقولها، آخر فرصة، نهى.. طرايطيش كلام مقدرتش

أسمع كويس.. مش فاكرة بس إحنا قدام مُصيبة.

يخلع حذاءه، ويهم بخلع بنتاله قاتلاً بهدوء:

- لا مُصيبة ولا حاجة إنتي بس اللي مكبرة الموضوع.

- اسمع بص بقولك إيه.. من قبل جوازنا وإحنا متفقين

هنسهر ابنتا إزاي.. دخلناه مدرسة أجنبية واكله كل فلوسنا أول

بأول.. تحويشة العمر وورثي من أبابا وتمن...

يُقاطِعها في رَتابة:

- وتمن حِمة الأرض بتاعتي في البلد والعريبة اللي اتباعنت  
ويتمنها كملنا عشان مصاريف مدرسته والذهب بتاعك اللي  
طار كله.. حافظ كل الكلام اللي هتقوليه يا عُلا.

- وباريت تحفظ كمان إن أنا مَعنديش أي استعداد أخلي  
الولد يضيع مننا بعد ده كله، فَيَا تقوم بدورك كأب زي الناس،  
يا إِمّا والمصحف هسبب لك البيت.

يقف مُستكينًا ويقول في هدوء:

- خلاص.. أنا هعملك اللي يريحك.. إنتي عايزة إيه  
دلوقتي؟

- تخشله حالًا وتكلم معاه وتخليه يحكيلك وتيجي تحكي لي  
وتعرفلي أصل القصة دي.. الواد هيبصع مننا.

- أخليه يحكي لي غصب عنه يعني؟!!

- لا متخفش إنت مدلعه وهيحكيلك.. مش إنت مبيعجبكش  
أسلوب معاه، خلاص شوفلك صرفة، وإلّا والله هدخل أكرلك  
دماغه.

- الفكرة إني مش شايف الحكاية مستاهلة أساسًا و...

تقاطعه بحدّة:

- شريف.. أنا روجي في مناخيري.

- حاضر حاضر.

يقولها في ضعف ثم يخرج من الغرفة متحركًا نحو باب غرفة  
ابنه، ويقف أمامها ولا يدخل.. يتردد.. يعود مرة أخرى.. تُبادره  
ويدها في وسطها والغضب يتطاير من عينيها.

- مَدخلتش ورجعت ليه؟

- بصراحة؟

- بصراحة.

- من غير زعيق ولا شخط.

- من غير زعيق انجز.

- مش قنادر ومش مقتنع.. دي مرحلة طبيعية في حياته يا

عُلا.. أي محاولة منا إننا نخنقه هتجيب أثر عكسي معاه.

- يعني هنسيبه؟

يُجلسها بيده على السرير، ويجلس بجوارها ويُجيبها وهو ينظر

إلى عينيها مباشرة:

- هنخليه يجرب وهتابع من بعيد ووقت اللزوم لما يحتاجنا

فعلًا هيلاقينا فوق راسه.

- ولو اتكعبل وغلط؟

يواصل في حماس، وقد رأى بوادر الاقتناع تظهر عليها:

- وإحنا رحنافين؟.. إنتي من ناحية وأنا من ناحية

هنحارطه، ومش هينحصل أي قلق من البلي في دماغك وبعدين

إحنا مرينه كويس.

تبخر عصيتها شيئًا فشيئًا، وهي تفكر في كلامه.. يُمدد

جسده على السرير واضعاً رأسه على حجرها كما اعتاد دوماً..  
كانت تُعامله كابن ثانٍ لها مع طارق ابنيها، وكان يشعر بذلك..  
لم تكن ترى في ضعفه أمامها إلا طيبة، ولم يُنقص قدره أو رجولته  
عندما تقبله الدائم لعصبيتها.. داعبت شعره بأصابعها وزينت  
وجهها ابتسامة رغماً عنها عندما رآته يُغمض عينيه، وتأملت  
ملامح وجهه وخُيِّل لها أنها تراه يضحك.. سألته بدهشة:

- بتضحك على إيه؟

اتسعت ضحكته أكثر وقال:

- الواد كبر قوي.. يبجب!

- زمان كانت أكثر حاجة بنخاف عليه منها تعويرة في الركبة  
ولا خدش في رأسه ولا سِنَّة أتكسرت دلوقتي بقينا خايفين لقلبه  
يتكسر.

- حتى خوفنا عليه بيكبر معاه.

توافقته بسلياءة من رأسها.. لحظة ثم ترفع رأسه قليلاً برفق  
وتضع تحتها وسادة وتقول في حنان:

- قوم يالآ غير هدومك عُقبال ما أجهزلك الأكل.

تتحرك للخروج.. تقف وتنظر ورائها، ثم تذكر شيئاً:

- آه صحيح.. حبيبي مَتَسَاش تسيب فلوس على الكومودينو،  
عشان أم كرم هتيجي تاخذ الجمعية النهاردة.

يعتدل في جلسته في توتر مشوب بالقلق كمن أفاق من  
كابوس.

- الفلوس .. آه .

- مالك؟!

- من غير زعيق؟

تبدل ملاحظتها للغضب مرة أخرى وتنتف:

- المعلم زفت عملها فيك تاني صبح؟

يومئ برأسه إيجاباً، ثم يضع رأسه خلف المخدة ويقول:

- بس إيه بقى .. بتسوع التموين جُرم وجرجروه على ملاوشه  
وكان فُرجة .

لطمت زوجته على وجهها ورأسها صائحة:

- يا مصييتي السوداء يا خييتي الثقيلة اللي مَوردتس على

حد، أعمل إينه فيك بس يا ربي أعمل إيه؟

يرفع رأسه في مرح طفولي ويهتف من وراء المخدة:

- مش كتي طالعه تعمل الأكل .. اتكلي على الله .

- إنت بتغيظني يعني .. والله ما هسيك؟

تقولها، ثم تُمسك بالمخدة الأخرى وتُلقيها عليه .. يتفادها  
ويُلقي بمخدته على وجهها فيصيبها .. تصرخ في وجهه، وهي  
تقف على الجهة المُقابلة من السرير، باحثة عن شيء آخر تُلقيه  
عليه:

- هنكمل الشهر إزاي؟

ضاحكًا:

- مش عارف .

- هناكل منين وهنصرف إزاي؟

يرتفع صوته بالضحك أكثر:

- والله ما عارف.

تتقل إليها عدوى الضحك التي انتابتة وتواصل مطاردته

وهي تهتف:

- وأنا والله ما هسيك.

يدخل ابنيها عليهما الغرفة فجأة في تلك اللحظة وينظر إليهما

في صمت لحظة، ثم يتحدث:

- بابا.. ماما.. ممكن لو سمحتم تبطلوا حركات العيال

بتاعتكم دي شوية عشان أنا مشغول بموضوع مهم.. ممكن؟

يقولها، ثم يخرج فينظران إلى بعضهما البعض ويواصلان

الضحك.

( ١١ )

## لطفة حب

كعادة أغلب الأطفال الذين يطلقون العنان لقلوبهم الصغيرة لتحلّق في أجواء الرومانسية الغضة وبمعايير طفل لم يتجاوز التاسعة من عمره بعد. وجد (طارق) طالب الصف الرابع الابتدائي في (نهي) فتاة أحلامه!.. ابتسامتها الرقيقة، دَرَّاجَتِهَا القُرْمِزِيَّة الصغيرة، وكرمها التمثيل في أطنان الحلوى التي تُخفيها يومياً في حقيبتها الصغيرة، وتوزّع منها على كل من تُقابله بطيب خاطر، كلها عناصر كانت كفيلاً بإقناعه أنه وجد نصفه الثاني.. رغم وجود كل منهما في فصل مختلف، إلا أنه اعتاد أن يراها يومياً.. دوماً كان يجد حجة ما ليفتح معها حديثاً وشرعان ما ينتهي قبل أن يبدأ.. أحبها وبقي أن يعترف لها.. عندما قرر أن يسبح بما يعتمل في نفسه، كان دوماً يفشل في الانفراد بها ليُلقيها على مسامعها، فهي مُحاطة دوماً بزميلاتها.. تأخرت الفرصة كثيراً حتى جاءت في إجازة مُنتصف العام، وعندما شارف (طارق) أن يفقد الأمل نهائياً.. وقتها وقف بطريقة استعراضية وفخر على أحد كرامبي غرفة صديقه (لؤي) أثناء زيارته قائلاً:



- المسرح.

نظر لؤي إليه، وقال في دهشة:

- مسرح إيه؟

نزل من فوق الكرسي وهتف في حماس:

- مدرستنا اشتركت في مسابقة المسرح بتاعت المدارس، ونُهي

في فريق التمثيل.

- أيوه، وانتَ مالك بقى!

- دا إنتَ غبي قوي... هاشترك.

- إنتَ بتعرف تمثّل؟!

- متعرفش بس هخس.

- يا ابن الإيه..

اشتركت مدرستهما في مسابقة العروض المسرحية على مستوى المحافظة.. نُهي عُضوة في فريق التمثيل.. ببعض الإلحاح على مسئول المسرح بالمدرسة انضم طارق أيضًا إلى الفريق المسرحي.. قصة المسرحية الغنائية تدور حول فريق من الملائكة يمثلهم مجموعة من ٨ بنات يرتدين فساتين بيضاء على ظهورهن أجنحة بيضاء مع مجموعة من ٨ أولاد كل واحد منهم يمثل دولة عربية مختلفة مُرتديًا الزي الرسمي الخاص بها.. كل بنت تخرج من الكواليس مُسكّة في يدها ولدًا.. يظهر الثنائي على المسرح.. تتركه البنت وتدخل إلى الكواليس.. يقف الولد

في مُتصف المسرح ليُلقي أبياتاً شعرية مُعبّرة عن دولته، وبعد انتهائه تعود البنت من الكواليس لاصطحابه مرّة أخرى إلى الداخل.. حتى الآن تبدو الأمور بسيطة سلسلة ومُهَيّأة كي يجد اللحظة التي يُنقذ فيها ما يحلم به، حتى ظهرت مشكلة أخرى كانت موجودة من البداية، ولكنه لم يتبه إليها إلا قبل العرض بيوم واحد فقط.

- مشكلة إيه تاني؟

نطقها صديقه الصدوق وكاتم أسرارهِ عبر الهاتف بتعجب، فأجابه طارق هامساً:

- ئهى مش هتمسك إيدي أنا.. هتمسك إيدي وليد.

- إزاي؟

- أنا واخذ دور السعوديه وهتشدني هالة.. وئهى هتشد وليد اللي واخذ دور البحرين.

- البت هالة تختخ الوحشة دي؟

- آه فاكرها؟.. اللي شوفتها معايا في الدرس قبل كده.

- أيوه عارفها.. طب ما تبدلوا؟

- أنا عمادي بستن مِينفَعش.. بس المس نيفين مظبطانا كده ومش هترضى.

- قول لوليد بينك وبينه.

- عيل غلس ورخم ومش بحبه.

- طيب متعمل إيه؟

- أنا بقولك عشان تسألني؟! .. ما تفكر معايا.

لم يحصل على إجابة شافية من صديقه، فأهى المكالمة، وظل طوال الليل يتقلب فوق سريره كالمحموم يعصر نغمة للعشور على حل.. قبل الفجر بلحظات هداه تفكيره الشيطاني إلى حيلة لن تكلفه إلا ورقة كراسة وقلم رصاص.. قفز على قدميه وجلس فوق مكتبه، ثم أمسك بورقة وخط فوقها.. في اليوم التالي يوم العرض المسرحي وقبله بساعة تقريباً وأثناء استعداد الأطفال خلف الكواليس للعرض توارى طارق عن نظر وليد صديقه، وتوجه مُتصنفاً الخجل نحو هالة مُعطياً إيّاها ورقة صغيرة مطوية:

- وليد باعتلك دي.

- بجد؟!

تخطف الفتاة الورقة بلهفةٍ وتفتحها، ثم تقرأ السطر القصير الوحيد المكتوب فيها (هالة أنا بحبك من زمان أوي.. وليد). كاد قلب المسكينة أن يقفز خارج صدرها من فرط سعادتها، ولم تجد إلا حروفاً مُضطربة تخرج من فمها الصغير أمام طارق:

- ده بجد؟! .. ده بجد؟!

أوما طارق برأسه إيجاباً مُبتسماً فواصلت المسكينة:

- أنا مش عارفه أععمل إيه دلوقتي؟

مال على أذنيها هامًا وكأنه يبوح لها بسرٍ خطير:

- هو مستيكي، وأنا اتفقت معاه إنك تطلعي على المسرح بدل تُهي.

- بس أنا هتكسف.

- هو يتكسف أكثر منك.. متخافيش مُحدش هياخد باله والله.

كانت كلماته كالسحر، وبدت مُقتنعة بها أو لعلها أرادت أن تقتنع.. حتى بدأت المسرحية وجاء دور وليد وُهي.. اقتربت من نيفين مُشرفة العرض المسرحي من الطلّبة في الكواليس تبدو أمارات العصية على وجهها وهتفت:

- يالآ بسرعة اجهزوا.. أول دولة تدخل المزيكا بدأت.

بُمتهى الهيام تحرّكت هالة وهي تُرفرف بأجنحتها الاصطناعية وتدبُّ بقدميها الثقيلتين بقوة على أرض، ومرّت بنُهي فأزاحتها من طريقها، ثم جرت ناحية وليد وسجته نحو المسرح وسط اندهاشه وعدم استيعابه لما يجري صارخًا:

- إيه ده عايزة إيه!.. سييني سييني.

لم تفلح مُحاولاته في الإفلات من قبضتها الحديدية، وخرجت به رغماً عنه إلى المسرح، وباقى الشباب غارقون في موجة من الضحك في الكواليس.. وقف وليد في مُتصف المسرح قائمًا ومازال لم يفق من صدمته، وتثقل بصره بين النظرة البلهاء المرسومة على وجه هالة وبين الجمهور، ثم انتبه فجأة لموقفه

وألقى أبيات الشعر الخاصة به في ارتباك، وبعد أن انتهى لاحظ أن هالة تتجه إليه مرةً أخرى، فجرى ناحية الكواليس وهي وراءه.. استدعت حالة المهرج والمرج الخارجة عن السيطرة تلك تحرك مديرة المدرسة من مقاعد المتفرجين إلى ما وراء الكواليس بحثًا عن مس نيفين وعندما وجدتها ارتعدت الأخيرة فقالت لها الأولى:

- مس نيفين إيه التهريج اللي حاصل ده؟

- يا فندم مش عارفة الولاد اتجننوا دول ولا إيه!

- تمام.. ولحد ما تعرفي حضرتك غصوم منك ٥ أيام بصفتك مسئولة عن النشاط ده.

- ما هو يا فندم ما ينفع....

لم تستمع المديرة إلى باقي عبارتها وانصرفت عائدة إلى مقعدها فنظرت نيفين بغضب إلى باقي الأطفال صارخة:

- جنتوني هو أنا ناقصة.

وسط كل هذه الدريكة وانشغال الكل بمتابعة المطاردة بين وليد وهالة ثم دخول المديرة وحديثها العنيف مع نيفين، كان هناك شخص واحد فقط مُتَبِّهاً، مُتَيْقِظاً ومُتَرَقِّباً للحظة الحسم.. طارق.. جرى ناحية نُهى ومدَّ لها يده، وهي مدَّت يدها له ولم تشعر بأي شيء غير طبيعي.. وقفوا في نصف المسرح وحاولت ترك يده لتدخل حتى انتهائه، لكنه ظلَّ مُتَشَبِّهاً بيدها في قوة..

صُدمت الفتاة.. حاولت مرّةً واثنين لكنها فشلت فاستسلمت  
للوضع رافعةً حاجبيها في دهشةٍ.. أمّا هو فقد أراد أن يواجه  
الناس وهي معه.. شعر أنه يُخلّق عالمًا، ويلمس برأسه الصغير  
السماء، وانفصل عن الواقع تمامًا، ثم ألقى آيات الشعر بمُتهى  
الاندماج.. كان أفضل طفل ألقى الشعر يومها.. وبعد أن انتهى  
ضجّت القاعة بالتصفيق الحاد له فرفع يده وأشار لنهى مُوجِّهاً  
الناس لتحياتها أيضًا ففعلوا!.. انحنيا أمام الجمهور، وفي تلك  
اللحظة أثناء الانحناء أدار رأسه بسرعة خاطفة وألقاها نحوها:

- بحبك.

نظرت له نهي غير مُصدّقة، وجحظت عيناها في ذهولٍ قبل  
أن تضحك وتُغطي فمها بيدها، ثم تفلت يده وتجري في سرعةٍ  
إلى الكواليس.

( ١٢ )

## بوكيه ورر

- اسمع يا ابني منك له.. بالطول بالعرض تشوفولي حل في أم المشكلة دي.. أنا عمري ما قصرت مع حد منكم في أي حاجة.

قالها (كيرلس) أمام صديقهاه مصطفى واثامر.. ثلاثة أصدقاء.. مُسلمان ومسيحي.. لم يتجاوزوا مُنتصف العشرينات بعد... بحكم العشرة إخوة إن جاز التعبير وبحكم الطباع شياطين إن أردت الدقة.. اختلف كيرلس مع خطيبته نيفين خلافاً حاداً أو شك أن يعصف بالعلاقة.. حتى عندما حاول بالأمس القريب أن يزورها أثناء عرض المسرحية المدرسية التي تُشرف عليها بآاءت مُحاولته بالفشل الذريع وكانت عصبية جداً في ذلك اليوم لسبب لم يفهمه. وتقريباً طردته.. أعادت له الدبلة مع تحذير صريح منها بعدم محاولة إعادة الميناه إلى مجاريها لأن (اللي بينا انتهى خلاص) كما قالت.. لم يجد إلا صديقهاه وشريكا كل لحظات الجنان ليلجأ لهما.. بعد لحظات قليلة من التفكير طرّقع مصطفى إصبعه الإبهام والوسطى وقال بحماس:

- العيد بتاعكم بكرة ما تروح لها وتصلحها في الكنيسة

وانتوا بتعيّدوا هتفاجئ بيك وهتبتسط وهتكسف ترفض.  
نبتت الفكرة في ذهن مصطفى وأعجبت كيرلس وأيدها تامر..  
لكن كيرلس اشترط وجودهما معه كنوع من الدعم النفسي  
وتحسباً لأي رد فعل غير متوقع من خطيبته قد يُجرجه.

- أنت عيبط يا كيرلس.. كنيسة إيه اللي نروحها دا إحنا  
بنصلي الجمعة بالعافية.

قالها تامر باستنكار لكن لم يستغرق كيرلس وقتاً كثيراً  
ليُقنعها بضرورة مُساندته في أزمته.. ذهبوا وحتى تكتمل الصورة  
استوقفهم مصطفى عند باب الكنيسة مُوجهاً كلامه إلى تامر:

- هيخش يصالحها بإيده فاضية كده؟

يرد:

- المفروض لا وش.

يبحث مصطفى حوله فيجد محلاً للزهور بجوار الكنيسة  
فيشير لها أن يتبعها.. يدخلوا ويتحدث مع عامل المحل:

- والنبي يا برنس عايزين بوكيه ورد حاجة كده آخر جتلة  
عشان معانا واحد رايح يصالح خطيبته بس بسرعة.

كانت أول مرّة تطأ أقدامها كنيسة.. بمُجرد الدخول جلس  
الثلاثة في الصف الرابع.. لمحوا نيفين تجلس في الصف الأول  
بجوار أسرتها.. تسلل كيرلس إلى مكانها وجلس بجوارها..  
فوجئت به.. ارتبكت.. نظرت له نظرة عتاب لم تستغرق ثوانٍ  
ثم التفتت وراءها فلاحظت وجود أصدقاء خطيبها فابتسمت..  
عندما عادت يبصرها إليه فوجئت به يُخرج بوكيه الورد المُخبأ  
خلف ظهره فزاد خجلها.. أمسك بيدها وأخرج الدبلة من



جيبه وهمّ بإلباسها لها.. كان يبدو أن الأمور تسير نحو الأفضل بأسرع مما توقعوا.. بدأت أصوات الترانيم تملو تدريجيًا.. لم يستطع مصطفى وتامر استخلاص ما يُقال بالضبط لكنهما أحسًا بحالة روحانية عمّت على المكان مع جزء من السلام النفسي الداخلي لأنهما كانا سببًا في فرحة ضلع المثلث الثالث.

فجأة وبدون مُقدمات وقف الحضور في كل الصفوف وبدأ أن فاعلية ما ستحدث.. لحظة وفوجئوا بقس الكنيسة يقف في مُتصف القاعة أمام المنصة مباشرة ويده علبة متوسطة الحجم وضعها على منضدة بجواره.. اضطر الجميع أن يقفوا.. التهمّ تامر ومصطفى الصفوف بأعينهما بحثًا عن كيرلس ولكنه كان قد اختفى تمامًا.. أصبح إزائمًا عليهما وحتى لا يبدو موقفهما شاذًا أن يتصرّفا من أنفسهما فاضطرا للوقوف في صفوف الحضور التي بدأت في التوجه إلى مكان وقوف القس تبعًا.. اضطرا للتحرك معهم وهم لا يعرفون ماذا سيحدث.. كان تامر يسبق مصطفى في الدور مما أتاح له أن يلمح ما كان يجري.. كان القس يُهدى كل من يقف أمامه صليبا صغيرا لونه فضي.. جاء دورهما فأخذ كل منهما صليب ثم عادا لمكانيهما وتنفسا الصعداء.

غمز مصطفى لـ تامر بعينه قائلاً:

- إيه رأيك؟

سأل تامر غير مُستوعبًا:

- إيه رأيي في إيه؟

بدأ عليه الضيق من عدم استيعاب صديقه فأجابهُ مُسكًا بالصليب أمام وجهه هامسًا:

- ده صليب فقة ومتهيألي كده عادي ومفيهاش حاجة لو  
روحنا وأخذنا تاني.

استنكر تامر الفكرة ورفضها بعد أن فهم ما يرمى إليه..  
حاول إثناؤه ولكنه رفض.. أعجبت مصطفى التجربة وكررها  
مرة ثانية وثالثة وفي كل مرة كان يُغريه النجاح أكثر فأكثر..  
تشجع.. كررها للمرة الرابعة ووقف في الطابور مُتظرًا دوره.. في  
تلك اللحظة عاد كيرلس إلى مكانه بجوار تامر ولم يكن يدري  
بكل ما يحدث.. رَيتَ كيرلس على كنف تامر وعلى وجهه  
ابتسامة ارتياح وقال:

- خلاص صالحتها.

كتم تامر ضحكته وهو يرد عليه بعد نظرة خاطفة لمصطفى  
الواقف في الصف:

- هو فعلاً خلاص.

لم يفهم كيرلس قصده في البداية لكن نظرة واحدة منه لمكان  
مصطفى الفارغ جوارهما ثم نظرة إلى الطابور جعلته يستوعب  
الأمر فصرخ:

- الله يخرب بيوتكم هتودوني في داهية.

في تلك اللحظة كان مصطفى قد وصل أمام القس وبالفعل  
همم بإعطائه صليبا رابعاً لكنه انتبه في اللحظة الأخيرة ونظر إليه  
بدهشة وسأله مُعجباً:

- الله!.. إنتَ يا ابني مش أخذت من شوية؟

أجاب مصطفى بسرعة وتلقائية:

- مين؟ أنا؟ لا والمصحف.

( ١٣ )

## إيد بطالة

في المترو، وبمجرد انغلاق باب انجبه الشاب بقوة الدفع الذاتي للكُتْل البشرية المُحيطة به من كل جانب نحو الباب المُقابل المُغلق.. استند عليه واستقر.. تحرك المترو ورغم إنه يحفظها عن ظهر قلب، إلا أن الشاب نظر في تملُّل إلى اللوحة الموجودة فوقه؛ ليحسب عدد المحطات المتبقية، فأطلق زفرة حارة من أعماقه كانت مُحمّلة بتعب ٩ ساعات عمل مُتواصل انتهى منها للتو قضاها كاملة بدون أي لحظة راحة في محل الزهور الذي يعمل به. فالיום هو عيد الأقباط والمحل يقع بجوار الكنيسة مُباشرة فكان الإقبال عليهم غير تقليدي، مُقبلاً على ٩ ساعات شاقة أخرى لعمل ثاني في طريقه إليه يتخللها ساعة راحة واحدة فقط يقضيها في الطريق من هنا إلى هناك عبر المترو.. لحظات ولّفت نظره شاب أسمر يقف في هدوء على مفاة قرينة منه يدس يده بانسيابية في حقيبة سيدة واقفة بجواره.. تلاقى أعينهما هو والشاب الآخر.. ارتبك الثاني بمُجرد رؤية الأول وبدأ أن بينهما معرفة سابقة.. سحب الأسمر يده الفارغة

من الحقيقة بنفس الخفة، ثم شقَّ طريقه واتجه إلى الشاب الأول،  
حتى وصل إليه وقال في خجل:

- لا مؤاخذه يا كبير.

ابتسم وردَّ عليه:

- إزيك يا كوارشي؟

- نحمله.

- إنت ماسك خط المترو دلوقتي؟

يُخرج الثاني علبة السجائر من جيب قميصه العلوي ويسحب  
واحدة يعزم عليه بها في ودٍ حقيقي:

- هنعمل إيه بس.. أكل العيش يا كبير هو أنا اللي هقولك.

يرد الأول يده قائلاً:

- هي هريانة منك خالص كده؟.. السجاير ممنوعة في المترو.

يتبته الثاني ويُغمغم قائلاً:

- آه لا مؤاخذه نسيت.

يضع العلبة مرّة أخرى في جيبه ويواصل بحماس:

- والله واحشني وواحش الكار كله.. لسه كنا في سيرتك أنا

وعرفة من قيمة كام يوم بنقول فين أيام أبو علي وإيده اللي

تلف في حرير والدماع الأملطات وال....

يقاطعه الشاب في حَسَم:

- ملوش لزوم.. حدوتة واتقلت خلاص.

يستقبل كوارشي العبارة السابقة في خيبة أمل، ثم يستعيد

حماسه ويهمس في أذن الشاب:

- طب حيث كده ماتدي أخوك كده كام زتونة من راسك  
المتكلفة تنفعه ويمشي بيها في الأيام السوداء دي  
يرد بسرعة:

- بطل النهارده قبل بكرة وشوفلك شغلانة شريفة.. مش  
لازم تتلسع عشان ترتجع.

- الله الله.. إيه كلام المسلسلات ده.

- أنا عايز مصلحتك وبجيلك من الآخر.

- ملكش فيه يا زميلي وإن كان على الواجب بتاعك مردودك  
قريب.. أنا ابن أصول ومتكرش الجميل.

همم بالتحرك مُبتعدًا بعد أن قال العبارة السابقة، لكن الشاب  
أمسك يده واستوقفه قائلاً:

- مُصمم يعني؟

يُقلت الثاني بده منه، ويقول بصوتٍ خافت ساخر وفي لهجة  
استفزازية:

- ماقولتلك ملكش فيه.. أنا كده وهفضل كده.. ويعدين  
إنْت إيدك بقت ناعمة كده ليه يا أبو علي؟.. باين إنك خدت  
على الركنة.. إلّا قولي صحيح بتكسب حلو شغلانة بياع الورد  
دي؟

يتسم الشاب في سُخرية:

- هدي خُلقك بس.. أنا كنت بنكشك.

- يعني إيه؟

- كنت بتأكد إنك مش خفيف.. هات رقمك هعوزك معايا  
في مصلحة قريب.

يقول بحماس:

- فُل عليك أهو هو ده الكلام يا برنجي.. اكتب عندك  
( ١١٠ ..... )

يُخرج الشاب الأول موبايله من جيبه ويمر على الأسماء  
المُجلة عنده في الهاتف بسرعة، حتى يقف أمام اسم ورقم  
المرء فلان الفلاني ويُعليه لـ (كوارشي).

- ودي نمرقي يا برنس.

- قشطة عليك.

- سجلها بقى وكلمني ضروري النهارده بالليل، بس بعد  
الساعة ٢، عشان أكون وصلت النيت ونعرف نتكلم على  
رواقه.. أنا بسهر متقلقش.. رنّ عليّا لحد ما أرد.

- حصل يا كبير.

بعد أن ودّع كوارشي، ينزل الشاب بعد عدة محطات تالية  
بمفرده، وعلى وجهه ابتسامة قائلاً بصوتٍ لم يسمعه إلا هو:  
- بالهنا والشفاء.. إيس.

هَمَّ بالتحرك وبحركة اعتيادية تَمَسَّ جيب بنطاله الخلفي  
فوجده خاليًا من محفظته.. تَسَمَّر للحظة.. فأدرك ما حدث..  
ضرب كفيه ببعضهما وهتف بصوتٍ عالٍ لم يلبث أن تحول إلى  
ضحكة مُجلجلة تردد صداها في رُدهات المحطة كلها:

- يا ابن الكاااااالب.

( ١٤ )

## زحمة

كان الوقت قد قارب مُتصِف الليل أو بعدها قليلاً.. الحركة هادئة أو شبه مُنعذمة داخل ردهة تلك المستشفى الخاصة.. تجلس (ناهد) موظفة الاستقبال على مكتبها خلف اللوح الزجاجي الفاصل بينها وبين الجمهور.. يظهر (حسن) سائق سيارة إسعاف المستشفى أمامها.. تُشير له أن يدخل إليها الغرفة عبر الباب الجانبي.. يدخل.. يسحب كرسيًا ويجلس بجوارها.. تنظر إلى وجهه المُتجهم، فتسأله:

- مالك؟.. فيك إيه؟

- ماليش..

- أستاذ منير سأل عليك..

- وقولتله إيه؟

- قولتله إنك استلمت من شوقي، ورحت تجيب عشا..

مُشيرًا بيده في ضجر:

- يغور يلعن أبو شكله..

- خلّني أنا كده أفضل أداري وألم وراك.

يقف ويهمّ بالانصراف مُحذراً ويقول:

- بت!.. هقوم أمشي.. أنا مش ناقص.

تمسك بذراعه ليجلس، وتقول مُعاتبه:

- والنبى إيه!.. هر خدوهم بالصوت قبل ما يغلبوكم!..

جاي متأخر وكلمتك امبارح مردتش عليا ليه؟

يُلقي بجسده على الكرسي مرّة أخرى، ثم يُغمض عينيه في

إرهاق واضح:

- أنا هسب الشغل الثاني.. مش قادر أوصل خلاص.

- ما قولتلك.. معلش.

- إنسي كتتي صبح.. ١٨ ساعة كل يوم ما بين هنا وهناك،

جمل محدش يقدر عليه.

تحنّض كفه بيديها وتبتسم قائلة:

- اعمل اللي تشوفه كويس وهيرجحك.

يُربت على يدها برفق ويتجه نحو الباب قائلاً:

- هروح ألبس اليونيفورم وأقعد في العربية.

- مش ناسي حاجة؟

يُستوقفهُ سؤالها، فينظر إليها مُتسانلاً.. تقطب حاجبيها

بغضب وتشير إلى التيجة المُعلقة على الحائط خلفها:

- النهاردة ١ يناير.. أول يوم في السنة يا أستاذ.



فَهِم ما تَرْمِي إليه فنظر إلى السقف، وغمغم قائلاً:  
- آه.. الموال إياه.

- يا حسن أنا وأمي لَمَحْنَا لأبويَا أكثرَ من مرّةٍ وشكّلي بقى  
نيلة.

- هو أبوكي هيطير؟! .. أنا قولتلك مَقدرش أحش بيوت  
الناس يا بنت الناس إلّا وأنا متأمّن.. مَقدرش أبهدلك معايًا.  
- وأنا رديت عليك وقولتلك أنا راضية وموافقة، حتى لو  
هنعيش على حصيرة.

- أنتي تقولي زي ما أنتي عايزة، لكن مين يقبل؟

- الجواز مش محتاج غير مطرح يلمنّا وبطاقة.. والمطرح  
موجود.. إيه بقى مَعكش بطاقة؟

يتسم بسخرية، وقد تذكر ما حدث له منذ قليل فيقول:

- إنتي بتقولي فيها.. المحفظة اتلطشت في المِثرو.

- أهو هيدخل الهزار في الجدد.

- ما بهرزش والله ده.....

يقطع حديثهما صوت طفل صغير تظهر رأسه بصعوبة خلف  
اللوح الزجاجي:.

- عايز عربية إسعاف بسرعة تيجي معايًا تجيب ماما.

تعتدل ناهد في جلستها وتنظر إلى أسفل حيث مصدر  
الصوت، فتجد طفلًا لا يزيد عمره عن ١٢ عامًا غطت الدموع

وجهه ونصيب عرقاً غزيراً.. يلهث في سرعة حتى تُخبل إليها  
أنا نسمع صوت دقات قلبه من مكانها.. ردت في روتينية:  
- عندها إيه؟

يُجيب الطفل بكلماتٍ غير مُرتبة ومن وسط دموعه:  
- هي عيانة من زمان، ولما رجعت من الدرس لقيتها مش  
عارفة تاخذ نفسها ولا تتكلم.

- ساكنين فين؟  
بمسك صدره في ألمٍ وما زال يلهث، ثم يقول بصوتٍ مُتهدج:  
- في شارع حسن محمد.

تواصل ناهد بنفس الروتينية:  
- أجرة عربية الإسعاف عشان تطلع معاك ٢٥٠ جنيه.  
صدمته الجملة السابقة، فارتبك وقال:

- أنا مش معايا فلوس دلوقتي، بس عمي هيوصل بكرة  
وهيديكم اللي انتم عاوزينه.  
- مش هينفع يا حبيبي.

بصرخ في وجهها بمُتهى القوة:  
- يعني إيه مش هينفع إيه؟  
ردت عليه:

- مَترَعَش.. مش هينفع يعني مش هينفع، مَفِيش عربية  
بتطلع يا بابا إلا لما تدفع الأجرة بتاعتها الأول.. فهمت؟

نظقتها في قسوة اعتادت عليها يومياً، ثم التفت لتواصل حديثها مرة أخرى مع حسن الذي كان يتابع الموقف بأكمله، لكنها وجدته ليس مُتَبَّهاً لها، بل للطفل:

- استنى ماتميشش.. أنا جاي معاك.

نظقتها حسن في حسم، فنظرت إليه ناهد في ذهول وقالت:

- رايح معاه فين إنت اتجننت؟!

تجاهلها وواصل حديثه مع الطفل:

- شايف عربية الإسعاف اللي واقفة برّه دي.. استتاني عندها وأنا هجيب المفاتيح ولحظة وجايلك.

تهللت أسارير الطفل، وجرى إلى الخارج، وتحرك حسن نحو الداخل فنادته ناهد:

- حسن!

قال بصرامة:

- الدنيا مش هتطير يا ناهد نكمل كلامنا بعدين.. فيه واحدة بتموت.

ردت في خجل:

- مش قصدي.. أقصد لو أستاذ منير لقاك خرجت بالعربية من غير ما نطلع وصل بال....

يقاطعها وهو يشيح بيده غير مهتم:

- ملعون أبوه.. إبقى خليه يخصمهم من مرتبي.

قالها، ثم تحرك.. نظرت إليه في هيام وتابعت حتى اختفى،  
ثم تمت بصوتٍ خفيضٍ بينها وبين نفسها:  
- هو أنا بموت فيك من شوية.

لم يستغرق زمن الوصول للمنزل مع مهمة إنزال والدة الطفل  
من الدور الأول وحملها في السيارة أكثر من نصف ساعة.. فما  
كان يُدركه حسن جيدًا كسائق مُحَنَّك أن الأزمة كلها تكمن في  
طريق العودة إلى المستشفى مرّة أخرى على الرغم من أن المسافة  
لا تتجاوز ثلاثة كيلو مترات فقط يستطيع أن يقطعها في خمس  
دقائق على الأكثر، إلا أنه بعد تغيير الشكل الهندسي للطريق  
وجعله اتجاه واحد فقط، أصبح الأمر مُستحيلًا.. أو كاد.

في القسم الخلفي للسيارة ترقد الأم شبه غائبة عن الوعي  
وفاقدة للنطق تمامًا، تنظر إلى سقف السيارة الداخلي بنظرات  
خاوية.. يمسك ابنها بيدها مُحاولًا يَبَثَّ الطمأنينة فيها.. كانت  
عاجزة عن التحكم في رأسها.. تشير بيدها الأخرى نحو الباب  
إشارات مُبهمة تُترجم ما يموج داخلها.. احتضن رأسها باكيًا  
مُربتًا عليها برفق:

- والله هتبقى كويسة متخافيش.

اخترقت سيارة الإسعاف حشود السيارات وتجاوزتها سيارة  
تلو الأخرى مطلقّة السارينة المميزة.. يضغط حسن على آلة  
التتبيه؛ كي يُفسحوا له طريقًا وسط هذه الفوضى التي كان  
يمعج بها الشارع.. بنبرة رجاء جاءه صوت الطفل عبر الشباك  
الصغير الواصل بين كابينتي القيادة والقسم الخلفي:

- بسرعة سرعة وحياة ربنا.

لم يكن حسن ينتظر توئيل الطفل، فبالفعل كان يسير بسرعة لا تناسب لا مع حدود المسموح به وسط المدينة أو حتى مع حالة المريضة التي معه.. كان عليه أن يقطع الطريق حتى نهايته، ثم يعبر كوبري صغير ليصل إلى الجهة المقابلة، ثم العودة بطول كل تلك المسافة ليدخل إلى الشارع الذي يقصده.. أدرك أنه إن استمر فلن يسعفه الوقت أبدًا.. اتخذ قراره ودون تفكير نفذه فورًا صائحًا:

- مَبدهاش بقی.. الطُف يا رب.

دار حول زاوية الشارع وغير سرعته فجأة وصعد بالسيارة فوق الرصيف في مُتصف الشارع بالضبط وهبط ثم انطلق في الاتجاه المُعاكس.. انحرفت إحدى الشاحنات أمامه وأطلق سائقها نفيده فتجاوزه بصعوبة بينما صاح في وجهه رجل بسباب غاضب كان يقود سيارة ملاكي أخرى؛ حتى يتعد عن الطريق، لكنّه واصل.. لاحت أمامه ناصية الشارع الذي توجد المستشفى في نهايته.. زادت دقات قلبه وتنفس الصعداء قائلاً:

- ألف حمد وشكر ليك يا رب.

دخل في الشارع، فوجد صفوف السيارات مُتراصة أمامه على مدى البصر بلا حدود وإشارة المرور مُغلقة.. الموقف كان غريبًا بالنسبة للتوقيت والازدحام الغير مُبرر.. نزل مسرعًا من السيارة، وسأل بانفعال قائد أقرب سيارة بجواره:

- فيه إيه قدام؟

- الرئيس معدي فوقفوا الطريق.

- الطريق كما ان... مش كفاية حالنا واقف.

- معاك حالة ولا إيه؟

أوما حسن برأسه إيجابًا في مرارة، فقال الرجل:

- اطلع كلم الضابط هتلاقيه واقف قدام يمكن يرضي  
يعديك.

ترك السيارة وأخذ يعدو باتجاه الضابط... بدأ حذائه يؤلمه،  
فخلعه وواصل العدو عاري القدمين.. استوقفه صفٌّ من  
الساكر حاول أن يتجاوزه مُحدثًا مع أحدهم وهو يلهث:  
- هقول للباشا كلمة بس.

- سيه يا ابني.

هتف بها الضابط الواقف خلف الصف فأفصح الساكر  
الطريق عبر حسن إلى الضابط الذي نظر بتأنف وريبة إلى هيته  
وسأله:

- إنت مين وعايز إيه؟

- أنا سواق إسعاف المستشفى اللي قدام دي ومعايا حالة  
متأخرة.

- والمطلوب؟

- تعدينا بس يا باشا.

رد الضابط بسخرية:

- أعيديك لإزاي بس يا ابني إنتَ أعمى!.. الطريق متقفل  
يمنين وشمال بالضبة والمفتاح.. ده وزير الداخلية ميقدرش  
يفتحلك الإشارة.. المركب هيعدي بعد دقيقتين.

- الست بتموت يا باشا.

مط الضابط شففيه وأشار بيده دليل قلة حيلة.. عاد حسن  
راكضاً إلى السيارة مرّة أخرى.. كان العجز والمرارة يملآن رثيه،  
وشعر أن أنفاسه تخرج منه بصعوبة.. قبل أن يصل إلى السيارة  
سمع صرخة ملتاعة مدوية تصدر من داخلها:

- ماما.

قفز المسافة المتبقية وفتح الباب الخلفي للسيارة.. وجد الأم  
تتنفض في عنفٍ بين يدي ابنها ويخرج سائل رغوي أبيض من  
فمها.. فجأة أرخت قبضتها المُمسكة بيد الطفل، ثم تهاوت يدها  
إلى جانبها مرّة واحدة.. ارتد الطفل؛ حتى اصطدم ظهره بجدار  
السيارة.. ارتعش وكنم فمه بيديه المُرتعدتين.. عَضَّ حن طرف  
الباب بأسنانه في قسوة وهو يتابع وشعر بسخونة الدموع التي  
انسابت على وجهه.. جلس في وضع القرفصاء على الأسفلت  
وضم ركبتيه إلى صدره بذراعيه مغمضاً عينيه، وأخذ يجبط  
مؤخرة رأسه بضربات متظمة على باب السيارة من الخارج.

( ١٥ )

## كشفت طبي

تابعت (نرمين) بمتهى الاهتمام من شرفة غرفتها سيارة الإسعاف وهي تنقل جارتها، وبعد أن انصرفت السيارة، تسلمت عائدة على أطراف أصابعها إلى السير مرة أخرى بهدوء؛ حتى لا توظف زوجها الذي كان يغط في نوم عميق أو هكذا كانت تظن.

(هانى) خريج كلية الحقوق بتقدير جيد جداً وابن الأستاذ الجامعي المرموق عميد نفس الكلية والمرشح بقوة لوزارة التعليم العالي.. أصراً والده على تزويجه منذ السنة الدراسية الثانية، فالتقدير مضمون وبالتالي الوظيفة بعد ذلك.. كان زواجاً أقرب إلى الصفقة.. (نرمين) بنت العائلة العريقة، ذات النفوذ المتشعب في الدولة و(هانى) ابن صاحب الوضع الاجتماعي والأموال ونصف المساحة الزراعية تقريباً في إحدى محافظات الدلتا.. صفقة رابحة لكلا الطرفين.. كإجراء طبيعى بعد انتهائه من الكلية تقدم هانى إلى اختيارات السلك القضائي كمُعاون للنيابة.. بقليل من التوصيات من معارف والده وعم زوجته.



بدا وكان الحلم في طريقه إلى التحقق.. اجتاز كل الاختبارات وبقي الكشف الطبي.. بمجرد دخول زوجته إلى جواره في الفراش اعتدل وجلس عاقداً ذراعيه أمام صدره.. انتفضت زوجته لرؤيته مُستيقظاً، فسألها بصوتٍ يقظ وعينٍ سارحة:

- خير.. الإسعاف كانت جايه لمن؟

- إنت صاحي يا حبيبي؟.. أنا فاكر انا نايم!

- ومين يجيله نوم؟

- دي الست تُربّا اللي في الأول جُم نقلوها شكلها ثعبت

جامد.

سمعها ولم يُعقّب ومازال سارحاً.. اقترت منه وسأله في

دلال:

- ما نمش ليه؟

رد في سرعة:

- قلقان يا نورمين.

رَبَّت على كتفه في حنية وقالت:

- مش أونكل جِبالي طمنك وقالك دي كلها شكليات وإنك

داخل داخل.

هَزَّ رأسه مُؤمّناً على كلامها، ورد وهو يفرك كفيّه في توتر:

- سيادة المُستشار له كلمة وكلمة مسموعة كمان.. لكن

برضه مش ده بس كل اللي يقلق.

- يعني عديت ده كله وجاي تقلق دلوقتي في أنفه حاجة..

## الكشف الطبي!

- هو أصلاً كشف روتيني مَلوش أي ثلاثين لزمة.. حتى  
ميعاده ٨ الصبح في نفس يوم إعلان النتيجة النهائية للمقبولين،  
لومهم كانوا هيخلوه يوم لوحده على الأقل.  
- طب فين المشكلة.

يتردد لحظة، وكأنه يزن الحروف قبل نطقها، ثم يُلقها مرة  
واحدة:

- اختبار البول.

- نعم!

- المُصيبة لما يطلبوا العينة يا نرمين.. أنا لما يكون متوتر  
مَبرفش أنزل نقطة حتى.. ده لو هيسيوني ساعة مش هقدر،  
أنا عارف نفسي.

اعتدلت مرّة أخرى في جلستها، وقد أفاقتها كلماته، وقالت  
في دهشة:

- معقولة للدرجة دي الموضوع صعب عليك.

يدفن وجهه بين كفيه، ويقول بصوتٍ مُحتق:

- وأكثر كمان.. إنتي مش مُتخيلة.

سحبت رأسه على كفها وطبطبت عليه، ثم همست في أذنه:

- لا مُتخيلة ومُتأكدة إنك هتعددي منها.

يرفع رأسه وينظر في عينيها ويقول:

- لازم نشوف حل يا نرمين.. هتفضح.

برقت عيناها لحظة وبدأ أن أمراً ما يدور في ذهنها، فابتسمت  
وشدت الغطاء على جسده بحنان وقالت:

- محلولة والله يا حبيبي متفلقش.. بس نام دلوقتي، وقادر  
ربنا يجلبها من عنده.

هدأته كلماتها نسيًا وبصعوبة بالغه استسلم للنوم.. وظلّت  
هي مُستيقظة تُدير الأمر في رأسها ومع بزوغ أول خيوط  
الشمس كانت الفكرة التي تداعب عقلها قد اختمرت تمامًا..  
ساعتان من النوم القلق لم تشفع له في الحصول على مزاج  
ووجه رائق، فقام مُتفخ العينين من كثرة السهر.. وجد زوجته  
وقد أعدت له طعام الإفطار، لكنه لم يقوَ على وضع أي شيء  
في جوفه.. ارتدى بدلة كاملةً أنيقة تليق بجلال وهيبة الموقف  
، فلبسها اليوم كما يتمنى سيتم إعلانه اليوم وكيلاً للنائب  
العام.. نظرت إلى المرأة ليعدل من وضع رباط العنق المربوط  
بأحكام، ثم تأكد من نظافة حذاءه جيدًا.. طبع قبلة على خدها  
واتجه نحو الباب.

- خلاص نازل يا حبيبي؟

أجاب بصوت يُغالبه التوتر:

- آه.. ادعيلي.

- ناجح إن شاء الله.

قالتها ثم ناولته كيسًا رقيقًا مُغلقًا بإحكام به سائل أصفر  
فاتح.. أمسكه ونظر إليه ثم فَعَرَ فاه في دهشة وقال:

- إيه ده؟

- هُنَّ .

فكر لحظة، ثم قال:

- اوعي تكوني...

قاطعته بإساءة من رأسها إيجاباً، وقالت في حماس وهي تغمز

بعينها:

- أيوا هو اللي جه في بالك بالغبط.. عيب عليك.. مراتك

حييتك مش سهلة.

- يخرب عقلك

واصلت بنفس الحماس:

- ده بقى تخيبه جوه هدومك ولما تدخل التواليت عشان

تديهم العينة فضيبه جوه الأنبوبة اللي هيدوهالك.

قلب الكيس في يده غير متمالك لمشاعره التي تأرجحت بين

الانفعال والدمشة، فسألها بقلق:

- تفتكري متخش عليهم.

أجابت بثقة:

- مفياش كلام أصلاً.. إنت بس خبي الكيس كويس.

هز رأسه، ثم احتضنها وقبل رأسها ويديا وغادر المنزل وفي

رأسه هدف واحد فقط.. تنفيذ فكرة زوجته.

في نهاية اليوم أعلنت أسماء المقبولين وكان من بينهم اسم

هاني، لكن مع علامة باللون الأزرق فوق الاسم وكلمة صغيرة

بين قوسين بجواره.. (استدعاء).. لحظات ووجد هاني نفسه

واقفاً أمام لجنة المستشارين السبعة التي أصدرت قائمة أسماء وكلاء النيابة الجدد.. تهامس ستة مستشارين فيما بينهم بصوتٍ خفيض بينما أخذ أوسطهم يُقَلِّب الورق الذي أمامه في تابعٍ دون أن ينظر إلى هاني قائلاً له:

- هاني.. الحقيقة إنك نموذج مثالي نقدر نقول عليه فعلاً مَفِيكش غلطة.. التحريات نضيفه.. السمعة وحُسن السلوك فوق الشُّبهات.. كشف الخمرور والمخدرات ممتاز.. الصحة تمام. تتفخ أوداج هاني فخراً وترتسم على وجهه ابتسامة ثقة عريضة قائلاً بارتياح:

- الحمد لله.

يضع المستشار الورق جانباً ويخلع نظارته الطيبة، ثم يواصل:

- والحقيقة إن اللجنة النهارده بالإجماع علقَت نتيجتك وطلبت تشوفك عشان حاجة تانية خالص.

رد بتوتر مشوب بالقلق:

- خير يا فندم؟

نظر المستشار إلى باقي المستشارين حوله، وتبادلوا نظرات حرجة قبل أن يستجمع الأوسط شجاعته ويلقيها في وجه هاني مرةً واحدةً في ريبة:

- هاني.. هو إنت إزاي حامل 11؟

( ١٦ )

## أول مرة\*

- هاوز ألعب الماتش يا كابتن.

- مش هينفع يا رامى .. حالتك النفسية زي الزفت وهتأثر على لعبك، ومستواك مكنش كويس آخر تدرين.

- الله يخليك جربني يا كابتن أنا حاسس إني هـ.....

يقاطعه في قوة:

- خلضنا يا رامى .. الله .. أنت هتكون في الاحتياطي انتهينا

بقى.

يخرج رامى مُنكس الرأس من غرفة اللاعبين ، تعلق وجهه  
أمارات الحزن والانكسار .. يعيل مساعد المدرب على أذن  
المدرب هامسًا له في عتاب:

- كنت خليته يلعب يا كابتن.

---

(عن قصة حقيقية على لسان تشوك دودج)

- أنا بعمل كده عشان مصلحته ومصلحتنا كلنا.. الولد  
مُنهَار من ساعة وفاة أمه أول امبارح، وده ماتش نهائي مِينفَعش  
أخاطر وأخليه يلعب.

بدأت مباراة كرة القدم في نهائي بطولة الشباب ١٢ عام  
بين فريق رامسي والفريق الآخر بحماسة من الفريقين استمرت  
لنصف الشوط الأول، قبل أن يُسيطر الفريق الآخر على مجريات  
الشوط تمامًا ويرجم السيطرة إلى ثلاثة أهداف مُتعاقبة، صَعَبت  
من مُهمة الفريق الأول.. مع نهاية الشوط الأول ودخول الفريق  
لغرفة الاستراحة، بدأ اليأس في عيون الجميع ووسط كومة  
الانهار المعنوي لم تُسعف كلمات المدرب إعادة شحن بطاريات  
حماسة لاعبيه، أو حتى تتشلهم من هذه الحالة، التفت المدرب  
في تلك اللحظة إلى رامسي الجالس في ركن الغرفة ووجهه في  
الأرض، ويبدو أن المدرب يفكر في أمرٍ ما، سرعان ما ترجم  
التفكير لنداء حاسم:

- سَخْن يا رامسي.. هتنزل الشوط الثاني.

انتفض الفريق مع انطلاق صافرة الحكم وبداية الشوط  
الثاني، وانتقلت السيطرة بشكل لافت لفريق رامسي خصوصًا بعد  
مشاركته.. لم يكن رامسي من لاعبي الصف الأول في الفريق، كما  
أن مستواه لم يكن يسمح له بالتواجد بقائمة المباريات الأساسية  
إلا مرات قليلة، لكنه وبمجرد نزوله في هذه المباراة لعب كما  
لم يلعب من قبل، وكأنه شخصًا آخر غير الذي عرفوه وسط  
انبهار مُدريه وزملائه.. تَعَمَلت فجأة.. سجل الهدف الأول..  
ثم صنع الثاني.. ثم سجل الثالث.. تساوت الكفتان واقتربت

المباراة من نهايتها، وقبل أن يُعلن الحكم نهاية المباراة عرقل أحد مدافعي الفريق الآخر مُهاجم فريق رامي، فاحتسب الحكم ركلة جزاء تصدّى لها رامي مُحِرِّزًا هدف فريقه الرابع.. انتهت المباراة.. حالة فرحة هysterية اجتاحت كل طاقم الفريق ووسط الأحضان والقبلات والأجساد المتلاحمة، اخترق رامي الحشود بحثًا عن مديره، فوجده مُنشغلًا بالاحتفال مع باقي زملائه.. تلاقى أعينهما.. اقترب رامي منه وقال له في قوة لا تناسب مع سنوات عمره:

- أنا كنت عارف يا كابتن عشان كده قولتلك نزلني.

نظر إليه المدرب بخجلٍ واقترب منه، ثم احتضن رأسه وقال:

- حقك عليًا.. إنتَ عملت كده إزاي؟

ارتسمت على وجهه ابتسامة، ثم أجاب والدموع في عينيه:

- ماما الله يرحمها كانت عامية.. مَبْتشوفش.. والنهاردة كانت أول مرة متفرج عليًا من الجنة وأنا بلعب.

ترك رامي مديره غير عابئًا بعلامات الدهول التي ارتسمت على ملامحه بعد عبارته الأخيرة وغادر الملعب وهو يدرك أنه الآن تحتم عليه أن يكون وحيدًا.. أكثر قوة.. وصارت ضحكته أكثر اتساعًا وإشراقًا.



( ١٧ )

## ميموري كارر

في ذلك الحى الشعبي العتيق، وعند مدخل ورشة الزجاج الكبيرة نسيياً، وتمت لافنة ضخمة مكتوب عليها بحروف يعلوها الصداً وعوامل الزمن (ورشة زجاج مدبولي وأولاده)، وقف (كرم) الابن الأصغر للحاج (مدبولي) مشغولاً في تنسيق لوح سيارات زجاجي خلفي لأحد الزبائن الواقفين أمامه. يستعجله الزبون في استجداء:

- شهّل والنبي شوية يا كرم عشان الباشا مستعجل .. مكش لوح إزاز ده اللي هتقيمه.

همّ بالقاء لوح الزجاج الذي بيده على الأرض ويرد بعصبية:

- بقولك إيه الباشا بتاعك ده يستعجل على نفسه.. أنا تحبش أعمل شغل صربعة.. مش عايز جس لحد ما أخلص ولا نقضها سيرة خالص؟

- معلىش يا كرم.. وكيل نيابة جديد بقى وحقه يترسم.

لمح كرم أخته تخرج مُسرعةً من باب منزلهم المواجه للمحل،

فترك ما بيده والزيون وأسرع نحوها وبادرها:

- على فين يا بت يا تُقى؟

- ملكش دعوة يا كرم، أنا قايله لأبوك، وبعدين إنت مش هفتح لي محضر كل يوم.

يُمسك كرم بذراعها ويلويه خلف ظهرها بشدة تجعلها تصرخ بصوت عالٍ، وقال:

- دا أنا مش هفتح لك محضر ويس، دا أنا هفتح دماغك كمان لو منجرتيش طلعتي على فوق دلوقتي.

- آآآى.. الحقني يا آبا.

يدوي صوت والد كرم المعلم مدبولي في المكان بقوة:

- كرم..

نُقلت نُقى ذراعها من يد أخيها، ثم تجري باكية نحو والدها، الذي خرج من الورشة على صرخة ابته، وكرم يجري ورائها مُحاولاً اللحاق بها هاتفاً:

- إنتي مفكرة إن أبوكي هيجوشني عنك.

وقف مدبولي حائلاً بينهما، واحتوى نُقى الخائفة تحت ذراعه، ونظر بعنف إلى ابته:

- اخرس يا زفت.. فيه إيه يا تُقى؟

- أنا مش قولتلك امبارح يا آبا إني رايحه لـ سعاد عشان حنة أختها وإني مش هعوق.

- حصل.

- يبقى قول لسبع البرومبه ده اللي عاملي مسبح رجاله في بعض يحمل عني بقى أنا تعبت:

يُريت مدبولي على كف ابته بحنان، وينظر بطرف عينيه إلى كرم، ثم يلتفت لابته:

- خلاص يا بت.. روحي لصاحبك، بس متعوقيش زي ما اتفقنا.

- حاضر يا آبا.

تقولها وهي تمسح دموعها، وتتحرك في سرعة، فيستوقفها والدها:

- استني يا بت.. عايزة فلوس؟

تبسم وتنظر في الأرض دون أن ترد، فيمد يده في جيب قميصه العلوي، ويخرج منها عدة أوراق يناولها لها.

- خُدي خُلي دول معاكي.. ميصحش تدخل على الناس بإديكي فاضية.

تُمسك النقود وتطبع قبة حانية على خد مدبولي، وتُخرج لسانها لكرم الذي يضرب كفاً على كف.. تجري تُقى مُبتعدة فرحة كالأطفال.. يعود مدبولي إلى القسم الثاني لورشته مرة أخرى ويواصل عمله أمام ماكينة نشر الألواح الزجاجية.. يتبعه كرم ويقف بجواره وعلى وجهه أمارات الغضب.. يلمح

مدبولي وهو مُتهمك في العمل، فيقول دون أن يرفع نظره إليه:  
- بالهداوة على أختك شويه يا دُوغف مش كده.

- يا آبا والله ما هبضيع البت دي غير دلحك ليها، ومينفعش  
برضه تخرج يوماتي بالأربع خمس ساعات وترجع متأخرة كده،  
الناس هتاكل وشنا.

يلتفت إليه مدبولي ويقول بعصية:

- قطع لسان أي كلب يجيب سيرة بتي.. أنا مشيت مرّة ورا  
كلام عيل زيك لما خلّتي أرفض الواد زميلها اللي جه اتقدملها  
ومش هكررها.

- يعني يا آبا كنت عايزنا نجوزها لحتة واد عواطلي  
مَشغلوش صبي عندنا؟  
يُشبح بيده مُحذراً:

- نُصّر الكلام.. أهو اللي حصل حصل وقفل على السيرة  
دي في نهارك اللي زي وشك، وأما أبقى أموت ابقى اعمل اللي  
إنّت عايزه.

تغيرت لهجة كرم وهدأت نبرة صوته، وقال بووِدٍ مُقترئاً من  
والده:

- بعد الشر عنك يا آبا.. أنا عايزك تعرف إن غرضي  
المصلحة.

- يا ض يا عبيط دي أختك الوحيدة وملكوش غير بعض

وكفاية كسرناها مرة قبل كده.

بدا على كرم عدم الاقتناع، فسحبه مدبولي من ياقة قميصه ليُقربه إليه، وتناول قطعة من الزجاج الذي نشره للتو ووضعها أمام وجه ابنه، وقال:

- يا أسطى يا فاهم .. يا متنور .. يالى معاك شهادة .. أي بت في الدنيا عاملة زي حنة القزاز، أقل حاجة تبان فيه على طول .. شرح .. وجع .. كسر .. لا مؤاخذه وساخة .. فهمت يا حمار.

- ماشي يا آبا.

يُزيحه مدبولي بيده:

- غور يالآ روح شوف وراك إيه وكفاية عَطَلَة لحد كده.

يندمج كرم مرة أخرى فيما كان يفعله في الورشة، مُقدِّمًا اعتذارًا غير مُهذب للزيون الذي تركه منذ قليل .. لم تمضِ ثوانٍ حتى اقترب شاب ثلاثيني من كرم، الذي ما إن لمحّه حتى ترك ما بيده للمرة الثانية وسط زهول الزيون، واتجه نحو الشاب ليسحبه جانبًا ويمس له:

- لسه فاكر يا روح أمك؟

يتسم الشاب ابتسامة لزجة ويقول:

- وليه بس أمك ومش أمك والسكة دي؟ .. الأول صباحو يا كبير.

- اخلص.. معاك جديد؟

هز الشاب رأسه، ثم يُخرج كارت ميموري موبايل من جيبه،  
ويغمز بعينه ويُجيب:

- وأي جديد.. حاجة ألاجّه متلقياهاش غير بس عند هو.

يميل عليه ويواصل هامسًا:

- وعربي كمان.

- قُل عليك يا هو.. طب هات.

- هات إنت الأول.

يُناولُه ورقة نقدية يُمسكها الثاني بلهفة:

- يا ساتر مش بتسيب حقك أبدًا.

يتسم ويرد:

- تلميذك.

يخطف كرم كارت ذاكرة الموبايل منه، ويمسك كنزهِ الصغير  
في حرصٍ وُصوي أحد الصبية باستكمال العمل الذي كان يقوم  
به، ثم يُنادي على والده المُتعمك في عمله:

- آبا أنا رايح القهوة خمسة كده في السخان وجاي.

في ذلك الركن المُنزوي من القهوة، جلس كرم مُمسكًا بالموبايل  
بعد أن دسّ فيه الميموري كارد وبدأ في تشغيل الفيديو ليُشاهد  
الفيلم الإباحي الذي اعتاد أن يأخذه كل فترة من هو.. يتتبع

الواحد منه بعشرين جنيه.. كان يدفعها عن طيب خاطر، فأفلامه  
دوماً فيها ما يميزها ويبحث عنه دوتنا عن كل المحتوى الذي  
تعجُّ به الشبكة العنكبوتية.. كان واضحاً أن الفتاة في الفيديو لا  
تعلم لاهي ولا الشاب الذي معها أن هناك من يُصور لقاءهما..  
أخذت تتمايل وتراقص بدلال على نغمات الموسيقى المنبعثة من  
الكاسيت الملقى بجوارهما.. أخفت سُحب الدخان المُتشرة في  
الغرفة ملامحها وكذا ملامح رفيقها، ولكنها أظهرت تضاريس  
جسدها الشاب الفاتر.. تصاعدت أنفاس كرم مُحملةً بدخان  
سيجارة الخشيش التي يُمسكها بيده، وتساعد معها تركيزه  
أكثر.. عدل كرم من وضع بنطاله.. دارت الفتاة دورةً سريعةً  
على أنغام الموسيقى.. فظهر وجهها لجزء من الثانية، التي كانت  
كافية ليدرك شخصيتها.. أخته تُقى.

( ١٨ )

## بورتريه

يضع ساعات من المتعة الحرام لا تتجاوز الثلاث، اعتاد أن يحفظها (عماد) مع حبيته (تقى) في شقة زميله، التي تقع على أطراف القاهرة.. غير أنهما في ذلك اليوم تحديداً لم يشعران بنفسهما إلا بعد مرور ٥ ساعات كاملة، غيبتهم فيها لحظات النشوة المزوجة بدخان الحشيش وزجاجات الخمر الرديء، الذي اعتادا أن يحتسياه.. فاقت على صوت هاتفها الذي رن في إزعاج.. رأت اسم أخاها على الشاشة فانتفضت وأدركت ما مما فيه من كارثة.. تأخرت على منزلها وتأخر عماد على عمله في أتيليه بحي الزمالك.. أيقظته وارتياد ملابسها على عجل.. أوصلها إلى أقرب نقطة تستطيع أن تركب منها واطمأن عليها، ثم ألقى بنفسه داخل أول ميكروباس وجدته أمامه.

- طيبة أوي تقى.

قالها لنفسه مُبتسماً ومُسترجعاً حديثه مع والدته عنها منذ عدة أشهر قبل أن يتقدم لخطبتها.. حينها أصرت والدته على



عدم الذهاب معه قائلة:

- إنتَ مش عارف إنتَ رايح تخطب بنت مين!.. عمل قد لحافك مد رجليك.

بينما يُواصل الناس التوافد على السيارة شيئًا فشيئًا أغمض عينيه وتذكر.. لا يزال مشهد طرده من منزلها عندما تقدّم إلى والدها عاليًا بذهنه ويُطارده بقسوة.

- رتّام إزاي يعني؟

هكذا سأله والدها وأخوها، ولم يستطع أن يرد عليهما، وخرج يجر أذيال الخيبة.. كل ما يتذكره بعدها إصرارهما أن يتقما هو وثقى سويًا من الظروف، وأن يحصل على ما حُرما منه رغمًا عن الجميع.. الغريب أنهما كل مرة وبعد كل لقاء كان يتابعا شعور بالندم ورغبة حقيقية في عدم تكراره، إلا أنهما كانا يضعفان ويواصلان.. ترك نفسه مع الأحداث حتى اتبه أن السيارة كانت قد تحركت بالفعل منذ لحظات.. راقب سرعتها البطيئة ونظر إلى ساعته، ثم إلى السائق:

- ما تشد شوية يا اسطى.

- يعني مطير يعني يا بيه.. ما السكة واقفة قدامك أهى!

سيدة عجوز تشع بالسواد تجلس بجواره وتجهت كلامها إلى السائق:

- والنبي يا ابني متنساش تنزلني قدام العريبات اللي رايح السكة الحديد عشان أركب لـ بور سعيد أحسن بتلخبط كل مرة.

- حاضر يا ست.. قولتلك قبل كده حاضر..

نظر عماد إلى يساره متأملاً ملامح السيدة.. فراحة مُسنة بسيطة تُشبه أمه كثيراً تُمسك مسبحة بين أصابعها تقلب بين حياتها في رتابة مُتعممة بصوت خفيض.. ارتاح للطيبة التي تطل من عينيها، وأراد أن يمؤن عليها وعلى نفسه طول المسافة؛ فسألها بابتسامة:

- إنتي رايحه بورسعيد يا أمي؟

- أيوه بالسكة الحديد وهركب من هناك أجرة للعريش..  
رايحة أزور ياسين ابنسي ربنا يحميه لشبابه أصله في الجيش.

- بس مشوار علقه عليك ده؟

- يوه.. وإحنا إن مكناش نتعب عشانكم هتعب مين؟

- ربنا يخليهو لك ويوفقه ويرجعه بالسلامة.

- تعيش يا حبيبي.

يتدخل السائق في الحديث ناظرًا إليها في المرأة التي أمامه:

- بس كويس والله إن لته فيه ناس بيروحوا الجيش.. اللي يقبل يخش الجيش برجله دلوقتي يبقى عليه العوض.. دا أنا ثلاث تربع أصحناي مزوغين منه.. أنا نفسي مزوغ.

قالها بتلقائية أضحكت كل من في الميكروباص ماعدا أم ياسين التي قالت في أسى:

- لا إزاي!.. غلطان من ماسك لراسك.. إنت بتحمي بلدك

وأملك مش الكُبارات.

رد السائق في استنكار:

- دي مش بلدنا يا ست دي بلدهم هما.. شوفنا إيه منها..  
دول عالم ولاد كلب.

- بس يا وله يا قليل الرباية.

ينظر السائق إلى الخلف غاضبًا:

- الله الله جرا إيه يا ولية إنت هتلبخي ولا إيه.. متيجي  
تاخديني قلمين أحسن.

تُشمر أم ياسين عن ساعدها الأيمن وتهتف بانفعال:

- وماله.. لا إنت كبير عليها ولا أنا صغيرة عليها.

يُمسك عماد بيدها، ثم يرمق السائق بنظرة عتاب مُحذراً،  
ويقول:

- جرى إيه يا اسطى زي أمك برضه.. هترد عليها!

- إنت مش سامع يا عم!

- خُخلصنا يا اسطى بُص لطريقك بقى الله يسرها عليك  
وعلينا.

- أستغفر الله العظيم من كل ذنب عظيم.

يُقبّل عماد رأسها في حنية:

- حقك عليًا أنا يا أمي.

- شفت الواد وطولة لسانه.

- خلاص بقى صلي على النبي.

- عليه أفضل الصلاة والسلام.

يُحاول عماد أن يُغيّر دفة الحوار تلطيفًا للجو، فيسألها بمرح:

- وجوزتي ياسين ولا لسه؟

ترد في حماس:

- عروسته موجودة.. بنت عمه.. أو مال إحنا ممتجوزش من  
بزه العيلة.. يتخلص هو بس ويرجع ونكتبه على طول.

يتحدث السائق مع من بجواره بسخرية مُشيرًا برأسه إلى  
الخلف عليها في محاولةٍ لاستفزازها:

- زعلانة عشان بقول ولاد كلب؟.. لأ ولاد ستين كلب  
كمان.. سواء دول ولا دول وإحنا اللي معجونين في الخرا بينهم..  
فوقسي بقى.

تعجز أم ياسين عن الرد ويبدو الألم على وجهها.. يرن هاتف  
السائق فجأة، فينشغل بالرد عليه ويستمع بإنصات إلى مُحذّثه  
على الطرف الآخر وتبديل ملامحه.. توجه أم ياسين حديثها إلى  
عماد مُشيرة على ما بيده:

- إيه اللي أنت شايله ده؟

- ده ورق وده تابلت بشتغل عليهم.

- بشتغل إيه؟

- رتام.

تتهلل أسايرها:

- بتعمل تصاوير؟

يتسم ويشير بيده إشارة تقريبية:

- يعني حاجة زي كده.

تُسك بيده وتضغط عليها وتقول بفرحة:

- مَترسلي ياسين تصويرة حلوة عشان أبعتهاله.

يرد بدهشة:

- تبعتهالوا فين يا أمي إنت مش رايحاله دلوقتي!

- لا ما هو ربنا افتكره في رمضان اللي عدى.

مصدومًا:

- مات ١٩

- استشهد.

تجمدت الدماء في عروقه، وتلعثمت الكلمات على شفثيه:

- رمضان الـ... هو كان من الـ... اللي قتلوهم ساعة الفطار

في الـ... وهمايين...

واصلت وكأنها لم تسمعه:

- أنا بقى اتعودت أول خميس من كل شهر أعمل إيه..

أروح أزور زملاته هناك، وأوديلهم زيارة مُعتبرة تُرمُ عضمهم..  
أومال.. ماها وياسين واحد.. كلكم واحد يا وله وأيامكم  
صعبة ربنا يعينكم عليها.

لم يتمالك عماد دموعه التي انسابت على وجهه النحيل رغماً  
عنه :

- ها قُلت إيه؟

أخرجته من صمته بسؤالها فأجاب بسرعة:

- قلت إيه في إيه يا أمي؟

- متعملي تصويرة لياسين؟

- معاكمي صورة له؟

- وشايلها جنب قلبي، عشان يسمع صوتي وأنا بدعيه مع  
كل نفس طالع.

قالتها وهي تُخرج حافظة سوداء بالية من صدرها وتفتحها  
وتلتقط من داخلها صورة مُمزقة الحواف وتُعطيها له.. بلا  
تفكير أخرج قلمه من الحقيبة وقلب صفحة كراسة الرسم على  
صفحة بيضاء جديدة وأمسك صورة ياسين وشبكها أعلى يسار  
الورقة بدبوس.. استغرق بكل جوارحه وانهمك في الرسم.. أخذ  
على عاتقه هدفاً، أن يتهي من تلك الصورة قبل نزولها من  
السيارة.. كان يُسابق الوقت؛ لرغبته أن يُساهم ولو بقدر ضئيل  
في إسعادها.. وبعد تقريباً نصف ساعة قطع الورقة من الكراسة  
ومد يده إليها بها:

- اتفضلي يا أمي .

تُمسكها وتأملها في إعجاب:

- سلّم إيدك يا ضنايا .

في نفس اللحظة تقف السيارة ويقول لها السائق شاردًا:

- عريبات رمسيس هناك أمي يا ست تركيبها هتتركك قدام باب المحطة .

- ماشي يا ابني .. تعيش يا حبيبي .

تُمسك بالورقة في يدها، فيفصح لها عماد من على يمينه الطريق كي تنزل .. تحمل قفّة ضخمة على رأسها بمهارة، وتسحب كيس أسود كبير بيدها اليسرى، وعندما يُحاول عماد أن يُساعدها ترفض قائلة:

- أنا شديدة ولّسه بصحتي يا وله .

- ربنا يديكي الصحة يا أمي .

تهمّ بالانصراف، ثم تقف وتهتف في عماد:

- بقولك ..

- أو مريني .

تأوله الورقة التي رسمها منذ قليل وهي تبسم:

- خُدها .

أمسك الورقة بأصابع مُرتعشة وقلبه يخفق في قوة دون أن

برد.. واصلت مُبتسمة وهي تنظر في عينيه مباشرة:

- خَليها معاك.. إنتَ أولى بيها مني.. خَلْ بالك عمل ياسين

أخوك.

واصلت طريقها.. عاد إلى مقعده بجوار النافذة يتابعها وهي  
تبتعد.. بدت له جبلاً شامخاً يضرب على الأرض بثبات يزداد  
ارتفاعاً كلما بعد.. رآها أعظم امرأة وأقوى كائن في الوجود..  
نقل بصره بينها وبين الورقة المستمرة في يده مُتأملًا ملامح ياسين  
المرسومة.. مع التركيز في تفاصيل الوجه لاحظ الشبه بينه وبين  
ياسين.. عاد يبصره إلى أم ياسين لكنها كانت قد اختفت.



( ١٩ )

## واحد ميدان لبنان

منذ تلقيه المكالمات الهاتفية التي استقبلها منذ قليل وبعد ما بلغه من خلالها، بدا سائق الميكروباص لكل الركاب شاردًا ومُفصلاً عن الواقع بشكل أو بآخر.. سيطر الوجود على ملامحه الحادة مما أكسبه مع أثر الخياطة الجراحية الرديئة لضربة المطواة بمتصف خده، مظهرًا عدوانيًا.. أطفأ الكاسيت.. شخصت عيناه تنظران إلى الطريق في قلق.. بين أصابع كفه الأيسر يُمسك بسيجارة يُدخنها بتوتر بشع، ويقبض باليمنى على عجلة القيادة في قوة.. قدمه تضغط دواسة الفرامل في آلية بمجرد سماع (على جنب يا اسطى).. خط سيره الأمامي من الحسي السادس في أكتوبر إلى الحصري، ثم إلى ميدان لبنان (٣ محطات).. في نصف المسافة تقريبًا وتحديدًا عند هايبر ماركت نزل ٤ ركاب.. كان المفترض أن يواصل السائق طريقه بعدها مباشرة لكنه ظل متوقفًا، كأنها يُفكر في أمر ما.. تعجب أحد الركاب من وقوفه، ووجه إليه حديثه:

- ما يالآ يا اسطى، مخلص هيجليك تحمل من هنا

تجاهل السائق كلماته تمامًا، وبدأ وكأنه قد حسم ما كان يدور  
في رأسه.. أبطل ماتور السيارة ونزل منها مُناديًا:

- واحد ميدان لبنان.. واحد ميدان لبنان.

مَصِصَت إحدى السيدات في الميكروبياص شفيتها، وهمت  
لمن يجلس بجوارها:

- شوف الراجل مش هاين عليه يطلع وهو ناقص أربع  
أنفار.. عالم معفنة.

يهتف راكب ثانٍ:

- أنا كده هناخر.

يُخرج ثالث رأسه من الشباك المُجاور ويُخاطب السائق:

- ورائنا مصالح يا اسطى الله يرضى عنك.

واصل تجاهله لأصوات الركاب المتذمّرة، واستمر في مُناداته..  
اقترب منه رجل كبير في السن هاجم الشيب رأسه وعل وجهه  
المُتلئ بالتجاعيد علامات الغضب، وقال له في قوة:

- اتكل على الله من هنا يا صلاح ده مش موقفك.

نظر صلاح إليه في ثبات، وقال قبل أن يُدير له ظهره:

- معلش ميجراش حاجة هاخذ الأربع أنفار الناقصين  
وهمشي يا اسطى سيد.

سحب سيد من يده بعنف وصرخ في وجهه:

- أنا مش بكلمك هنا.. بلا أربعة بلا تسعة، بقولك امشي  
انجر وقتني، بدل ما أفرج عليك الموقف كله.

رد صلاح في تحد:

- وأنا بقولك مش متحرك من هنا يا اسطى سيد، وشوف  
عايز تعمل إيه.

مع صرخة سيد ورد صلاح عليه، تجمهر في ثوانٍ باقي  
السائقين للتضامن مع قائدهم ضد هذا الوافد الجديد.. تسعة  
سائقين انشقت الأرض عنهم فجأة، أحاطوا بصلاح وسطهم،  
يَشْتَمُّ كل من يتابع المشهد رائحة مغرقة حامية الوطيس غير  
مُكافئة بالمرّة على وشك البدء.. دار صلاح نصف دورة بيبطئ  
مُراقبًا وجوه من أحاطوه في تحفّز، قبل أن يقترب منه أولهم  
قائلًا:

- إنت يا ض مش الاسطى سيد قالك غور.. يقى تغور..  
هو هيتحايل عليك بروح أمك

قالها، ثم أمطر صلاح بوابل من اللكمات والضربات في كل  
أنحاء جسده.. تَلَوَّى صلاح وصرخ بأهات مكتومة من أثر  
الضربات المتفرقة.. هتفت السيدة داخل الميكروباص بصوت لم  
يسمعه من بالخارج ويلهجة شامته:

- أحسن يستاهل.. خلتهم يقطعوه.. آدي أخرة الطمع.

رد عليها مَنْ يجلس بجوارها:

- أحسن إيه بس يا حاجة دول هيموتوه حرام عليكى.

إنسال خيط من الدماء من جانب فم صلاح وسط اشتداد  
الضرب عليه من كل صوب.. فجأة ومن قلب الحدث انتفض  
صلاح وخلع البلوفر الذي يرتديه وألقاه على الأرض وقطع  
أزرار قميصه في عنفٍ وأخرج من جيب بنطاله الخلفي مطوأة  
أشار بها في وجوه الجميع الذين تراجعوا وأطلق صرخة بصوت  
أجش عالٍ خرج من أعماقه قبل أن يخرج من حلقه:

- عليا الحرام من ديني ما ماشي قبل ما أكمل العربية واللي  
هيقربلي هجيب كرشه.

غلف الصمت التام الوضع.. المشهد بأكمله كان هزلياً..  
صلاح بجسده النحيل مُسكاً بمطواته في تهديد واضح للكل..  
يلتف حوله العديد من الرجال مفتولي العضلات الذين أوسعوه  
ضرباً منذ لحظات.. تبادل الكل نظرة مُفعمة بالترقب.. توجه  
بعض الرجال بأعينهم إلى سيد وكأنهم يسألوه عن التصرف قبل  
أن يُسادر أحدهم بالانقضاض على صلاح صائحاً:

- إنت جاي لحد عندنا ترفع مطوأة في وشنا يا ابن الكلب.

تفاداه صلاح في خفة وهتف:

- أنا مش عايز منكم حاجة.. هاخذ الأنفار الناقصة وهمشي.

عاد الكل لتبادل النظرات مع سيد الذي يتابع الموقف قاطباً  
جبينه، حتى قال:

- سيوه.. خلّوه يتزفت.. بس وحياة أتمك يا صلاح  
ماهتعددي الحكاية دي ولينا كلام مع كبير الموقف بتاعك

تهللت أسارير صلاح ومَسَحَ خيط الدم بجوار فمه بكم  
قميصه وواصل هتافه وكان شيئاً لم يحدث أ  
- واحد ميدان لبنان.. واحد ميدان لبنان.

بدأ الركاب الأربعة يتوافدون واحداً تلو الآخر، ولم تمض  
أكثر من خمسة دقائق إلا وكانت العربة قد اكتملت.. التقط  
صلاح البلوفر من الأرض وألقاه على كتفه بإهمال قبل أن يركب  
السيارة ويديرها وينطلق بها في سرعة.. لحظات وأمسك بهاتفه  
المحمول وطلب رقمًا ما، وقال بصوتٍ مُتهدج:

- أيوه يا أمه تبسي أبويا. أنا نص ساعة وهكون عندكم  
وهاجي أخده.. آه لا معايا فلوس خلاص، لا والمصحف لنا  
أجيلك محكيلك ربك كريم.. سلام.

أنهى الاتصال ونظر في المرأة أمامه ووجه حديثه إلى الكل:

- لا مؤاخذة يا إخوانا اعذروني غصب عني رينا ما يوقعكم  
في ضيقة.. هطير وهو ضلكم التأخير في السكة بس أمانة عليكم  
ادعوا لأبويارايحين نكشف له.

( ٢٠ )

## عيشة

يتتهي الطيب من فحص القدم المتورمة للمريض العجوز  
المُدد أمامه في سرعة ومهارة خبير قبل أن يُبادره:  
- تمام.. قوم يا عبد الواحد.

يتحرك الطيب باتجاه مكتبه ويجلس على كُرسيه، ويبدأ  
بتدوين شيء ما على ورقة أمامه.. يعتدل المريض ذو الجلباب  
المُزق والوجه الممصوح، ويضع قدمه المتفخخة بصعوبة داخل  
شُبه ويتجه بخطواتٍ مُثاقلة نحو المكتب ويسأل:  
- خير يا دكتور؟

يُجيبه دون أن يرفع عينه إليه مواصلاً الكتابة:  
- نقرس.

يُلقى عبد الواحد بجسده فوق المقعد المقابل للمكتب في  
جزع مُرددًا بارتباك:

- نجرس!.. يا وجمعة سودة ومهيبة يا دكتور.

- جرى إليه يا عبد الواحد!.. هو أنا بقولك سرطان! ما  
نصر الناس النهارده عندهم نقرس وعاشين.

- مش ده العيا اللي بيسموه داه الملوك؟

- أبوه هو.

- يعني إحنا وقت ما ناخذ منهم مناخدش غير العيا ياربي.

- أمر الله بقى إنت هتعرض؟!

- اللهم لا اعتراض.. بس يا ييه أنا أسمع إن العيادة بييجى

من كتر أكل اللحمية وأنا راجل بواب.. اللحمية مش بتحكلي

جوف أنا والعيال غير هي يا دويك مرة كل شهر طياري كده،

بيقى جالي منين المدعوك ده بس؟

- ما هو مش شرط يا عبد الواحد.. النقرس زيادة البروتين

في الجسم.. ممكن يجي من كتر أكل اللحمية أو كتر أكل البقوليات،

زي الفول والعدس وال... ..

يُقاطعه عبد الواحد في سُرود:

- ونعم بالله.. أصل ربك عادل حتى في توزيع أسباب العيا

على عبيده.

- بالظبط كده الله يفتح عليك.

يُتاوله ورقة ويواصل:

- دي قائمة المنوعات اللي هتبعد عنها خالص.. فول، لحمية،

تسالي، طماطم، بامية، بسلة، وكام حاجة تاني.

يُمسك بالورقة في ألم قائلاً:

- طب ودي تبقى عيشة دي يا دكتور؟

- معلش لحد ما نظبط نسبة اليورك أسيد في جسمك..

كتبتلك كمان فوار وأقراص هتمشي عليهم لحد ما تبقى أحسن

إن شاء الله.

- ملوش لزوم لده كله يا دكتور.. يعني هي عيشة ولا أكثر.
- لا إزاي! اعمل اللي عليك للآخر.. معاك حد يروحك؟
- أيوه صلاح ابني مستنيني برّه
- ألف سلامة.

قالها، ثم ضغط على زر استدعاء التمرجي بجوار المكتب مُعلنًا انتهاء الكشف.. رفع عبد الواحد جسده بصعوبة ودفعه دفقًا نحو الباب وهو يجير قدمه، وما أن عبره حتى جرى عليه ابنه:

- قالك إيه يا أبويا؟

يُداري الروشته داخل كفه ويرد بثقة:

- ولا أيتوها حاجة.. قالي وارمه عشان التوت تحيا.

يرد ابنه مُندهشًا وهو غير مُصدّق:

- صحيح والنبى... وده يعمل الوجد ده كله؟

- آه والله زي ما بقولك ويعمل أكثر من كده كمان.. يومين

ثلاثة وهتروق.. يا خسارة تمن الكشف.

نهلت أساريره الابن وهتف:

- طب الحمد لله إنه جت على قد كده.. فداك تمن مليون

كشف.

تأبط زراع ابنه مُستندًا عليه.. دون أن يلاحظ الابن يُلقى عبد الواحد بالروشته في صندوق القمامة بجوار باب العيادة، ثم يخرجها.



( ٢١ )

## دخول مفاجيء

- عبر الهاتف جاءه صوت أحد أفراد الإنتاج بالمسلسل :
- فيه دور ليك معنا يا أستاذ في مسلسل (الزعيم) الجديد.  
تهللت أساريره وقال بفرحة صادقة نابغة من أعماق قلبه:
- يا فرج الله .. بجد والنبى .. بتكلم بجد!
- أيوه يا باشا ده كمان طلبك بالاسم.
- قال بفخر وتعالٍ :
- طبعًا طبعًا .. عادل ده اكتشافي.
- أكيد يا نجم.
- سأل بلهفة:
- إمتى يا ابني؟
- بكرة على طول.
- طب مش تبتغولي السيناريو عشان أقرأه وأستعد؟

- لا ماهي مش مستاهلة ورق.. حضرتك دور شرفي.

- دور شرفي دور شرفي.. حد لاقسي.. طب معلش يا ابني  
عندي سؤال كده.. بالنسبة للأجر؟

- متغلش اللي حضرتك هتقول عليه هتاخده.

- اتفقنا.

- الساعة عشرة الصبح بالثانية هتلاقي العربية بالسواق قدام  
بيت حضرتك.

استقبل (فوزي النمر) الممثل الكوميدي الأشهر في الثمانينات  
الكاملة السابقة في حُبور ونشوة تناسب مُثلاً مغموراً حصل  
عل بطرلة مُطلقة لنوه، وليس نجماً تجاوز الـ ٧٠ عاماً له  
اسمه في عالم الفن لعلما حققت أفلامه أعلى الإيرادات قديماً..  
لكنها للأسف سُنة الحياة والمرض.. كانت بداية ابتعاده عن  
الوسط الفني إصابته بمضاعفات مرض القلب فأصبح غير  
قادر على القيام بأي مجهود منذ مُتتصف الثمانينات، وانتشرت  
وقتها إشاعة قوية داخل الوسط مفادها (فوزي النمر الزمن  
والمرض هدّوه).. صُرفت عنه الأضواء ثم المُتجيين.. وتوارى  
تدرجياً حتى أصبح في طي النسيان.. نساء الناس ونسي نفسه..  
يعيش وحيداً دون زوجة وأولاد مُعتمداً على الراتب الضئيل  
الذي يُصرف له شهرياً من نقابة المهن التمثيلية.. نحوشة ٢٥  
سنة عمل هي فقط سيارة كاديلاك مُتهلاكه موديل الثمانينات،  
وشقة صغيرة بحي الزمالك كان قد امتلكها منذ ربيع قرن على  
الأقل.. أغلق الهاتف وقلبه يرقص طرباً.. فتح باب الشقة

ونادى بصوتٍ جهري:

- يا أبو صلاح.. يا أبو صلاح.. يا بواب الغبرة.

يأتيه صوتٌ أنثوي من بير السلم:

- مش قاعد يا فوزي ييه.

- يخرب بيتك على بيته.. أتحرق أنا يعني لغاية ما اليه

يشرف؟

- طالعالك يا بيه أهو.

يترك الباب مُواربًا ويدخل إلى الصالة يلتقط ورقة صغيرة:

ويسحب القلم الجاف من جيب الروب ويُدوّن عليه.. يرن

جرس الباب.. يرد:

- خُشي يا أم صلاح الباب مفتوح.

تدفع الباب سيدة في أواخر الخمسينيات من عمرها وتقف

عند مدخل الشقة بمُحاذاة الباب تمامًا دون أن تدخل.. يتجه

إليها فوزي:

- جوزك فين بنادي عليه من الصبح.. مش هيطل الصرعة

بتاعته دي؟

ترد في أسى:

- تعبان والله يا أستاذ ادعيله.. ده صلاح جه خله وذاه

للكسور من حبة.

يغمز بعينه:

- ليكون منجوز عليكى يا ولية، ويروح لمراته الثانية!  
تضرب صدرها بيدها في هلع، وتقول باستنكار بالغ:  
- مين؟! .. أبو صلاح.. فشر.. تف من بقمك، ده لولف  
الدنيا تيلاقيش ضوفري.

ينهزها:

- إنتي هتسايري معايا؟! .. دي ورقة طلبات عايزها حالاً..  
مائة حلاقة وإزازه كلونيا خمس خمسات وصبغة صغيرة.. خُدي  
وخلي الباقي عشانك.

تُناولها الورقة ملفوفاً وسطها ورقة نقدية بعشرة جنيهات..  
أمسكت بورقة الطلبات وفتحتها، ثم قلبت ورقة النقود بين  
أصابعها بعدم اقتناع، وقالت:

- ١٠ جنيه بحاهم!.. يادي الهنا.. وليه البعزقة دي يا بيه؟

لم يتبه لنبرة السُخرية في صوتها، وقال:

- مش خسارة فيكي الباقي.. دي حلاوة الشغل الجديد.

ترد إليه النقود وهي تُمصص شفيتها:

- لا حيث كده خليها علينا إحنا خالص المرّة دي:

يسحب النقود منها في سرعةٍ ويضعها في جيبه:

- أصيلة يا أم صلاح.. يالآ بسرعة متأخريش.

يقولها، ثم يُغلق الباب في وجهها المُندهش بسرعة.

في اليوم التالي وقبل الموعد بخمسة دقائق نزل من الـ  
مُتأنقاً على أكمل وجه، مُرتدياً بدلة إنجليزية عتيقة مكونة  
ثلاث قطع، تفوح منه رائحة الكولونيا العتيقة، وشعره غار  
بحر من السواد.. وجد سيارة حديثة تقف أمام مدخل الـ  
مباشرة، بجوارها شاب مُلتحي انتبه في وقته عندما لاح  
فوزي مُقبلاً عليه.. فتح له باب السيارة.. أشار له فوزي  
أن يركب:

- إزيك..

- أهلاً يا فندم هتشر فنا وتنورنا.. اتفضل.

ركب السيارة وجلس في الكنب الخلفية.. بدت له ملامح  
السائق الشاب مألوفة إلى حد ما، رغم لحيته التي تُغطي  
جزءاً غير قليل من وجهه، لكنه عمجز عن تذكره فتجاهل  
الامر برمته.. أخرج مشطاً وأخذ يُصقّف شعره بعناية في مرآة  
السائق.. تحركت السيارة.. لحظات ووقفت على مقربة من أحد  
الأكشاك.. لفَّ السائق وجهه إلى الخلف وقال:

- بعد إذنك يا بيه هنزل أجيب علبة سجائر من الكشك

اللي هناك ده.

- ده وقته برضه؟.. ما إنت كنت واقف من شوية بجيتهاش

ليه!

- خُفت سيادتك تنزل متلاقينيش.. معلى هخطفها خطف..

شواني بس.

بشير له في ضجر.. يفتح الشاب باب السيارة، وقبل أن ينزل ضغط بخفة على جهاز مربع أسود صغير في حجم كف اليد موضوع فوق التابلو فظهرت على شاشته أرقام بلون أحمر تتناقص تدريجيًا.. ٢:٠٠.. ١:٥٩.. ١:٥٨.. نزل الشاب مُسرِعًا وأغلق باب السيارة خلفه في إحكام.. انتبه فوزي إلى الجسم الغريب، ونظر خارج السيارة فلم يجد الشاب.. عاد يبصره إلى الجسم مرّة أخرى، وتابع العد التنازلي الذي يهبط في سرعة.. ١:٤٠.. ١:٣٩.. صرخ في فزع:

- إيه ده؟! إيه ده؟!.. فيه إيه؟!

ردد الكلمة وهو يُحاول فتح الباب والخروج، لكن دون جدوى، فقد كان مُغلَقًا بإحكام.. طَلَّ الرعب من عينيه الجاحظتين.. سعل في شدة وقبض بيده على قلبه الذي انتفض في قوة.. فوجئ بدخان كثيف ينبعث من مكان لم يستطع تحديده داخل السيارة.. فك أزرار قميصه بيد مُرتعشة مُرددًا برعب:

- الحقوني.. فيه إيه.. إيه اللي بيحصل!

ثوانٍ وغطى الدخان أغلب مساحة السيارة من الداخل وأصبحت الرؤية شبه منعدمة، لكنها كانت كافية أن يرى بصعوبة ذلك اللون الأحمر المُهتز الذي يتناقص في شراهة.. ٠:٥٩.. ٠:٥٨.. سعل بصوتٍ أكبر وأمسك صدره وكأنه يُريد أن يُطس من سرعة دقات قلبه.. حاول كسر الزجاج لكن قواه التهالكة خارت ولم تسعفه.. يظهر السائق في تلك اللحظة بجوار السيارة مُتابعًا ما يحدث من الخارج بشغفٍ وعلى وجهه

ضحكة لم يستطع كتمانها، فبأتبه صوت شخص آخر عبر سماعه  
موضوعه في أذنه:

- كفاية كده يا رامز افتح له إحنا مش شايفين حاجة في  
الكنترول من الكاميرات اللي في العريضة.

يضحك رامز ويرد في سرعة:

- لته شوية اصبر بس.

- الدخان غطا كل حاجة جوّه

يصمت ولا يرد وهو يتابع الموقف بشغف كأنما ضحكته..  
يأتيه الصوت عبر سماعة الأذن مُكرراً:

- يا رامز اخلص.

- حاضر حاضر.

يُمسك رامز باب السيارة بيده ثم يفتحه فجأة ويفرد ذراعيه  
صائحاً:

- حبيبي.. حبيبي.. والمصحف مَـتضرب.. والمصحف  
مَـتضرب..

يتهاوى نصف جسد فوزي العلوي ساقطاً خارج السيارة  
بلا حراك، فيمسكه رامز ويُنادي بصوتٍ عالٍ:

- هاتولنا ميه يا جماعة.. ميه بسرعة.

يتجمع أفراد فريق التصوير حولها.. يساعدون رامز في  
إخراج باقي جسد فوزي من السيارة ويُرقدوه على الأرض

برفق.. أحدهم يُناول رامز زجاجة مياه فيفتحها بسرعة ويرش  
منها على وجه فوزي مُدلكًا إيَّاه ومُناديًا:

- عم فوزي.. عم فوزي.. إنْتَ زِي الفل مَفِيكش حاجة  
والمصحف.

يُمسك آخر بيد فوزي لحظة، ثم يهز رأسه أسفًا، وينظر إلى  
رامز قائلاً:

- الراجل مات يا رامز.



( ٢٢ )

## قسمة ونصيب

في محطة قطارات رمسيس وسط الصّخب والصّجيج اكتظّ المكان بالمسافرين.. تباين مُتعدد في كل تفاصيل الصورة.. أشكال المسافرين، أشكال حقائبهم، أشكال القطارات وحتى أشكال الباعة الجائلين على الأرصفة.. على أحد مقاعد الانتظار يجلس شاب أسمر من عُمال المحطة يرتدى زي أزرق مُميز لهته كشيال.. يدها مُتشقتان ملمسهما خشن جلدهما سميك وأظفاره مُسخة الأطراف بفعل طبيعة عمله.. ملابسه تمتلئ ببقع شحمية مُتنوعة الحجم.. عرقه الذي لا يجف أصبح وكأنه أحد ملاعبه وجزء لا يتجزأ منها.. الشقاء وعشق المُعافرة على أكل العيش رسماً سوياً على وجهه سنوات تتخطى سنوات عُمره الثلاثين بكثير.. يجلس بجواره رجل كبير في السن يرتدي نفس الملابس لكنها كانت أحسن حالاً نوعاً ما من ملابس الشاب.. يميلان على بعضهما في حديث ظهرت جديته من ملامحهما أثناء.. الشاب كان ثائراً.. يخرج منه صوته بشكل كان يحاول أن يجعله خفيضاً قدر المُستطاع لكنه لم يستطع أن يُفهمي غبطة أو

جزء أسنانه أثناء الكلام.. تقطع حديثهما سيده ريفية بسيطة  
تحمّل فوق رأسها قفّة ضخمة ويدها كيس أسود كبير الحجم  
وتسأل أثناء مرورها من أمامها وهي تشير:

- قطر بور سعيد ده يا أخويا؟

- عدي اليمّة الثانية يا خالة.. على وصول.

قالها الشاب ثم مد يده إلى الرجل الجالس بجواره مواصلاً  
حديثاً لم نسمع بدايته:

- عهد مين ده؟

يمد الرجل كفه ويضعه في كف الشاب ويرد:

- لا إله إلا الله.

- ورحمة أبويآ كما أن مرة أنا تقصرت مع سميحة في أي حاجة  
وتعالا نشهد أي واحد من الخلق اللي حوالينا دول كلهم وشوف  
يقولك إيه.

- بدون ما أسأل ولا دياوله يا فرج.. أنا عايزك إنت تقوي

ليه اللي حصل وفين المشكلة؟

- يا عم مرسي بتك مش قادرة تفهم إن كل واحد وله  
مقدرة.. طلعت ولا نزلت أنا راجل على قد حالي.. اللي بقدر  
عليه بعمله من سُكات بس بالعقل.. تعالّ معايا فرج شروق  
زيمتني في المعهد حاضر.. نخرج مرة في الأسبوع ماشي.. لكن  
ملوش لزوم الكلام اللي يتسمم بيه بدني كل حين ومين ده.

- كلام زي إيه؟

- كل يومين ثلاثة الطلبات تكثر وتجر بعضها شوية بشوية..  
عايزة أزود دهب شبكتي.. عايزة فساتين.. عايزة أغير الموبايل..  
هي عارفة أنا لو أطول أجيلها حنة من السما مكتش هنا  
وانت كمان عارف بس مينفعش لو تجبتش يقى مَبجهاش ده  
مش كلام ناس عاقلين!

هز مرسي رأسه في تفهم فيتشجع فرج ويواصل:

- بدون ما تطلب ولا تفتح بُعها كل ما رينا يفرجها من  
عنده بقرشين من هنا ولا من هنا كنت بنتخسر في نفسي  
وأجيلها اللي تطوله إيدي من اللي نفسها فيه وأقول معلش يا  
واد ما هو برضه مش لحد غريب ومسيرها في بيتي.. غلطان أنا  
كده يا عم مرسي؟

يرد في سرعة:

- لا يا ابني.. كمل.

يُتابع فرج في أسي:

- آخرها من أسبوعين.. دبت معايا خناقة لرب السما ليه؟  
عشان بكنسل عليها قال!.. ده كلام!

يبدو على وجه مرسي أنه لم يفهم الكلمة فيشرح فرج:

- أكنيل.. أكنيل.. يعني مَرَدش على التلفون لما تتصل.

- وأنت مَرَدش ليه عليها؟

بنفاذ صبر:

- يا آبا أكنيل دي معناها مش فاضي.. مش شتيمة ولا  
قباحة يعني.

يستوعب المعنى فيهتف:

- آه وإنّ بتشتغل يعني.

- عليك نور.. ما أنتّ معانا في الشغلانة وفاهم.. وأنا  
قايّلها بدل المرّة مليون أنا شغال تحت إيد ريس ابن وسخة  
ما يبصدق حد فينا يتدير يمين ولا شمال أو يروح يصلي حتى  
عشان ينفخ أهله ودي ولا هي هنا.

ابتسم مرسي محاولاً تلطيف الجو وقال:

- بس إنّ عيبط و مش قاري دماغ النِسوان برضه يا فرج..  
كنيل يا أخي وحبّة وارجع كلمها.

- يا عم ومين قالك إنّي مش بكلمها كل يوم.. بس بتك  
عايزاني أسيب اللي ورايا وأكلم فيها ليل نهار.. عايزانا نعيش  
جو مش بتاعنا ولا هيئة شبه هيتنا.

- ما هي بنت زي باقي البنات وعايزة تعيشها يومين.

- وست البنات كمان وكنت مُستعد أشيلها على رأسي لآخر  
العمر.. لحد ما قالتها لي في وشي يا عم مرسي.

ينظر مرسي إليه مُتسائلاً.. تتجه عين فرج إلى أسفل ويقول  
في سرارة:

- قالتي إنت شبال.

يُصعق مرسي من الكلمة ويقول مصدوماً:

- بنت الكلب!.. قالتك كده!.. هي نسيت أبوها شغال

إيه!

يهز فرج رأسه ومازال ناظرًا إلى أسفل.. يواصل مرسي في

جدية:

- عندي أنا دي يا فرج.. حقك عليًا أنا.. وليك عليًا ورب

الكعبة أجيبها لك من شعرها تحب على دماغك.

- ملوش لزوم يا عم مرسي.

يُحاول مرسي الابتسام مُجددًا ويقول:

- ماين وسايس عشان أمورك تمشى يا ض.. أومال كنت

هتجوز إزاي بدماغك الحرا دي!

- سميحة أنغيرت ومعادتش هي سميحة بتاعتت زمان..

الطية المنكسرة اللي ترضى بقليلها.. بقت عينيها تروح للي في

إيد فلانة وعلانة.. يعلم اللي خلقك أنا عمري ما حيت حد

في الدنيا قد دراعي عشان هو اللي بيأكلني عيش ولما حصل

نعيب وانحطبتنا أنا يعلم الله إن بتك بقت حنة مني بس بعد

اللي قالته النهارده ويتلمحله بقالها كذا يوم يبقى كل واحد

يروح لحاله.. كله إلا كرامتي.

طل الأسي في صوت مرسي وهو يقول:

- لا حول ولا قوة إلا بالله.

- أنا رسيتك على الدور من أوله عشان إنت كبرنا  
ومينفعش أعمل حاجة بدون ما أرجعلك.

- يعنى ناوي برضه؟

ريت فرج بيده على ركة مرسي وأجاب:

- نصيب يا حجيجة.. تفضل هي زي أختي وإنت زي أبويا  
إحنا برضك بينا عيش وملح.

- لله الأمر من قبل ومن بعد.. اللي تشوفه يا ابنى ربنا  
يصلح لكم الحال.

قالها ثم اعتدل الاثنان سوياً في جلستهما ونظرا إلى الأمام في  
شروء إلى حركة القطارات يتابعاها بدون كلام.. ذابت عيونهما  
وسط الحشود التي تتحرك.

( ٢٣ )

## راسين فى الحلال

لامست قدميه رصيف المحطة هابطاً من القطار القادم من طنطا.. للوهلة الأولى شعر بالعُربة في مدينة الألف وثلاثة.. (عبد الرحمن) الشاب الريفي الوسيم العامل بشركة حليج الأقطان بطنطا.. رغم أن عمره تجاوز مُتتصف العشرينات بقليل إلا أن تلك أول زيارة له للقاهرة وكثيراً ما كان يتوق لها ولكن في ظروف أفضل من تلك التي أجبر عليها هذه المرة.. من فترة قريبة فوجيء بمديره في العمل (شوقي) ناعماً رقيقاً على غير عادته الغليظة وكأنه يُخفي شيئاً ما.. سماح بإنصراف مؤقت دون أن يطلب.. صرف مكافأة إجازة مرتين خلال أسبوع واحد وهو ما لم يحدث إطلاقاً على مدار عامين ولو مرة واحدة.. حتى أول أمس عندما عرضها عليه مديره بصراحة:

- إنت مش ناوي تتجوز يا عبد الرحمن.

ابتسم في سُخرية وقال:

- منين يا أستاذ شوقي؟

- لا منين دي خليها بعدين.. بص يا ابن الناس.. المثل يقول  
أخطب لبتك ولا تُخطبش لابنك.. وأنا عايز أنا سبك؟  
هتف مُندهشاً:

- في مين يا باشا!.. إنتَ ولادك أطفال وأنا معنديش إخوان  
بنات.. معنديش غير أمي!

- أمك مين يا بص.. أنا عايزك لأختي.

عبد الرحمن لم يرَ أخت شوقي من قبل وكل ما كان يعرفه  
عنها كباقي زملائه أنها مُطلَّقة لديها طفلتين وتعيش مع شوقي  
وأسرته في منزله بالقاهرة.. وكان يعرف أيضاً أن قرار تربيته في  
العمل أمره بيد شوقي والذي يتعمد تأجيله منذ مدة بلا مُبرر  
وبالتالي لم يكن من الحكمة أن يرفض.. وجد نفسه لا إرادياً يرد  
بخجل مُتوتر:

- دا أنا أشرف يا أستاذ شوقي بس...

يُقاطعُه بحسم:

- خلاص يقى تيجي تشرفني في بيتي في القاهرة بعد بكرة  
عل طول.. تتغدى معانا وأهو تتعرف على زهرة أختي.

في يوم الزيارة يدخل شوقي إلى منزله البسيط حاملاً أكياساً  
عديدة فتستقبله زوجته من على الباب وتحمل عنه بعضها  
ويدخلان إلى المطبخ.. هتف شوقي في زوجته وهو يُعاونها في



وضع الأكياس:

- هايزك تشهلي شوية الراجل زمانه على وصول.

- حالاً أهر.

تفض الزوجة الأكياس بسرعة وكأنها تبحث عن شيء ما  
ثم تقول له في خيبة:

- هي دي بس الحاجات اللي جبتها؟

يُجيب في غلظة:

- آه.. رز ويطاطس وخضار للسلطة وبطيخة واتنين كيلو موز  
واتنين لتر حاجة ساقعة.. عايضة إيه ناني؟

- يآدي الكسوف.. مش كنت جيت فرخة حطيناها في قلب  
البطاطس كانت هتمل شكل الصينية وتديها قيمة كده.

يرد باستنكار:

- أنتي عارفة الفرخة تمنها كام؟

تقول غير مُصدّقة:

- يا ساتر عليك.. دي في وشك.. ده عريس أختك وأول مرة

يجي بيتك!

- لسه مبقاش عريستها.. وبعدين هو كان يقدر يجيش دا أنا

ماسكه من رقبته كده.. الترقية اللي بيحفني عليها في إيدي..

وأنا برضه مش أهبل مجيش وأكلف وإحنا لسه عمل البر.

- بالعكس والله أنا قلبي حاسس إنها المرّة دي متكمل على  
خير.

يسأل بلهفة:

- اتكلمتي معاها؟

- جَسيت النبض من حبة كده.. أختك غلبانة يا سي شوقي  
متجيش عليها ومتظلمهاش.

يرد بعنف:

- متُحشوريش نفسك بيني وبين أختي.

تنكمش في ضعف وتقول:

- حاضر والله ما قصدي.. ربنا يتم لها على خير.

- ياريت ألا الواحد بقت روحه في مناخيره.. الشقة ضاقت  
علينا هي وعيالها وأنا وإنتي والعيلين.. قرف.

تُحاول الابتسام قائلة:

- إنت وعدتني بكره تفسحني أنا والعيال في المولد ده اللي  
اسمه هايبر بقالنا كبير مخرجناش.

زَجمر في عصبية قائلاً:

- إحنا لسه في النهارده ولحد ما يبجي بكره مش عايز زَن.

واقفته بإيساءة خوف من رأسها وبدأت فوراً في إعداد طعام  
العزومة الأورديجي.. بعدها بحوالي ساعتين وصل عبد الرحمن..

استقبله شوقي وتناولوا طعام الغذاء سوياً راعى خلالها أن يتحدث أمامه عن أخته كثيراً.. أخلاقها، تربيتها، رفضها للعديد من العرسان إلا من يختاره هو لها.. دوت ضحكة مجلجلة داخل أعماق عبد الرحمن لم تتجاوز أعماقه فهو يُدرك أن العادة اقتضت أن أصحاب السلع الفاسدة يُجملون في بضاعتهم دوماً.. زادت الضحكة بداخله بعدما دعاه شوقي ليُصليا معاً فطوال عامين لم يره يسجد ولو ركعة بالعكس كان دائم توقيع الجزاءات لمن يقطعون عملهم بسبب الصلاة.. استمع عبد الرحمن لحديث مُظاهراً بالإهتمام حتى نادى شوقي بصوتٍ جهوري:

- الحاجة الساعية يا زهرة..

دخلت عليهم (زهرة) أخت شوقي وهي تحمل أكواب العصير.. تفحصها.. كانت نسخة أنثوية من شوقي.. قسماً وجهها مُفتقرة إلى أية جاذبية.. جسدها مُمتلىء إثر إنجاب طفليتها من زوجها الأول.. شعرها مُجمد أكثرت أقرب إلى قوالب شعرية أندومي قبل إلقائها في الماء الساخن.. بإختصار لم تكن لتُلفت انتباه أي رجل وهذا ما لاحظته عبد الرحمن فأبتلع ريقه بعد أن تناول كوبه بيدٍ متوترة.. خرجت زهرة مُصنعة الحجل.. اقترب شوقي بوجهه ولفحت أنفاسه الكريمة وجه عبد الرحمن وقال بصوتٍ خافت:

- إيه رأيك؟

أغمض عينيه للحظة ثم ابتلع ريقه مرةً أخرى ثم رسم بصعوبة على وجهه ابتسامة وقال في استكاته:

- لا ما شاء الله الله أكبر.

- الله أكبر.. يعنى نقرأ الفاتحة بقى؟

- طبعًا.. وقبل الفاتحة كمان عايز أقولك يا أستاذ شوقي  
إني أخيرًا حسيت إني لقيت الإنسانية الكاملة من كل حاجة..  
الجمال.. الرقة.. البساطة.. الهدوء.. الشياكة.

يتعجب شوقي ويتجه يبصره إلى الباب الذي خرجت منه  
زهرة منذ لحظات:

- زهرة!

- أكيد.. دي هي دي الإنسانية اللي تقدر تشيلني.

- تشيلك في إيه؟.. إنت مش عندك بيت وأرض وأمورك  
منيرة؟

- آه الحمد لله.. لأننا قصدي تشيلني في حاجة تانية.. في  
مرضِي.

- عيان عندك إيه؟

يصمت ويطلق برأسه أرضًا ولا يردد.. يُعنفه شوقي بصرامة:

- متنطق.

- إيدز.

يتنفض شوقي من مكانه مُرددًا في هلع:

- إيدز؟!

- بس فيه أمل إني أخف.

يقول في حسرة وهو ما زال تحت تأثير الصدمة:

- يا أخي إتنبل تخف من إيه بس هي حصبة!

- أنا مش عايزك تقلق خالص مرضي مش هيكون عائق  
قدامي عشان أسعد مدام زهرة.

يقاطعه شوقي عندما يقف ويدعوه للتحرك معه ناحية الباب  
قائلاً:

- شوف يا عُبد إنتَ عارف إن كل حاجة قسمة ونصيب  
وهي أختي وأنا عارفها.. والله متستاهلك.

يتحرك معه للخارج ويتظاهر بعدم الفهم وهو يقول:

- إيه اللي إنتَ بتقوله ده يا أستاذ شوقي؟

- زي ما بقولك كده والله إحنا عيلة معيوبة واطية مَفيش  
أوسخ متنا.

يصلان في هذه اللحظة إلى باب الشقة فيفتحه شوقي.. يسأل  
عبد الرحمن في قلبه مُصطنع:

- طبعاً دي حُرَيْتك واللي إنتَ تشوفه بس بالنسبة للدرجة  
الوظيفية بتاعتني اللي....

يزيحه شوقي بيده ليُخرجه من الباب بصعوبة:

- بعد بكرة الصبح همضيلك عليها.



( ٢٤ )

## آيس كريم

بسبب طبيعة عمله لم يعتد موظف كاشير هايبر وان فـ مدينة الشيخ زايد بـ ٦ أكتوبر أن يُدقق النظر لرواد المكان خصوصًا أن المئات منهم يمرون عليه يوميًا.. لكن شيء ما شده إلى تلك الأسرة البسيطة بالذات بمُجرد مرورهم من أمامه أثناء دخولهم المكان الشهير.. زوج وزوجته وطفليهما.. ربما بسبب بساطة مظهرهم التي لا تتناسب مع ما اعتاد أن يراه من مستويات اجتماعية مرموقة نوعًا ما.. الرجل ضخم الجثة أصلع غليظ الملامح في أواخر الأربعينات يرتدى بنطالًا من القماش وجاكت جلدي مفتوح يستقر أسفله قميص مقلّم إنفكّ أوسط أزرقه بفعل الكيرش المُستدير المُتدحرج أمامه مع بعض حبات العرق التي تُزين جبينه رغم وجود التكييف المركزي.. يسحب يده أكبر أبنائه (٣ سنوات) بقسوة لم يفهمها الكاشير.. تسير وراءهما زوجة لا تقل بساطة في ملابسها.. لكن على العكس ملاحظتها طيبة.. مغلوبة على أمرها مثل أغلب سِتات البيوت.. عيناها في الأرض ترفعهما وتُديرهما على استحياء فتظهر فيهما لمعة

انبهار خجل من الجوارح العام للمكان الذي بدا أيضًا أنها المرة الأولى التي تطأه فيها قدمها.. تحمل بين ذراعيها طفل رضيع لم يتعد العام.. الزوج كان عصبيًا بشكل أو بآخر كان واضحًا في طريقة سحبه لابنه ونبرة صوته في الشخبط للطفل وأمه (اتنيل مد باض، متخلّصي في يومك المهيب على دماغك ودماغ اهلك) تفاصيل أخرى مثل قطب الجبين والنفخ تؤكد أن تلك الخروجة كانت على غير رغبته من الأساس.. قبل اختفائهما من أمامه التقطت أذنا الكاشير بالكاد جملة قالتها السيدة لزوجها (فكها يا أبو عمر، فكها خلي رينا يفكها إحنا جايبين نبيسط). نسي أمرهم تمامًا وانشغل في عمله حتى فوجئ بعد ساعة أو أقل بصوت عالٍ عند كاشير آخر وراه.. التفت بسرعة ليتابع المصدر.. وجدها نفس الأسرة.. الزوج يقف في مواجهة زوجته وقد استشاط غضبًا:

- علياً الطلاق مهشترى حاجة تاني.. أنا منبه عليكى قبل منخش.

نظرت الزوجة قليلة الحيلة في الأرض وهمست في ضعف:

- والله العظيم هو اللي شبط.. والله مقولته حاجة.

- وحياة أمك ايعنى الواد شب وفتح التلاجة وخذ الدولسي ونزل.. أهبل أنا.

الطفل ذو الثلاث سنوات يُمسك بعبوة الأيس كريم ويقف حائرًا بين أبوينه ناظرًا إلى أعلى ينقل نظره بينهما غير مُدرِكًا لما يجري.. الصوت العالٍ يبدأ في جذب الناس تدريجيًا.. ترد



الزوجة محاولةً الابتسام:

- خلاص ميجراش حاجة أنا هدفع تمنها.. دي كلها باتنين  
جنيه.

- عليا الحرام منك لا هدفعي ولا هدفع عشان تبطلني سهنتة  
الحريم بتاعتك دي.

تلتفت الزوجة حولها في خجل عندما تلاحظ أنها أصبحت  
مشار اهتمام أغلب الناس في المكان وبدأوا في التجمع حولها  
فتقول:

- طيب خلاص بلاش مش مهم بس بالراحة.. عشان خاطر  
رينا الناس بتبص علينا.

أشاح الزوج بيده في عصبية غير مُبررة:

- بلاناس بلا خرا دا إنتي تقرفي بلد إنتي وعيالك.. أنا  
غلطان إني دخلتكم أماكن نضيفة زي دي.. انتوا آخركم تترزعوا  
في البيت.

بصوت تخنقه الدموع مواصلةً تلفُّتها حولها وقد ابتلعها  
الخجل قالت:

- كفاية الله يخليك.. كفاية.

يواصل بعصبية:

- غوري غوري دا إنتي طهقتيني.. دا أنا شايل منك ومعبي.

خيئت الحالة العصبية على الأجواء وفرضت نفسها.. الموقف



- إنتي طالق.

قالها وخرج فوراً مُلقياً ما كان بيده من مُشتروات عمل الأرض.. كأنَّ الزوجة لم تسمع العبارة.. سحبت نفساً عميقاً ثم ابتلعت ريقها.. شدت يد ابنتها الأكبر وأمسكتها بيمينها في قوة.. عدّلت من وضعية رضيعها على زراعها الأيسر ثم عدّلت من وضع الطرحة على رأسها.. مسحت خدها في سرعية وبمُتهسى القوة.. تحركت إلى الخارج بخطوات ثابتة واثقة.. بدت بمراحل أكثر حيوية وحرية.

( ٢٥ )

## فى الدنيا الواسعة

بعد أن قام بأداء الأمانة اليومية الثقيلة المتمثلة فى تسليم محتويات خزيتته المسئول عنها ككاشير فى هايزر خرج أحمد من مكان عمله فى طريقه إلى منزله.. كان يشاق إلى سريره؛ ليُلقي فوقه جسده الضعيف المُتهك من عَناء وقوف ١٢ ساعة كاملة على قدميه دون انقطاع.. مع الوقت اعتاد على طول ساعات العمل لكنه يفشل دومًا فى الحفاظ على عينيه مفتوحتين بعد خروجه من باب عمله حتى وإن تناول لترات من القهوة.. كان القلق ينهش قلبه على والدته.. لذلك وقبل أن يعبر الطريق كان أول ما فعله هو أن أخرج هاتفه - (المنوع استخدامه أثناء العمل) - ليطمئن على صحتها من خلال اتصال بوالده. فحسب الاتفاق كان المُفترض أن يكونا قد انتهيا من زيارة الطبيب الرابع على التوالي لفحص حالتها.. طلب الرقم وجاءه الصوت الآلى بأن الهاتف مُغلق.. بدأ القلق حمل وجهه وغمغم:

- استر يارب.

حتى يصل إلى مكان ميكروباصات الحرم التي ستقله كان عليه أن يعبرُ إلى الجهة المقابلة من الطريق المُقسَّم طوليًّا إلى حارتين يتخللهما رصيف في المُتصف.. بخطوات ناعسة مُتأقلمة عبر النصف الأول الشبه فارغ من السيارات والمارة ووقف على الرصيف استعدادًا للعبور إلى النصف الأكثر ازدحامًا.. في المعتاد يتم إيقاف أغلب إشارات المرور عن العمل في الثانية عشر بعد مُتصف الليل لكن هذا اليوم كان واضحًا أن خللاً ما أصاب إشارة المرور فأضاعت ألوانها الثلاثة مرّة واحدة مما جعل السيارات تسير بفوضوية وبسرعات جنونية غير عابثة بأرواح الناس التي قد تُزهِق.. انتظر قليلاً أملاً في هدوء الحركة إلا أن الوضع استمر بنفس السوء.. فكّر قليلاً وتوصّل إلى أنه لو استمر في مكانه للصباح لن يتغير أي شيء ومن ثم قرر أن يُحاول.. دبّ النشاط في جسده فجأة ونسى كل تعب واستجمع تركيزه.. أخرج منديلاً من جيبه ومسح نظارته الطيبة ثم ارتداها.. أخذ نفسًا عميقًا ونزل من الرصيف وهمّ بالعبور لكن مرور سيارة مُسرعة أمامه ردّه مُهرولاً في لحظةٍ حيث كان.. سقطت نظارته على الأرض.. ضحك على حاله ولمح بطرف عينيه مَنْ يضحك عليه أيضًا.. نظر فرآها بجواره على مسافة ٥ أمتار فحسب.. فتاة لا تزيد عن ١٨ عامًا.. عالقة بالموقف ذاته وأمارات نفس الحيرة التي تتابه على وجهها.. شبك ذراعيه أمام صدره في عناد.. رآها تُحاول تجربة ما كان يفعله قبل ثوانٍ.. أعادها خوفها مثله فوق الرصيف مرّةً أخرى.. ضحك فنظرت له بغضبٍ فهتف:

- طب إليه طيب.. هنفضل هنا للصبح ولا إيه؟

هزّت كفيها في حيرة.. شجعا بعضهما بالنظرات وتحدّنا بها..  
بدون كلام اتفقا أن يعبرا سوياً.. نظرت إليه في انتظار إشارته..  
قال لها بعينه (يالآ) هزّت رأسها موافقة.. ينزلان قدميهما في  
نفس التوقيت بمُحاذاة بعضهما من على الرصيف.. فووووو..  
سيارة ثالثة تُعيدهما إلى الرصيف.. أصبحا مُتفاهمين ويفهم كل  
منهما الآخر وكانت تستوعب كل ما يقوله في صمت.. أعجبتهما  
اللعبة.. كزّراهما.. أكثر من خمس مرّات ومع كل مرّة يتكرر  
الفشل وترتفع ضحكاتهما أكثر ومع كل محاولة يذوب فارق  
المسافة بينهما تدريجياً حتى أصبحا شبه مُلاصقين.. مدّ أحمد  
يده.. ترددت الفتاة لكن استمرار ابتسامته مع يده الممدودة  
دفعها إلى إمساك يده.. مرّة واحدة وسوياً انطلقا جرياً.. وإبل  
من كلاكسات السيارات المُعرّضة وألفاظ ساقفيها التي تلعن  
هذا الجنان لم توقعهما هذه المرّة.. مع بعضهما كانا أكثر جنّاناً  
لكنهما كانا أشجع، أقوى وأنجح  
- شكراً.

قالتها في مَرِح فرُدّ عليها:

- شكراً على إيه بس مفيش حاجة.. وعييل فكرة أنا بقف  
أتلخم هنا كل يوم نفس اللخمة في نفس الميعاد فلو حيتي  
تعدي يعني أنا موجود.

رفعت يدها وأشارت له بالتحية.. ودّعها بابتسامة.. سار كل  
منهما في اتجهاه.. بعد أن ابتعدا قليلاً التّكت وراهه وهتف بصوت

عالٍ وهو يرجع بظهوره:

- مشرفك تاني؟

التفتت وراءها أيضًا وهتفت:

- أكيد.

- فين؟

- في الدنيا الواسعة.

أرسل لها قُبلة استقبلتها ثم ردتها إليه وواصلت طريقها..  
ظلَّ يُتابعها.. نسي أن يسألها عن اسمها أو عنوانها.. كان يشق  
أن هذا الموقف لن يُمحي من ذاكرته وأن الحديث بينهما لو كان  
استمر لدقيقة واحدة أخرى فقط كان سيتزوجها.. أمّا هي فقد  
شعرت بشيءٍ مُختلف بعد أن أصغت لصوت أقوى سلاح في  
الوجود.. قلبها.. شعرت أنها أحبته.

( ٢٦ )

## ستر وغطا

من الباب الخلفي لذلك المبنى الطبي الضخم في منطقة فيصل بالجيزة الذي نكتظ شققه بعيادات لأشهر الأطباء في مختلف التخصصات خرج العجوزان.. رجل كهل تستند عليه سيدة كبيرة في السن يبدو أنها زوجته.. أعمارهما جاوزت السبعين عامًا.. مظاهر التعب والإعياء بادية بشدة على وجه الزوجة وتقوم قدماهما بالكاد على حملها.. يحمل الزوج تحت إبطه عدة ملفات طبية وأشعة.. يسيران ببطء يتناسب مع عمرهما ومع حالة الزوجة.. باب المبنى الذي خرجا منه أمامه مباشرة الجانب الأيمن لسرادق عزاء ارتفعت من داخله عبر الميكروفون صوت تلاوة للقرآن الكريم فأضفت جواً حزيناً إضافياً على مشهد خروجهما.. السيدة كانت تبكي بشكل واضح للعبان والرجل انسابت دموعه في صمتٍ على خده رغماً عنه وحاول أن يدارسها قبل أن يقرر أن يكرس هذه الحالة فقال لها بصوت خرج مُتحرّجاً رغماً عنه:



- والله العظيم هتبقى كويسة متصدقيش كلام الدكاترة.

رَدَّتْ باكية:

- هموت.

- تلاقيه قال كده عشان قولنا له مش هنقدر على ثمن الفيزية بتاعته تاني ففقلها في وشنا ابن الحرام.

- هموت والله أنا قريتها في عينيه.

يقول بانفعال:

- يا بعوي على ميتين أم السيرة دي.. وكتاب الله مهحصل متوهميش نفسك في عرض النبي.

- كان بيتكلم بجد..

- لا بجد ولا حاجة.. إيه رأيك بقى أنا استريحمت للي قبله أكثر منه.

- بس ده دكتور كبير وفاهم.

- ده حمار وبعدين إنتي إيش فهمك في اللي فاهم ومش فاهم.

- ربنا يعلم أنا مش خايضة من الموت وبدعي إنه يطول في عمري بس عشان مش عايضة أسيبك لوحدك إنت وأحمد.

- وهو عارف إننا من غيرك ولا نسوى.

توقفت عن السير وتعمّدت النظر إلى عينيه باستجداء:

- سايقة عليك حبيك النبي يا عزت متسيني.

- بعد العمر ده كله يا فاطمة!.. دا إحنا مَطْلَعناش من الدنيا  
إلا ببعض أنا وأنتي وجِنة الواد اللي جه على كُبر.

- وعد؟

- تعالي تنفق اتفاق عشان أطمئنك.

نظرت إليه مُسائلة دون أن تنطق فواصل:

- إنتي بعد الشر بعد الشر بعد الشر ألف مرّة الله لا يقدر  
لو حصلك حاجة والله هموت وراكبي على طول ومش هسيك  
برضك.. هروح فبين يعني.. خلاص بقى.. خلاص وحياة  
النبي يا شيخه.

نطقها وهو ينكزها بقبضته بلطف في جانبها وطبطب على  
كفها وضَمَ رأسها على صدره وقبله.. كأن طبطبته دَبَّت الروح  
فيها مرّة أخرى.. التفتت وقلبت أصابع كفّه الموضوعة على  
كفها فحباها بسرعة.. قرأ في حينها اعترافًا بالجميل وحبًا  
مُندفقًا وأدرك قلبها كل ما يجب أن يُدركه ويحتاجه لكي يستمر  
في الحياة.

( ٢٧ )

## ركعتين وبسة

حتى بعد تجاوزه الـ ٧٠ عامًا ظلت العلاقة بين (عزت) وبين ربه كأغلب الناس علاقة مصلحة من طرف واحد.. هم بالطبع هذا الطرف.. خلال الأزمات والحظات الفراق تبلغ منهم الروحانية مبلغها.. صلاة في المسجد لأغلب الفروض اليومية.. دعاء لا ينقطع.. شلال من أعمال الخير قدر الاستطاعة.. خلال أزمته الأخيرة وبعدها أكدت التحاليل الخاصة بزوجه أن أياها في الحياة معدودة.. مسألة شهور فقط.. هو يُدرك أنه لن يتمل الحياة بدونها يوماً واحداً، ويعلم أنها تعلم أنه يكذب عليها ويُجمل الصورة.. رغم ذلك اتخذ قراره ألا يُخبرها وابنتها وقرر أن يتحمل العبء النفسي وحيداً.. قادتته قدماء إلى المسجد وقت صلاة الفجر عليه يجرد في ركعتيه مُحْفَفاً ريانياً.. وجد نفسه آخر شخص في الصف الأخير.. لحظات ولمح بطرف عينه شاب صغير يأتي من الخلف بخطوات مُترددة.. أفسح له قليلاً ف شعر أنه بالمعنى الحرفي (يقدم رجل ويأخر رجل ا). إلتحق بهم ثم وقف على شماله.. دخل معهم في الصلاة من بداية الركعة الأولى

بعد سورة الفاتحة مباشرة.. لاحظ أن حركاته غير طبيعية ولكن زاوية وقوفه الموازية له لم تكن تسمح باستطلاع المزيد عن هذا الجار المؤقت.. تخييط مُستمر في الكتف.. سجود وركوع بحركات مُتوترة مابعة وغير مُتوافقة مع الجماعة.. حركة يده ووضعية قدمه مع صوته القادم من أعماق سحيقة في ترديد كلمة (أمين) وكان صاحبه سكران أو نصف نائم.. تدريجياً وجد نفسه بسبب تلك الأفعال يفقد تركيزه في الصلاة.. تمسّ وقتها أن تنتهي الصلاة سريعاً ليلتفت إليه ويصب عليه جام غضبه ويُسمعه كلمات من نوعية:

- الصلاة ليها احترامها.. لو مش قد الصلاة ضلي في بيتكم أحسن.

(السلام عليكم ورحمة الله. السلام عليكم ورحمة الله). التفت إليه وأجمله الصمت تماماً.. وجدته صبي عمره لا يزيد عن ١٥ عاماً.. نُصاحبه إعاقه مُزمنة في يده وقدمه.. وأن كل ما كان يظن أنه مياعة ودلع كانت تختفي وراءه قوة وإرادة تُحاول أن تقف على قدمين لتصلي.. احتقر نفسه.. خرج من هذا المسجد وبداخله قناعة تامة حدّث نفسه بها بصوت عالٍ قائلاً:

- يا همار إنت مش حاجة عشان تحكّم عيل غيرك من بزه ولا من جوّه.. إنت مش حاجة عشان تحكّم على غيرك أصلاً.. ساعني يا رب واشفيها.. ساعني يا رب واشفيها.

( ٢٨ )

## مزايا نجي

عند أي حالة وفاة كان مبدأهم أن يكونوا في غاية الحرص على حضور مراسم الدفن والتحاشي قدر الإمكان لأي فرصة للتواجد داخل سُرَادِق العزاء نفسه.. فبالنسبة لأفراد الشَّلَّة الخمسة كان مجرد الجلوس داخل السُرَادِق على صفوف الكراسي المتقابلة يعنى دومًا موجة من الضحك المستيري بسبب أو بدون.. مشهد يجيى الفخراني في سُرَادِق العزاء بفيلم الكيف كان يُهاجم خلايا مخهم بالحاح كلما جاءت السيرة أو وضعوا في الموقف.. لكن هذه المرة كان الأمر مختلفًا فالتوفى هو والد صديقهم الأتيتم (شادي) وهو ما يُحْتَم عليهم التواجد في العزاء من البداية وحتى انصراف آخر المعزيين فلن نُجدي نفعًا أي محاولة للفرار أو التزويغ.. أمام نداء الواجب تباشى التردد ووافق الكل على الذهاب وتعهدوا بالصمود والتماسك وعدم الضحك.. إلا (حسام):

- بلاش أنا يا اخوانا.. اسمعوا كلامي بلاش.  
حسام طيب بالفطرة.. اللي في قلبه على لسانه.. ضغطوا عليه.

رفض.. ضغطوا أكثر فوافق.. لكن ظلت الريبة من (حركات حسام) في صدور الجميع تُسيطر على الموقف فلم يكن المطلوب فقط ذهاب حسام بل كان الرهان الأكبر أن يبقى حسام صامنا لأطول فترة ممكنة.. بعد تفكير جاء الحل على لسان أحدهم:

- بص يا سمس مسيجارة حشيش هتظبطلك الأداء و هتخليك لا مركز في اللي بيتقال ولا في الناس.. تقعد الشوية اللي هتقدمهم وتُكت.

حسام ليس من مُدمني المكيفات ولا السجائر.. حتى الشاي والقهوة والكوكاكولا وكافة المُنبهات لم تعرف طريقهاله من قبل لكنه وافق.. أو أُجبر على الموافقة.. وحتى يكتمل الأمر برمته ألقاها في وجوههم جميعًا مُخدرًا:

- يا زفت منك له أنا هحاول أمسك نفسي... بس ياكش حد يصلي.. انتم حُرِين بقی.

تجمعوا وتحركوا سويًا إلى السُرادق في منطقة فيصل أمام المبنى الطبي الشهير.. جلسوا وسارت الأمور على ما يُرام.. حسام لا يبدو على طبيعته بشكل أو بآخر لكنه صامت وهذا هو الأهم.. مرّ الوقت ساعة تلو الأخرى ومع كل دقيقة تمرّ يتنفس الجميع الصعداء.. فرغ الصوان بالتدريج وحن وقت الانصراف.. نظروا إلى بعضهم البعض كما اتفقوا.. وقفوا صفاً وإجدًا لتغزية شادي وتعهد الكل أن يكون حسام آخر شخص فيه.. جاء دوره.. أمسك بيد شادي مُدة أطول من المعتاد وهو يترنح ثم ألقاها أمامه في ثقة:

- ..... البقاء للأقوى.

( ٢٩ )

## حباية زرقا

بحث القارئ الشيخ (جودة السحرتي) بمُجرد انتهائه من تلاوة القرآن في الجنازة على أقرب صيدلية.. رغم تجاوز الشيخ الستون عامًا إلا أن صوته ما زال مُحافظًا على نضارته مما جعله مقصودًا دائمًا في المناطق المحيطة لأي مناسبات دينية.. في مشاوير العمل وغيرها يحرص على ارتداء العمة البيضاء والقُفطان الأزرق الزبي الأزهري المميز لرجال الدين حتى أصبح جزءًا لا يتجزأ من شخصيته.. لم يدم بحثه طويلًا فوجد صيدلية دلف إليها في سرعة.. رأى شاب وفتاة يتناويان على تلبية طلبات الزبائن.. ويرغم انتهاء الفتاة وتفرغها بعد لحظات قليلة من دخوله إلا أن جودة تعتمد الانتظار حتى فرغ الصيدلي الشاب تمامًا فتوجه إليه وقال:

- سلام عليكم.

- وعليكم السلام ورحمة الله وبركاته يا مولانا.. اتفضل..

تلقت حوله في سرعة ثم مال عليه وقال هامسًا بخجل:

- قرص فياجرا.

يذهب الشاب لتلبية طلبه ويعود مُسكًا بالعلبة الزرقاء  
ويُررها على جهاز تقييم السعر ويُجبر جودة به.. يدس يده في  
جيب القُفطان ويُخرج النقود ويُعدها بحرصٍ.. يسأله الصيدلي  
بإشاعة:

- مولانا ممكن سؤال؟

- طبعًا.. اتفضل.

- معلش متآخذنيش يا مولانا.. هي ليك؟

يُقطب جودة جيبه ويرد في ضيق:

- أيوه.. فيه حاجة؟

يعيل الشاب عليه ويُجيب هامسًا:

- متزعلش مني أنا زي ابنك.. خلّ بالك لأنها لوليك  
وفي سنك ده ويدون استشارة دكتور هيقى فعلاً حرام عليك  
نفسك.

يُخطف جودة الحبة الزرقاء من يد الصيدلي ويرد بصوتٍ  
عالي:

- بقولك إيه.. أنا لسه شباب وأعفى منك.. وفر نصيحتك  
لنفسك وملكش عندي غير تمن الحباية.

يقولها ثم يُلقي أمامه ورقة نقدية بأكثر من الرقم المطلوب  
ويواصل بنفس النبرة الغاضبة:



- وأكثر من تمنها كمان وخلي الباقي عشانك.

في طريق عودته إلى المنزل مرّ على أحد محلات الجزارة القريبة منه وابتاع ربع كيلو كبدة.. وصل الشارع وقبل بلوغه مدخل العمارة حانت منه التفاتة ناحية شرفة شقته فوجد زوجته (عزة) ذات التسعة عشر ربيعاً تُتابع بشغفٍ مجموعة من الأطفال يلعبون في الشارع.. تراه ويتجهّم وجهها ثم تدخل.. يصعد وقبل أن يفتح باب الشقة يُخرج حبة الفياجرا ويُقسمها نصفين يتلع أحدهما ويلقي بالنصف الآخر داخل جيب القُفطان قائلاً بصوتٍ خفيض:

- توكلنا على الله.

يدخل فيلمنحها تقف في المطبخ مُمسكةً بطاسة تضعها فوق البوتاجاز.. تلاحظ دخوله فتهتف بصوت ضجر دون أن تلتفت إليه:

- معملك تاكل.

يقرب منها ثم يُناولها اللّفة التي في يده قائلاً بوٍد:

- شوخيلنا حتة الكبدة دي.

تدفع يده ثم ترد في حَسَم:

- لا.. هتاشوية فول وحمرك معاهم بطاطس وتحمدرنا على كده ده اللي في جهدي أعمله.

يُمسكها من ذراعها ويلفها لتصبح في مواجهته:

- معناه إيه الكلام ده يا عزة.

- أهو ده اللي عندي ولو عاجبك.

ينهرها في جدة:

- احفظي لسانك وإنسي بتكلمي معايا يا بت بدل ما أدفئك

مكانك .

تلقى بالطاسة على الأرض وتحاول شق جليباها صارخة:

- ادنفي موتني أقله تريحني من القرف اللي أنا فيه.

. يصفعها على وجهها ويهتف في صرامة:

- إنني بتعلي صوتك عليًا يا بنت الكلب.

- هو كلب عشان رماني لواحد زيك.

يفتح عيناه في ذهول ويقول:

- بتشمتي أبوكي يا فاجرة!

تواصل صراخها بنفس النبرة:

- أبوه وفضل أدعي عليه ليل نهار عشان رماني لواحد  
زيك.. يا أخي حس بقى خلتى عندك دم.. ٣ شهور متجوزين  
ولته بنت بنوت زي ما أنا.

تصدمه العبارة السابقة ويبدو على وجهه الارتباك ويتلعثم:

- هو ده اللي همك ويس!.. مش شايفة ساكنة فين.. لابس  
إيه.. اللي بتعوزيه بيتجاب.. مش ناقصك حاجة!

- ناقصني أبقى أم.

يُدير ظهره إليها ويقول في حسم:

- وأنا متفق معاك ومع أبوكي من الأول مَفيش عيال.

وضعت يديها حول وسطها وردّت:

- ما طبعًا.. إنْتَ هتعوّز تخلف ليه.. ما إنْتَ إتجوزت  
وخلفت وسفرت ابنك يتعلم برّه كمان.. لكن الكابة الخدامة  
اللي عايشة معاك مَلهاش حق.

بصمت لحظة ثم يلتفت إليها ويربت على كتفها مُحاولًا  
الابتسام:

- أعود بالله من الشيطان الرجيم.. تعالي نخش جوّه يا بنت  
الحلال وكله هيتصلح بإذن....

تزيح يده في عنف وتهتف:

- وحياة ديني يا جودة مهتلمسني ولو شوفت حلمة ودنك.

يرفع أصبعه أمام وجهها مُحذّرًا:

- خدي بالك إنتي كده ناشز.

ترد بسُخرية:

- الشويتين دول تعملهم على حد غيري يا مولانا.. إنْتَ لا  
تعرف دين ولا تعرف ربنا.. الدين يا بتاع ربنا ميقولش تحرمني  
أشوف الشارع وأزور أهلي.. ميقولش تتجوزني وإنْتَ عارف إنني  
بحب غيرك.. ميقولش تشتري عيلة مكملتش ٢٠ سنة وإنْتَ

معدّي الستين بحبة حلوين.

يصفعها بقسوة فتصرخ:

- طلقني. خلّي عندك كرامة وطلقني.

- والله ما هيحصل لو وقفني على إيديكي ورجليكي.

- عشان مش راجل.. مش راجل.

كانت كلماتها بمثابة سهم نفذ إلى قلبه مباشرة ومزّقه.. ظلّت تُرددّها وهي تصرخ فأمسك رأسها وانهال عليها بالصفعات والركلات فبادلته الضرب.. عجز جسده الضئيل على مقاومتها وأزاحته.. فأتسعت عيناه في ذهولٍ وتركها ودخل مُسرّعاً إلى غرفة ابنه وأغلق بابها خلفه.. لم يشعر بنفسه إلا والدموع تملأ عينيه وتنساب منها على وجهه فأطلق لها العنان.. خلع عمامته وألقاها على المكتب في انهيار ثم سحب كرسيه وجلس فوقه.. دفن وجهه بين كفيه.. رفع وجهه ومن بين دموعه رأى صورة ابنه الموضوع على المكتب.. التقطها في مرارة.. أراد لو كان أمامه في هذه اللحظة ليقفز ويمتويه بين أحضانه.. قَرّب الصورة من فمه وقبّلها.. كان يشعر لأول مرة بشيءٍ مُختلف لم يُجرّبه من قبل.. أنه يتيم.. يتيم الابن.

( ٣٠ )

## ابعتلى جواب

مُحْتَمِيًا بصحيفة فوق رأسه من الأمطار التي تهطل بغزارة في شارع (Rue Daguerre) يدخل (عصام) مُسرِعًا إلى باب السكن الجامعي الذي يسكن فيه في باريس.. بمُجرد دخوله ينفض عن معطفه ورأسه قطرات المطر العالقة.. تدريجيًا يسرى الدفء في أوصاله.. يخلع القفازات من يده ويفرك كفيه بسرعة ويوجههما نحو المدفأة الموضوعة في مُنتصف الردهة مُحاولًا بث بعض الدفء فيهما.. يقترب منه موظف الاستقبال ويهرع لمساعدته بخلع معطفه عنه.. يشكره عصام فيمد له الموظف يده بظرف مُغلق يناوله إياه قائلاً وعلى وجهه ابتسامة:

- Essam vous avez reçu un enveloppe d'Egypte,  
l'enveloppe de chaque moi

تهللت أساريه وأمسك بالظرف بسعادة بالغة و رد على  
الموظف بسرعة:

- Oh merci, j'espère que je ne gênes pas

كان (عصام) ينتظر خطابات والده الشهيرة بفارغ الصبر..  
فالعلاقة بينهما من نوع خاص تفوق علاقة الأب بابنه الوحيد..  
لم تبعدهما الغربة يوماً بل لعلها زادتتهما قرباً.. فبسبب والده  
وقراره الأهم ببيع قطعة الأرض الوحيدة التي يمتلكها في  
المنصورة ما كان ليتواجد حالياً في عاصمة النور ليدرس ويكمل  
تعليمه.. يعمل ثلاث أيام في الأسبوع عامل ديلفري في مطعم  
يبتز لكنه يتفرغ باقي الأيام لدراسة الهندسة في جامعة باريس  
الخامسة (ديكارت) السبب الأساسي لسفروه.. يتذكر كلمات  
والده له حينها:

- طُظ في الأرض والقلوس أنا مش عايز حاجة.. إنت  
رصيدي في بنك الدنيا.

يدين له أيضاً من قبلها إصراره على عدم الزواج بعد وفاة  
زوجته وأم ابنه الوحيد؛ مُراعاة لشعور الأخير وكى لا ينشأ في  
جو تشوبه أي لمحة عُنصرية من امرأة غريبة، فقالها حاسمة  
لكل من رشح له عروسة جديدة:

- أنا مش هجيب لابني مرات أب.. هريه لوحدي ورينا  
يعين ويقدر.

حتى عندما أصّر والده بعدها الشيخ الأزهرى على الزواج  
من فتاة تصفروه بأكثر من ٥٠ عامًا كاملة ورغم اعتراض أغلب  
أفراد العائلة لم يُناع عصام مع تحفظه على فارق السن الكبير إلا  
أنه كان يرى أن هذا أقل حق لوالده.. فردّ الأخير عليه في أحد  
خطاباته السابقة:

- أمك عمرها مهتمعوض يا عصام.. مَفِيش أم بتعوض..  
بس أنا محتاج حد يراعييني وإنْت سافرت تشوف مُستقبلك..  
أكيد فاهمني.

والده يكره المُحادثات الهاتفية بشدة خاصةً مع كلفتها  
الباهضة للدولية منها فكانت الخِطابات هي الحل الأمثل  
للتواصل مع ابنه من خلالها وكأنه أمامه.. تارة يُجدّثه عن  
مشاكله مع زوجته أو مع الجيران أو حتى طرائف عمله.. ققطع  
درجات السلم قفزًا ولحظات وكان في غرفته بالطابق الثاني..  
فحص الخِطاب.. ودون أن يُغيّر ملبسه إلتهم سطره بعينه في  
نهم وتبدّلت ملامح وجهه تدريجيًا مع وصوله إلى نهاية السطور  
تقريبًا:

(الناس كان عندهم حق يا عصام.. أنا عشت سن مش  
سني وهي برضك شابة ومعذورة ليها طلباتها وأنا كنت  
عايز حد يأخذ بحسي بدل الوحدة رينا ما يكتبها على حد  
وأرجع وأقول أنا معايا عذري إني مَعَمكش حاجة تغضب  
رينا واتجوزت على سُنّة الله ورسوله.. مش عيب نغلط لكن  
عيب نكابّر في الغلط.. أنا هطلق بكرة بعد العشاء إن شاء الله  
يعني عقبال ما الجواب يوصلك هتكون كل حاجة خلصت..  
حقك عليا يا ابني إني بشيلك همي وإنْت في الغُربة بس أبوك  
ضهره انحنى وضعف ومحتاجك جنبه حتى لو بسماحك كلمتين  
فارغين هيهلفط بيهم معاك على الورق.. اتغطى كويس وإنْت  
نايم وبصر يمين وشمال وإنْت بتعدي السكة وخلي بالك من  
روحك.. بدعيك وإدعيلي.. السواد أمين ابن عمك شاكر هو

اللي بيكتب الجواب ويهديك سلامه.. السلام ختام لا إله إلا  
الله

انتهى من القراءة وطوى الخطاب ثم ألقى بجسده فوق  
السرير مُطلقاً زفرة حارة وهو يقول:

- يا وجع قلبي عليك.. وبعدهالك يا شيخ جودة.

يرن هاتفه رنة قصيرة مُعلنًا استقباله لرسالة على الـ  
whatsapp.. تذكّر أنه كان قد بدأ مُحادثة كتابية مع صديقه  
الوحيد ياسر واضطر لإغلاق المُحادثة عقب نزوله من الأنوبيس  
وهروبه تحت سيل المطر على أن يُعاود الحديث معه بعد وصوله  
إلى السكن لكنه نسي.. التفتَ والتقطَ الهاتف من جواره وقرأ  
الكتاب بسرعة:

- وصلت ولالتّه؟

كتب يرد عليه:

- معلش يا ياسور اتاخرت شوية.. حصل حوار كده.. كنا  
بنقول إيه؟

- طيب عشان مَطولش عليك.. أنا خلاص قررت.. هروح  
أُقدم لها بكرة.

- مُصمم؟

- جدًا.

ضغط على الشاشة بعصية وهو يكتب:



- الأمور مش بتمشي كده يا ياسر.. اللي عايز تعمله ده  
جنان.. خذ وقتك إنت مش مستعجل.

- الفرصة مش هستتاني وبعدين هو إيه في الدنيا مَبْتَدَاش  
بجنان!

يكتب بنفاذ صبر:

- اللي عايز تعمله إعمله يا ياسر.

- عصام إنت شايف إني ناقصني حاجة؟

يتردد عصام في كتابة الرد.. يكتب ثم يمسح ما كتب عدّة  
مرّات.. فيُرسل ياسر:

-!!!!.

يحسم عصام أمره ويكتب ثم يُرسل:

- يا ابني إنت إنسان مش عادي.

- بس طلبي عادي!

- قولتك إنت حُر.

- إنت مالك بتكلم معايا كده ليه.. إيه الطريقة دي يا  
عصام؟

- معلش يا صاحبي مقريف ثنوية.. أنا آسف لازم أقفل  
دلوقتي.

كتبها ثم أرسلها وألقى بالهاتف فوق السرير دون انتظار

الرد.. توجه نحو النافذة يُراقب الجو بالخارج وقد اشتد هطول  
الأمطار وحركة الرياح التي لاحظ أن الأشجار بسببها كانت  
تنحني وتتراقص فوق فروعها على جانبي الطريق.. كأنه يُريد  
من خلال مُتابعته للصورة بالخارج أن يتخلص من عبء ما من  
على صدره.. لحظة وفتوا نظره.. تسعة أشخاص.. رجال  
و٤ سيدات.. كلهم تخطوا الخمسين عامًا.. يسرون في مُتصف  
الشارع غير عابئين بهذا الطقس القاسي يرقصون ويغنون  
يعزفون!.. كانوا يفعلون هذا بشكل تقليدي ومدهش.. فتح  
الشباك فاندفع الهواء حاملًا رائحة المطر إلى أنفه وإذا برجفة  
باردة تسري في جسده.. تسلل إلى أذنيه صوت المزيكا التي  
يعزفونها بانسيابية وأصوات ضحكاتهم أثناء الرقص.. كانوا  
مُبهبين.. طرأ أمرٌ ما في رأسه.. تردد.. حسم تردده والنقطة  
هاتفه وألقاه في جيب سترته الجلدية وارتداهما في سرعة وهبط في  
طريقه إلى الالتحاق بهم.. مرّ على موظف الاستقبال الذي صُعب  
لرؤيته يستعد للخروج فقال له مُندهشًا مُحاولًا تحذيره من قسوة  
الطقس بالخارج:

- OÙ allez-vous ? La pluie est très forte,  
vous allez tomber malade

رد عليه وهو يواصل العدو للخارج غير عابئ وصائحًا  
بإتسامة:

- Oh non pas de problème, j'aime la pluie

بدون مقدمات وجد نفسه ينضم إليهم في الدائرة الراقصة  
ويحرك قدميه ويديه بنفس حركاتهم.. اندمج وسطهم.. غطت  
مياه المطر وجوههم وملابسهم لكنهم لم يبالوا.. ذاب معهم في  
الموسيقى وبين حروف الكلمات التي لم يُدرك بعضها.. سيطرت  
عليه الحالة.. أصيب بالرشح وبدأ شفثاه ترتعشان وعيناه كانت  
شديدي الجفاف إلا أنه واصل الرقص والغناء غير عابى بها  
سواهما.. توقف لحظة وأخرج هاتفه من جيب سترته الجلدية..  
طلب رقماً ما وجاءه صوت ياسر صديقه مُندهشاً على الطرف  
الأخر:

- عصام!.. خير إنت كويس!

صاح عصام بصوت عالٍ:

- روح وقولها في وشها يا ياسر.. لو تقدر النهارده كمان  
يبقى ياريت متستناش لبكرة.. إنسى كلامي.. إحنا بنعيش مرة  
واحدة بس.. إنت صح يا صاحبي.. إنت صح.

دون أن يتظر رده يُغلق الهاتف ويُعيده إلى مكانه ويواصل  
الرقص والغناء بمتهى الاندماج والحب.. قفز إلى ذهنه حينها  
المثل الفرنسي (نأتي إلى الدنيا أطفالاً ونُغادرها كذلك أيضاً)  
ووجده تجسيداً حياً لحياته والديه.



الأعمال الكاملة

[t.me/kotbhm](https://t.me/kotbhm)

# شيكولاتة بيضا

عن العيشان والقي حاشيتيها

بدأ الأمر بمعلومة غريبة عرفتھا من صديق يعمل 'شيف' في أحد الفنادق الشهيرة:

- عارف... الدنيا دي عاملة زي الشيكولاتة، البيضاء.

- اشمعنى!!

- لأنها هي النوع الوحيد من الشيكولاتة اللي داخل في تكوينه الملح مع السكر، شكلها بيان من بره حلو، ما هي شيكولاتة بيضا.. لكن لما تدوقها بتلقى جواها لسعة، مرار ماياخدش باله منها إلا الخبير زيها زي الدنيا بالطبط، فيها الحلو والمر، وزي الناس برضه.. كل الناس بتتولد قلوبهم بيضا، لكن مع الوقت حياتهم بتبقى شيكولاتة بيضا.

تامر عبده أمين

كاتب، صحفي حر ومراسل لصحف أجنبية في مصر. من مؤلفي محافظة أسوان. حاصل على ليسانس آداب قسم اللغة العربية. نال عدة جوائز أدبية من أمريكا وفرنسا في القصة القصيرة. وتعتبر (شيكولاتة بيضا) أول تجربة قصصية منشورة له في مصر.

